

# **QUENQUETSATSARENTSI OGANEJENCATATSICA ITIONCAQUECA MARICOSHI**

*Antsatantaquemparoca*

Ocatica iroguenti antsatantaquemparoca itioncaqueca Maricoshi itioncacotaquerigueti Jeso quirishito. Maricoshi iriguenti jorio, irio ijitan Verenave (Cor. 4.10). Iriniro opajita Maria. Icono agarantajiaca tsaroventajiacarica Jesoshi icapiocapinijiaca otsovironaquitequi (Ya. 12.12). Maricoshi aisa ipajita Joanca. Itsipajiacari Paavoro aisa Verenave iquenaguetanaquegueti quepatsipaequi (Ya. 12.25; 15.37-39). Iquenquejajitaque itioncaquero ocatica ichooaquegueti gunteninintsiqui pajitatsica Iroma. Maricoshi tee intsipatempariji Jesoshi. Iquenquejajitaque arica Shimo Peerero itigarancane Jesoshi itsatacaaqueri yantaguetaqueca Jesoshi. Tee intsajiteroji ajagantsini itioncaquerogueti, cotanquitsi chooca quenquejanquitsica itioncaquero tequeratagueti intioncajiteroji Mateo, Irocashi aisa Joanca, arica ajagantsini 57 irooca otsipa ajagantsini arejevaetacaro 63.

Maricoshi iroguenti itioncaque antsatantama-jaquemparica irira Jesoshi iriguenti quejecarica aajanirentsi amitacotantatsica yantaguetaquero inintaguatica Iriri tigarancaquerica. Irivotetaca jorio cotanquitsi itioncajiaqueneri teeca irio

joriojia intsatantajiaquempaca irira Jesoshi  
 irio agavejamajatatsica yanaajiaqueri maasano  
 agavejavetatsica, yantaguetaquetari oacaantans-  
 tatsica intati, yoguisotoaguequeri ampatsinipae,  
 aisa ipeacotsijajari caquinte igovaeguisherejia.  
 Iparianacarogueti Maricoshi itioncacotaqueri  
 Jesoshi iquenquevaritapojigueti Jesoshi,  
 yoviñacajataquerigueti Joanca Viñacajatantatsica.

*Joanca Viñacajatantatsica itsavetantavaequequea  
 oquitamampororoitapojaquegueti*

(Mt. 3:1-12; Irc. 3:1-9, 15-17; Jn. 1:19-28)

<sup>1</sup> Jero oparianaca Quenquetsatsarentsi  
 Oganejencamajatatsica tsavetacotaquerica  
 Jeso quirishito Irijanite Aapani Irioshi.

<sup>2</sup> Irira quea tsavetantatsica Isaiashini  
 itioncacotaqueroquea paesatoniqui icanqueca  
 Aapani Irioshi iquenquetsatacaaquerigueti  
 Irijanite, icanqueriquea:

“Ari nontigarancaqueri iriquetica oanan-  
 quitsineca, intsavetacotempi.

Irio camantajiaquerineca igonorojia  
 querocagueti pinquenanaqueni  
 irinetsanatashitantajiaavaquempica.”<sup>⊗</sup>

<sup>3</sup> “Inquenquetsataquequea oquitamam-  
 pororoitapojaquegueti iririjencani,  
 incanquequea:

‘Pinetsanatashijiavaquempari Amajirote  
 inquenantapojempaca,  
 pintanarejagueteneri iguenavoquiropae ontam-  
 paticapoquitantanaquempaca.’ ”<sup>⊗</sup>

<sup>⊗</sup> 1:2 Mara. 3:1. <sup>⊗</sup> 1:3 Is. 40:3.

**4** Iroompaquea iriraquea Joanca Viñacajatantatsica yoanaquequea ontaniqui oquitamampororoitapojaquegueti iviñacajatantavaequequea, aisa itsavetantavaequequea icanque: “Pincantashitatijaijanajempa povashiantajianajero pipeacaaguishejiavecaca, piviñacajajianaquempaquea aatonijite icatsimamentajiguimpiroquea Aapani Irioshi maasanopae pigovaeguisherejia, manaqueate irishetajempiroquea.”

**5** Icaramirincatashivaetanaqueriquea Joreaji-aquitica aisa Jerosarejiaquitica. Irooquea iquemajapijirigueti ariquea icohicitanaca itsaveacojianaqueroquea maasanopae igovaeguisherejia, ariquea iviñacajajiaqueriquea Jororanequi.

**6** Iroguenti iquitsaataca Joanca quitsarentsi ipeacaajitacaca imae cameyo, aisa ichompi-mashitacocariequa imeshinatsa. Iriguentiquea ishecataca quejeverarica shapipiiquiti aisa earotoja.

**7** Ariquea itsavetantajianaqueri icanqueriquea:

—Irooshipojiquea incoraquepojaque impoitapojenane. Iriatimpa caaviji yanaaquenaquea yagavejamajati. Aatotarite noquempetimataritsi iriatimpa nompeaque-mpame amiquerineca nosavincanaqueme noishorejacoquerime igaviguitire, caavijitari yanaamajaquena.<sup>8</sup> Naatimpa iroguenti nantaque noviñacajatantajiaquempiro oja, cotanquitsiquea iriatimpa inquempetacaantaquemparo iroviñacajatantajiaquempiro Ishire Aapani Irioshi.

*Iviñacajajiqueriquea Jesoshi  
(Mt. 3.13-17; Irc. 3.21-22)*

<sup>9</sup> Ariquea isotoantanacaroquea Jesoshi Nasare choocatatsica Garireaqui, icam-pojaca ichoocaquegueti Joanca, ariquea iviñacajatavaqueri Jororanequi. <sup>10</sup> Ariquea yarejevetapojajaro Jesoshi otsapijapojacagueti, yameniroquea otanarejanacaquea inquite yampiguiricashipojacariquea Ishire Aapani Irioshi iquejetapojacari emoreni. <sup>11</sup> Iroompaquea iquenquetsajencajitanaque jenoqui inquitequi, icanque:

—Aviguentiquea Irijani nopintsamajatacaca, noshineventamajataquempiquea aviatimpa.

*Inintavecaquea ampatsini irantacaaquerime Jesoshi teeca irininteji Aapani Irioshi  
(Mt. 4.1-11; Irc. 4.1-13)*

<sup>12</sup> Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti. <sup>13</sup> Ariquea ichoocaquitiquea oraniqui 40 savinca-guiteri iconoicari shecatantaguetatsica. Iriraquea Satanashi icoraquetashiqueriquea yasereseretaqueriquea yamenantavetacari inintavecaquea irantacaaquerime teeca irininteji Aapani Irioshi, cotanquitsiquea teetarite iragavejeriji. Iroompaquea irioquea coraquecoraqueitashipojajiri irashivantijite Aapani Irioshi yamijiapojajiri.

*Itsavetantavaetaquequea Jesoshi Garireaqui  
(Mt. 4.12-17; Irc. 4.14-15)*

**14** Ariquea isantanatacojitaquerigueti  
Joanca, yoanaque Jesoshi Garireaqui  
itsavetantavaetaqueroquea Quenquetsatsarentsi  
Oganejencamajatatsica tsataacaacajica quero  
icocani Aapani Irioshi imajirontagueti.

**15** Icanque:

—Imaicaquea aapojaca irinetsanatanta-  
quemparoca Aapani Irioshi icantaqueca  
coramani, iroshipojo irimajirontapojempa.  
Povashiantajianajeroja covaeguisherentsi  
pincantashitatiajianajempa, aisa pin-  
quemisantajigueroja Quenquetsatsarentsi  
Oganejencamajatatsica.

*Jesoshi icajemajaqueri 4 tarajatapinijiatsica  
impeacaajiaquempari itsatacaanejia*

*(Mt. 4.18-22; Irc. 5.1-11)*

**16** Ariquea icantanacaquea Jesoshi oraniqui  
ishitaravijatanacaro otsapijaqui iniromotija  
Garirea jmm. Inejajiapojiriquea Shimo aisa  
iriguentijeguite pajitatsica Antirishi tarajajianat-  
siquea, irootaquequea isavicaventajiaquequea  
iriatiimpajia. **17** Icantajiapoaqueri Jesoshi:

—Jame poguijaguijaitanaquenajate,  
imaicaquea irioquea pimpitsocashijianaquempa  
caquintejia, nagavejacaajiaquempiquea pinque-  
jetacaajajempari shima panquitacojiguirigueti.

**18** Ariquea iriatimpajia yojocapanajantiroquea  
imantsatsitepae yoguijaguijaitanaqueriquea.

**19** Yoayoavetanacaquea tijacoñaji ontaniqui irioqueate yamenapoji Santiago\* aisa iriguentijeguite pajitatsica Joanca savisaviitaque que-najarontsiqui inetsanajiaqueroqueate imantsat-sitepae. Itsipatsipaitacari iriri pajitatsica Severeo.  
**20** Ariquea iriraquea Jesoshi icampojiriquea Santiago aisa Joanca:

—Jaame poguijaguijaitanaquenaja.

Iriatimpajia yoguijaguijaitanaqueriquea Jesoshi, yojocanaqueriquea iriri quenajarontsiqui, itsipajiajari amijiaquerica.

*Caquinte ishaquiacaca ampatsini  
(Irc. 4.31-37)*

**21** Arikea yoayoaitanaque Caperenaoqui. Oraquea aapojacagueti savincaguiteri imagorejantajitaca yoanaque Jesoshi shinagogaqui icapiocantajiacaca joriojia iparianacaroquea itsatacaantanaquequea.

**22** Iquemajiavaqueriguetiquea maasanopae yamenamenaitanaquequea intati, yamenajiaqueritari itsatacaaquiaquerigueti choocaquea iragavejane, teequea inquempejiguempariji tsatacaantajiguiroca itioncacotanaqueca Moishishini. **23** Arikea ichoocaque oraniqui ishinagogatequi aparo shirampari ishaquiacaca ampatsini, arikea iriatimpa icajemaque icanke:

---

\* **1:19** Santiago. Iguenquetsatsarequi quiriego ipajita Iakobos. Iconagarantaca quimajareri yoguipitsocaquerogueti ivajiro ipajitiri Santiago, itsipa ipajitiri Jacobo. Mavite oponeaca iguenquetsatsarequi evereo, ipajitiri Yaakob.

**24** —¡Ariotaqueshiatsi, Jesoshi Nasarequitica!  
 ¿Queroaquea pincojiaquenani?                    ¿Irooquea  
 picoraquetashique                    pinteroncajiaquena?  
 Notsaquempiquea aviguenti Iriomajaca irashi  
 Irioshi.

**25** Icantanaquequea Jesoshi:

—¡Pisanticote! ¡Pisotoanajeri!

**26** Irooquea iquemaquerigueti ampatsini  
 ariquea icotanaqueri ishaquiacaca icantavae-  
 tanaquequea tinquinini, tinquinini tinquinini.  
 Iroompaquea icajemapanajanti ampatsini jjeee!  
 isotoanajiri.                    **27** Maasanojia yamenamenai-  
 tanaquequea intati icoacotavacaajianaca:

—¿Taashia opaji ocatica? Ocantashitatiacatarite  
 itsatacaantapojica, choocaquea iragavejane.  
 Icantaquerigueti ampatsinipae, ari iquemisan-  
 tajaqueri.

**28** Iroompaquea maasanojia guinteniguin-  
 teniitanquitsica Garireaqui iquemacojiaqueri  
 Jesoshi.

*Jesoshi yogeshitajiroquea ivaguirotmajaca  
 Shimo Peerero*

(Mt. 8.14-15; Irc. 4.38-39)

**29** Ariquea isotosotoitanajigueti shinagogaqui,  
 yoanaque Jesoshi itsovironaquitequi Shimo  
 aisa Antirishi, itsipatsipaitanacari Santiago  
 aisa Joanca.                    **30** Oraquea ivaguirotmajaca  
 Shimo ocatsirincavaetaquequea ojoquijica  
 intsompoguiqui. Irooqueate yarejetapojacagueti  
 Jesoshi icamantajitavaqueriquea.                    **31** Iriatimpa  
 iquempejipojaro                    yacatsavacopojiroquea  
 yogatiitaro. Ariquea ocopanajantaquea opeanaja

taampina. Ariquea ojocacojiajiniriquea  
irishecajiaquempaca.

*Jesoshi yogueshiguetajiri icarajiavaeque joquijijianquitsica*

(Mt. 8.16-17; Irc. 4.40-41)

<sup>32</sup> Ariquea itsoguenancanajigueti catsirincaiteri yamajiapojiniriquea Jesoshi maasano joquijijianquitsica iriguentic aisa ishaquiajiacaca ampatsini. <sup>33</sup> Maasano guntenijianquitsica oranqui icaramirincavaequequea sotomorontsiqui. <sup>34</sup> Iriraquea Jesoshi yogueshiguetajiriquea cantashitati-ajencatashiguecarica joquijirentsipae, aisa yoguisotojaijainiri ishaquiajiacaca ampatsinipae. Iriraquea ampatsinijia itsajiaavaqueriquea, jero Jesoshi icantantajiavacarica:

—Aatoja pitsavetacotantajiaipojanatsijate.

*Itsavetantavaetaquequea Jesoshi shinagogapaequi icapiocantajiacaca joriojia*

(Irc. 4.42-44)

<sup>35</sup> Osavincaguitetanajigueti ogantagatiraja opitsepitseiti, icatianacaquea Jesoshi, yoanaque ontaniqui osamani, yamaniqueriqueate Iriri.

<sup>36</sup> Incajararanquitanaquitiguiquea yoanaque Shimo incoaguetajeriquea itsipatsipaitanacari itsipavijitaca. <sup>37</sup> Ariquea yamenajiapojajiri icantajiaipojiri:

—Maasanojia icoaguetajimpi.

<sup>38</sup> Cotanquitsiquea iriatimpa icanqueriquea:

—Jaame ontaniqui irooshiguetajigueti igu-intenipaequi nontsatacayaqueri, irootaquequea nocoraquetashique.

**39** Yoanaquequea Jesoshi itsitacanaqueroquea maasanopae Garireaqui itsavetantaguetanaque-roquea shinagogapaequi icapiocantajiacaca jori-ojia, aisa yoguisotojaijainiri ishaquiajiacaca am-patsinipae.

*Jesoshi yovejairi avejancari  
(Mt. 8.1-4; Irc. 5.12-16)*

**40** Ariquea icoraquepojiquea aparo avejancari. Iguerovempojari icanqueriquea:

—Nomajirote, arigueti pininque, pagavejaque piveajena navejancavejancaacagueti.

**41** Ipintsatacotanacariquea Jesoshi, icantajem-pequitanaca ipamitsitari, icanqueri:

—Jeeje, noninque. ¡Pimeanajempaja!

**42** Irooqueate icanquitiguiri jac peanaja yave-jancavejancaavecagueti, caramajatanaji.

**43** Ariquea itigarancajiriquea Jesoshi, cotan-quitsiquea icantavajiri:

**44** —Aatoja picamtitsi. Iriguentiquea poimotanaque saserorote ponigaapojempar-iuea, paanajenerija viratsipae, pinetsanaque-roja icantaqueca Moishishini cameetsanijite iramenamajaquempinijite, ariquea incanquempi peanajimpi, intsajiaquempinijite maasano peamajatajimpi.

**45** Cotanquitsiquea iriatimpa yoanaquequea icamantajiaqueriquea maasano yogueshitajirigueti Jesoshi. Irootari caarica yoantanta Jesoshi ontaniqui iguintenijiacagueti caquinteja. Manaquea iquenaguetanaque osamanipaequi teeca iriguintenijiguempají, cotanquitsiquea

yoayoaitashivaetanaqueri      osamanipaequitica  
iramenajiaqueri.

## 2

*Jesoshi yogatiajirigueti teeca ironquempaji  
(Mt. 9.1-8; Irc. 5.17-26)*

<sup>1</sup> Iroompaquea ocaraguitejavaetanaquegueti yoanajiquea Jesoshi Caperenaoqui. Maasanojia iquemacojiaqueriquea ariquea ichoocaque oraniqui tsovironaquiqui imaantapinitacaca.  
<sup>2</sup> Irooqua iquemacojiaquerigueti yoayoaitanaque yomporoguiaventanacariqueate oraniqui intsompoguiqui aisa sotsiqui. Querocampate incojiaquempani inquijaujaiquegueti itsipapae, jocajajiavaequea icaramirincavaequequea igonorojia. Iriatimpa itsavetantajiaqueneri Quenquetsatsarentsimajaca. <sup>3</sup> Ariquea icoraquecoraquequea <sup>4</sup> shiramparijia yamacojiapojaqueri teeca ironquempaji. <sup>4</sup> Yarejejavetapojaca iriguenti poncaquini icanca, querocampate incotacajaianaquemparini inquijacaantajianaquemparicate intsompoguiqui ichoocaquegueti Jesoshi. Yataitaiitanaquequea jenoqui sotsiqui ocantamencotacagueti, imorotsitaroquea itampaticatacotaquegueti Jesoshi ivaritsantsajacojiaqueriquea. <sup>5</sup> Iriraquea Jesoshi yamenajiavaquerigueti yaventajiapjacari irogueshitajeriniji, icanqueriquea teeca ironquempaji:

—Irijani, jac shetacotajimpi maasano pipeacaaguishevecaca.

<sup>6</sup> Ariquea ichoocajiaque oraniqui tsatacaantajiguiroca itioncacotanaqueca Moishishini. Iriatimpajia iquenquejajianaque intati:

<sup>7</sup> “¿Querocaquea icocani icanquegueti imaica? Manatari iquejemanatanacari Aapani Irioshi. ¿Arimpate choocampate itsipa agavejanquitsineca irishetsitantaqueroquea covaeguisherentsi? Aparotarite agavejatsi Aapani Irioshi.”

<sup>8</sup> Cotanquitsiquea Jesoshi itsajiavaqueriquea iquenquejajianaqueca, icantsijigari:

—¿Querocaquea picojianacani piquenquejajianaquequea piquejejiaqueroquea imaica? <sup>9</sup> ¿Querocampate caavijica anaaque mananquitsica? ¿Iroocajate noncantaquerigueti teeca ironquempaji: ‘Jac shetacotajimpi maasano pipeacaaguishevecaca’, iroocajate noncantaquitigueri: ‘Pincatianaje, paanajeroquea pinorijancaca, panijitanaje?’ <sup>10</sup> Imaica namenacaajiaquempiroquea yagavejaque ocaniqui quepatsiqui irira Irijanite Caquinte\* irishetacoitajeri ipeacaaguishevecaca caquinte.

Iroompaquea ipitsocashitanacari teeca ironquempaji icanqueri:

<sup>11</sup> —Iintsija noncanquempiquea pincatianaje, paanajero pinorijancaca, poanaje pitsovironaquitequi.

<sup>12</sup> Ariqueate icotanaca icatiapanajanta, yaanajiroquea inorijancaca isotoanaji yoanaji.

---

\* **2:10** Icanquegueti Jesoshi Irijanite Caquinte mana icantacotaca iriatimpala, mana oquejetaca icantacoqueri itsipa. Iritoaque Quirishito Meshiantatsica quenapojatsica jenoqui inquitequi, icaquintetapojaquetari ivoapojaque.

Yamenajiavajiriquea maasano, yamename-naitanaquequea intati ishineventajiacariquea Aapani Irioshi, icantajigui:

—Teequea namenimajigueroji onquempe-quemparoqua ocatica.

*Jesoshi icanqueri Irevi iroguijatanaquerija  
(Mt. 9.9-13; Irc. 5.27-32)*

<sup>13</sup> Ariquea yoanaji aisa Jesoshi otsapijapo-jagueti iniromotija. Irooqua yomporogui-javentajianacariquea icaramirincavaetanaque-quea caquintejia, itsatacaajiaqueriquea.

<sup>14</sup> Iroompaquea yoanaji yamenapojiri irijanite Arejeo pajitatsica Irevi<sup>†</sup> savicaquequea ontaniqui ipashicatsarajitirogueti, yoguijajiaavaqueri avisavisaitatsica ivergaratacaaajiaavaqueri imentaquitsite maasanopae aajiananquitsica irajaararopae irooca taaca opajitapae, iriguentitarite capiocapinitinirica majirontatsica imentaquipae. Iroompaquea iriraquea Jesoshi icampojiri:

—Jameja, poguijatanaquena.

Iriatimpa icatiitsitapanajanta yoanaque yogui-jatanaqueri.

<sup>15</sup> Ariquea Jesoshi yoanaque itsovironaquite-qui ishecatacaqueate, itsipatsipaitacariquea itsatacaanejia, jerijia itsipapae oshequini capi-ocapinijiguininirica majirontatsica imentaquipae, jeri aisa itsipapae covaeguishetatsica. Icaramir-incavaequetari icanca oguijaguijaitanaquerica.

<sup>16</sup> Iriraquea pariseojia aisa tsatacaantajiguiroca

---

† **2:14** Iriratica Irevi ipajita aisa Mateo (pamenero Mt. 9.9; Irc. 5.27).

itioncacotanaqueca Moishishini yamenajiaquerigueti Jesoshi ishecajiacaguetti itsipajiacari covaequishejiatsica aisa capiocapinijiguinirica majirontatsica imentaquipae, icanqueriquea itsatacaanejia:

—¿Quero icocani irira tsatacaa jiguimpica ishecatacojiacari capiocapinijiguinirica majirontatsica imentaquipae, jeri aisa itsipapae covaeguishejiatsica?

<sup>17</sup> Oraquea iquemaquegueti Jesoshi icantajiguri:

—Iriraquea teeca irashinoncajempaji teetarite incoguitejacotempariji aavintantatsica. Iriguenti coguitejacojigari ashinoncajajatiatsica. Ariqueate noquejetaca naatimpa teequea irioquea noncoraquetashiteji teeca incovaeguishejiguempaji noncajemaquiaqueri, iriguenti nocoraquetashijiaque covaeguishejiatsica.

### *Icoacojitaqueriquea Jesoshi irisanticotanta-jitemparoca isheca*

(Mt. 9.14-17; Irc. 5.33-39)

<sup>18</sup> Ariquea iriraquea itsatacaanejia Joanca aisa irashijia pariseoja yoguipaquijajiaqueroquea isheca teetaquea irishecatsitajempaquea. Iroompaquea iconoagarantaca yoayoaitanaque icantajiapojaqueri Jesoshi:

—Iriraquea itsatacaanejia Joanca aisa irashijia pariseoja yoguipaquijapinijiaqueroquea isheca, cotanquitsiquea pashijia pitsatacaguica teequea inquejejiguempariji iriatimpajia. ¿Querocaquea icojiacani?

**19** Iroompaquea iquejetacaanca Jesoshi  
icanque:

—Pinquenquejeroja inchoocategueti  
iriaqueraca manquigatanquitsineca incac-  
jemajiaqueriquea itsipavijijiaca irishecata-  
caajiaquempariquea, ¿arimpate aatompate  
ishecajiatsi? Irishecajiaquempaquea,  
itsipatsipaitacaritarite cajemajiaquerica  
shinejiacaquea. **20** Cotanquitsiquea oraquea  
aapojajempagueti incatsimatantajitaquemparica  
irajaitanaqueri osamani, ariquea iroguenti  
irisanticotantajitemparoca isheca, irishimam-  
pojancacojianaquempari.

**21** “Aatoquea ocameetsati oncotatemparogueti  
quitsaarentsiqui iroquetishitequitica  
incotatantajivetaquemparo iroqueramore-  
natica quitsaarentsi. Irajaquitsijivetem-  
paroqua ariqueate oncotanaquempani  
ontsiñotsiñomorenatanaquequea arimpaquea  
omperejanaqueroquea. **22** Aisa ari onquem-  
petaquemparoqua iroguijaatantajitaque-  
mparogueti vinoja iroquerajatica onca-  
chotapoje iroguijaatantajivetaquemparogueti  
imeshinanaquiqui iriquetinica oroameshi-  
natananquitsica. Oncachojamajavetanaque-  
mpagueti oshimoajavetanaquempa, ariquea  
oncotanaquempa aravoavetaquitempa imeshina,  
intyaquisanaque oshacojaatanaquempaquea  
vinoja, aisa impomatsataquemparoqua imeshina  
imperejanaque. Jero caaviji ocameetsavaeque  
impijaatantajitaquemparoqua iriaquerameshi-  
nari cameetsanijite aatonijite opomatsajata

vinoja, aisa aatonijite ipomatsatatsi imeshina.”‡

*Itsatacaanejia Jesoshi ishireguipanajanti tirigoitsoqui savincaguiteriqui imagorejantajitaca (Mt. 12.1-8; Irc. 6.1-5)*

<sup>23</sup> Iroompaquea aapojajagueti savincaguiteri imagorejantajitaca yoanaque Jesoshi icantanaca tirigomashiqui itsipatsipaitanacari itsatacaanejia. Iriatimpajia ishireguipanajanti tirigoitsoqui.

<sup>24</sup> Icanqueriquea pariseoja:

—Pamenajiguerija. ¿Quero ocotacani yaajianaquequea tirigoitsoqui imaica savincaguiteri imagorejantajitaca? Icantimentantajitirotarite irantantajitemparo.

<sup>25</sup> Yacanaqueriquea:

—¿Arimate teequea pampatsajavantaco-jigueroji aviatimpajia itioncacocitaquerigueti Taavini coramani ocanquegueti itaseanaque iriatimpa aisa itsipajianacaca, teequea onchoocatimajaniquiteji taampaquea irishecajiaquempaca? <sup>26</sup> Iquijitsitanaca itsovironaquitequi Aapani Irioshi§ ichoocatigueti saserorote anaantamajatanquitsica Aviatare ishecatacaroqua pan icantimentantajitica

‡ **2:22** Itsatacaantica Jesoshi iroguenti quejetacaroca quitsarentsi iroaqueraro, oquejetacaro aisa vinoja iroaquerajatica. Aato agaveji otsipataro itsatacaantica pariseoja aisa tsatacaantajigu-iroca itioncacotanaqueca Moishishini. § **2:26** Acaniqui ocanquegueti itsovironaquite Aapani Irioshi iroguenti ocantacoque quitsarentsivanco itsaroventantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica teemporo intsaroventantajiaquemparica. Iroatimpa aisa icantajitiro itsovironaquite Aapani Irioshi.

irishecajitemparogueti, manaquea yojoquijitaquero oraniqui shitaponcarontsiqui cameetsanijite iramenajeronijite Aapani Irioshi. Iriguentiquea shecajiaquemparoneca saserorotejia, iriotaquequea cantanquitsica Aapani Irioshi. Cotanquitsiquea iriraquea Taavini ishecatsitaroquea, aisa yojocajiaqueneriquea itsipatsipaitacaca.

<sup>27</sup> Aisa icanque Jesoshi:

—Oraquea savincaguiteri imagorejantajitaca manaquea ipeacaimentajicanari caquinte, iriraquea caquinte teequea impeacaimenta-jitenemparo iroatimpa. <sup>28</sup> Iriraquea Irijanite Caquinte iriguentiquea cantanquitsica queroca icantimentantajitica irantantajitemparogueti savincaguiteri imagorejantajitaca, aisa querocaquea teeca incantimentantajiteroji.

### 3

*Jesoshi yogueshitajiri chompevacovetatsica  
(Mt. 12.9-14; Irc. 6.6-11)*

<sup>1</sup> Ariquea yoanaji aisa Jesoshi shinagogaqui icapiocantajiacaca joriojia, iquijapojo intsompoguiqui. Ariquea ichooaque oraniqui chompevacotanquitsica. <sup>2</sup> Ariquea irirajia omporoguijajianquitsica yamenamajaji-aqueriquea Jesoshi iramenajiaquequea arica irogueshitajeri savincaguiteriqui imagorejantajitaca cameetsanijite intsaveacotan-tajiaquerinijite incatsimatacaantajiaquerinijite. <sup>3</sup> Cotanquitsiquea Jesoshi yamenapojaqueriquea chompevacotanquitsica icanqueri:

—Iintsija pincatigueja iramenajiaquempinijite maasanopae.

<sup>4</sup> Arikea icanqueriquea maasanopae:

—Imaica iintsija pincantajiguenajate querocaquea icanque Moishishini coramaniqui. ¿Taaquea irantantajitemparoca savincaguiteriqui imagorejantajitaca?      ¿Arikea icanque impeacaantajitemparo cameetsa, irooca irantantajitemparo covaeguisherentsi?      ¿Arikea icanque aavajeri agonoro aatoniji imetoji, irooca icanque ametujaqueri?

Cotanquitsiquea iriatimpajia teequea querocaca incanteji, iquemisantajianaquequea maasanojia. <sup>5</sup> Iriraquea Jesoshi yamenamenaiquerigueti maasano icatsimatsitanacaquea, aisa ishimampojancacojianacariquea, yamenajiaquerigueti mana iquishoshirentanaquequea. Iroompaquea ipitsocashitariquea chompevacotanquitsica icanqueri:

—Pincantavacotempaja.

Irooquea icantavacovetanaquitiga ariquea ocotanaca iraco jac peamajatanaja.

<sup>6</sup> Iroompaquea isotosotoitanaji pariseoja yoayoaitanaji iramenajiaquiteri shineventajigacarica Erorishi.\* Irooquea yamenajiavaque-

---

\* **3:6** Irira pariseoja irio joriojia, teetari irinintajigueji irimajironquempari Sesa, iriguentitari Iromauquitica. Ari iquejetaca Erorishi, teequea irio jorio. Cotanquitsiquea iriraquea Iromauquitica iquijaguetanaque iguinentiqui joriojia yomperaperavaejacari. Irooqua cantanquitsi irimajironquempari Erorishi joriojiaqui, iriotarite inquemisantamajataque Sesa. Icanquequea Sesa maasanojia joriojia irojocagarantapinijiaqueneri imentaquipae. Tee iroshequiamajateji joriojia shinevencarica Erorishi.

rigueti icapiocajiacaca isariimanatanacari Jesoshi irimetojacaantajiaqueriquea.

*Yomporoguiaventajiacariquea Jesoshi otsapi-japojacagueti iniromotija*

<sup>7</sup> Iriraquea Jesoshi yoanaque otsapijapojacagueti iniromotijaqui itsipatsipaitanacari itsatacaanejia. Itirorencaventajianacari aisa icaramirincavaequequea Garirequitica aisa Jorequitica. <sup>8</sup> Iquemacojiaqueriquea yonigaantaguequieroqueate oacaantantatsica intati icoraquecoraquequequea iramenajiaquiteri, iquenaquenagarantajiapoji Jerosarequi aisa Iromeaqui. Itsipapae iquenajiajapojiquea intatiqueroqui Jororanequi. Itsipapae quenaquenaitapojatsica Tiroqui aisa Shironequi. <sup>9</sup> Iriraquea Jesoshi irooqua yamenavaquegueti yomporoguiaventajapojacari icantajiaqueri itsatacaanejia irajaiajateneriquea quenajarontsi iroajiaqueneriquea quempeji otsapijapojacagueti intehinteditantajianaquempaca aatonijite itsinacajiguiritsi omporoguiaventajiacarica. <sup>10</sup> Yomporoguiaventajapojacari icaramirincavaeque joquijijianquitsica itaviavacaajianacaquea icanca inintajiaque inquempejiquempejiiquempariquea impamijiapojaquerinijite, yamenajiaquequea yogueshiguetajiriquea icaramirincavaeque itsipapae. <sup>11</sup> Iroompaquea irirajiaquea ampatsinipae yamenajiaquerigueti Jesoshi yogueroventsitanacariea icajemajianaque icanque:

—¡Aviatimpa aviguenti Irijanite Irioshi!

**12** Cotanquitsiquea Jesoshi icantimentajaque-riquea aatonijite itsavetacojiguiritsi.

*Jesoshi yaajiaqueriquea 12 impeacaajiaquem-paca itigarancanejia*

(Mt. 10.1-4; Irc. 6.12-16)

**13** Iroompaquea Jesoshi yoanaquequea otsempiqui icajemajiaqueriquea inintaca-jaiaqueca. Oraquea yoayoaitanaquegueti iriatimpaqi **14** yaaquequea 12 intsipat-sipaiquempaca, aisa intigarancajiaqueca intsavetantavaetaquequea irootaquequea ipajitantajiacarica itigarancanejia. **15** Ariquea yagavejacaajiaqueriquea iroguisotojaijaeneri ishaquiajiacaca ampatsinipae.

**16** Maasanoquea yaajiaqueca manaquea ipajijiaca: Shimo (ipajitajica Peerero); **17** Santiago† irijanite Severeo, aisa Joanca iriguentijeguite Santiago (ipajijiajiri mavite Voaneregueshi, oncanquequea “quempejiaca caretii”); **18** Antirishi, Jeripe, Varitorome, Mateo, Tomashi, Santiago‡ (irijanite Arejeo); Tareo,§ Shimo (icantajitica “Serote”),\*

---

† **3:17** Irira Santiago ipajita aisa Jacovo.      ‡ **3:18** Santiago.  
 Chooca mavite Santiago, pajitatsica Jacovo.      § **3:18** Tareo.  
 Irioca icantajitica aisa Jorashi irijanite Santiago. Pamenero Irc.  
 6.16 aisa Ya. 1.13.      \* **3:18** Serote ocanque “nintamajatatsica”.  
 Irooquea icantajitiri irirajia joriojia nintamajatanquitsica irogui-  
 isotoajigueri Iromaqutica omperaperaacarica onchoocatashita-  
 jempanijite iguepatsite ishiraerijia. Acaniqui Maricoshi ican-  
 tiri “kananitas”, irooquea oponeaca iguenquetsatsarequi arameo,  
 ocanque “nintamajatatsica”, tee oncanjeji iponeaca Canaanequi.  
 Irocashi (6.15) icancri iguenquetsatsarequi guiriego “zelotes”,  
 irootaquequea ationcantacaroca “Serote”.

aisa <sup>19</sup> Jorashi Ishicariote, aacaanquerineca Jesoshi.

*Icantajiqueriquea Jesoshi iriguenti shaquiacari ampatsini*

(Mt. 12.22-32; Irc. 11.14-23; 12.10)

<sup>20</sup> Ariquea yoanajigueti Jesoshi tsoviron-aquiqui, yomporoguijaventajianacari icaramir-incavaequequea caquintejia, querocampate incojiaquempani irishecajiaquempa iriatimpa aisa itsatacaanejia. <sup>21</sup> Chooca cantajianquitsica: “Jac itsavigavaetanaque.” Iquemacojiaquerigueti ijitannejia icoraquejiaquequea irajaiajaterime.

<sup>22</sup> Icoraquejiaquequea aisa tsatacaanta-jiguiroca itioncacotanaqueca Moishishini, iquenajapirojaque Jerosarequi iramenajiaqueriquea Jesoshi. Iriatimpajia icanquequea: “Iriguentisa shaquiacari Veeresevo† imajirote ampatsinijia. Iriotaquequea agavejacaquerica yoguisotoantaguetacanarica ishaquiajiacaca ampatsinipae.”

<sup>23</sup> Iriraquea Jesoshi icapiocajiaqueriquea maasano itsatacaajiaqueriquea iquejetacaacanari, icanqueri: “¿Arimpate intigarancajempa Satanashi iriatimpa iroguisotoaquempaquea?” <sup>24</sup> Ariqueate inquempetaquempari inchoocategueti caquinte incapiocajiaqueriquea igonorojia impeaquequempaquea imajirote. Iroompaquea irira igapiocane impariajianaquemparogueti

---

† **3:22** Veeresevo. Iguenquetsatsarequi guiriego icanqueri Beezboul aisa Beelzeboul. Icanqueri quimajareri Beelzebú. Iriotaque pajitatsica aisa Satanashi.

incatsimatavacaajianaquempa, aatoquea ichoocagantsijajitsi. <sup>25</sup> Ariquea iquempejiaca tsipatsipaitacarica ijitanejia, iriatimpajigueti apigarancashitavacaajianajatsineca incatsimatavacaajiaquempaquea, ariquea incohincoitanaquempa intsinampirejavacaajianaquempa aatoquea iconoavacajajatsi. <sup>26</sup> Ariquea iquempetaca Satanashi iriatimpa. ¿Arimpaquea querocaquea incoquempani iriatimpagueti apigarancavacaajajatsineca incatsimatavacaajajempagueti igonorojia ampatsinipae? Interoncаяquerigueti igonoro apatiroquea inchoocataje. ¿Ariquea quericampate iromperatajempaca? <sup>27</sup> Inquempetempaquea inchoocategueti itsipa caquinte irininqüegueti inquijashitanaqueriquea itsovironaquitequi catsimarimajaca iraagarantsiqueriquea, iroquetitaqueate iroishotapojeri cameetsanijite iraagarantsiquerinijite. Oraquea aatotagueti yoishotiritsi aatoquea yagavejitsi iraagarantsiqueriquea. <sup>28</sup> Nontsatacaamajaquempiroquea imaica taacagueti impeacaagushejiaquempa caquinte covaeguisherentsi irooca inquenquetsaguishevaeque taaca opajita, iriraquea Aapani Irioshi iragavejaquequea irishetacotajeri aatoquea iquenquejacaajiri. <sup>29</sup> Cotanquitsiquea iriraquea cantaguishetacoquerineca Ishire Aapani Irioshi, aatoja ishetacojitiritsi, incoguitempani irantsipevenquemparo.”

<sup>30</sup> Icantantajiacarica imaica, yamenaquequea icantajiaqueri: “Iriguentiquea shaquiacari am-patsini.”

*Iriniro Jesoshi aisa iriguentijeguitepae  
(Mt. 12.46-50; Irc. 8.19-21)*

<sup>31</sup> Ariquea ocoraquetaque iriniro Jesoshi aisa iriguentijeguitepae, icatintiitapojaca sotsiqui, ariquea icajemacaantajiaqueriquea. <sup>32</sup> Iriraquea savisaviitanquitsica anquitsaecarica Jesoshi icanqueriquea:

—Coraquetaque piniro aisa piguentijeguitepae, ichoocapoji sotsiqui, inintajiaque iramenajiaquempí.

<sup>33</sup> Iriatimpa icanqueri:

—¿Querocate iinani, aisa quericate niguentijeguitepae?

<sup>34</sup> Ariquea yamenitajianacariea maasanojia savisaviitanquitsica anquitsaecarica icanque:

—Jeeri irirajia nopeajiaqueca iinani aisa niguentijeguitepae. <sup>35</sup> Quericaca netsanamajatiroca inintaguetica Aapani Irioshi, iriotaque nopeajiaque iguentijeguipae, tsiojipae, iinanipae.

## 4

*Jesoshi iquejetacaacari pishoncaguitiroca oitsosqui*

*(Mt. 13.1-9; Irc. 8.4-8)*

<sup>1</sup> Ariquea Jesoshi yoanaji aisa otsapijapojacagueti iniromotijaqui itsatacaantavaetajiquea. Icapiocajapirojaquea icaramirincavaeque caquintejia yomporoguijamentajapirojacariea, itirorencajianacaquea icanca, itetantanacaroca Jesoshi quenajarontsi isavicaque. Maasanojia omporoguijajianquitsica ichoocajiaque

otsapijapojacagueti. <sup>2</sup> Ariquea itsatacaaji-aqueri iquempetacaaguetacaroquea taaca opajitapae, icanqueriquea: <sup>3</sup> “Iintsijate piquemisantajiavaquenajate. Yoanaque aparo caquinte impishoncaguitero oitsoqui. <sup>4</sup> Ipishoncavoncaquitanaqueroquea tacororo tacororo itsitacaguetanaquero. Oconoagaranca quea asacaraaguetanaca quenavoquirontsiqui, iroompaquea isavisaviitashipojiroquea tsimeripae ishecajiapojacaro. <sup>5</sup> Otsipa oconoagaranca asacaraanaca mapiporoquivi, taampina otsoroitsivetanaca, teemajaca onchoocamajatenica quepatsi. <sup>6</sup> Iroompaquea icatsirincaguitevetanaca catsirincaiteri itsianaqueroquea oshimpeguiricanaquequea ometojanaque, teetarite oamajateji ovarishitsa isaviqui, ojocaavaquerotarite mapi. <sup>7</sup> Oconoacaquea otsipapae asacaraaguetanaca ochoocaqueueti ovarishitsa samerento. Arikea otsoroavetanaca ariquate otsoroitsitanacaquea samerento iroatimpa otsincoanajiroquea ometojanaji, teequea onchoocateji oitsoqui. <sup>8</sup> Oconoacaquea otsipapae asacaraanaca ocameetsaguitetaqueueti quepatsi, ot-soroanaquequea otganaaanaca ochoocatanaque opitsaraquiacotanacaqueate oitsoqui, oconoaca ochoocaque 30, otsipa 60, otsipa ochoocaquequea 100.”

<sup>9</sup> Iroompaquea icanqueriquea: “Choocagueti piguempita pinquemantavaquempaca, pinquemeja.”

*Jesoshi itsatacajaiqueriquea quero ococani*

*iquempetacaantaguecaroca  
(Mt. 13.10-17; Irc. 8.9-10)*

<sup>10</sup> Ariquea yoayoaitanajiquea maasanopae, aparoquea icantaja Jesoshi itsipatsipaitajariquea itsatacaanejia, aisa itsipa oguijoguijaiquerica. Iriatimpajia icanqueriquea:

—¿Taaquea opajita piquempetacaaguetacaca incajaranqui?

<sup>11</sup> Iriatimpajia icanqueriquea:  
—Aviguentija tsajiaquerone imaica queroquea icotani Aapani Irioshi imajirontagueti, teetari ironigaantajivetemparoji paesatoniqui. Iriraquea itsipajia manaquea nonquejetacaague-taquenempari maasanopae, <sup>12</sup> cameetsanijite iramenamenaivetanaquempaquea, cotanquit-siquea aato oconijatimotiri;  
Inquemaquemaivetanaquempaquea aisa, cotan-quitsiquea aato itsajiavaquerotsi,  
aatoquea ipitsocashijigana noshetacotsitajerime igovaeguishere.◊

*Jesoshi itsatacaajiaqueri itsatacaanejia taaca opajita iquejetacaacaca incajaranqui*

*(Mt. 13.18-23; Irc. 8.11-15)*

<sup>13</sup> Icanqueriquea aisa:  
—¿Teempate pinquemajiajavaqueroquea ocatica noquejetacaacaca incajaranqui? Iroosacanica, ¿querocampate pincojiaquempani pinquemajiaquerogueti ogonoropae nonquejetacaague-taquemparogueti? <sup>14</sup> Iriraquea oananquitsica impishoncaguite iriguenti quempecaroca tsavetantiroca Iguenquetsatsare Aapani Irioshi.

---

◊ **4:12** Is. 6.9-10.

15 Iconoajiacacaquintejiaciroguenti iquempejiacaroquea oitsoqui asacaraaguiguetananquitsica quenavoquirontsiqui. Iquemisantajiaquerquea Iguenquetsatsare Aapani Irioshi, cotanquitsiquea icoraquetashiqueriquea Satanashi ipeacotacajaijaari maasanopae. 16 Iconoajiacacitsipa iroguenti iquempejiacaroquea oitsoqui asacaraaguetananquitsica mapiporoquiqui teemajaca onchoocamajateji ogamiguitere quepatsi. Iquemajiaquerquea Iguenquetsatsare Aapani Irioshi ishineventamajajavetavacaroquea. 17 Cotanquitsiquea teequea inquemisantamajateroji, mana iquejetacaro panquirentsi teeca onquijamajateji ovarishitsa, jero ipeacojianajaroquea taampina. Iroompaquea otiavaetanacari atsipetagantsi, irooca icatsimativentajiqueriquea Iguenquetsatsare Aapani Irioshi ariuea icohipitanaja yovashiantajianajiroquea itsaroventavecaca. 18 Itsipa iroguenti iquempejiacaroquea oitsoqui asacaraaguetananquitsica samerentoqui. Iquemisantajiavecaroquea Iguenquetsatsare Aapani Irioshi, 19 cotanquitsiquea irooqueate itsipatavajiroquea iquenquejajavajiroquea maasanopae choocaguetatsica quepatsipaequitica, aisa ishineventajavajari imentaquitsite irooca aisa taaca opajitapae ajaararontsipae. Teequeate inquenquejacojajeroji Iguenquetsatsare Aapani Irioshi, iroguentiquea iquenquejajiaquequea irajaarantajiaquempaquea. Querocampate incojiaquempani intsaroven-tamajajiaquemparigueti. 20 Cotanquitsiquea chooca itsipa iconoagarantajiaca iroguenti

iquempejiacaro        asacaraaguetananquitsica  
 ocamiguitetapojigueti quepatsi. Iquemisan-  
 tajiajavaqueroquea Iguenquetsatsare Aapani  
 Irioshi, yaajiavaqueroquea, iroompaquea  
 arimpaqueate        iquemisantamajaguitironi.  
 Iconoagarantajiacaquea ichoocajiaque cameetsa  
 iquempejiacaroquea        tsoroananquitsica  
 choocatananquitsica oitsoqui 30. Itsipa iquem-  
 pejiacaroquea choocatananquitsica 60. Itsipa  
 caavijica yanaaque ichoocamajajiaque cameetsa  
 iquempejiacaroquea        choocatananquitsica  
 oitsoqui 100.

*Iquempetacaacaroquea Jesoshi maasanopae  
 senacacovetanquitsica*

(Irc. 8.16-18)

<sup>21</sup> Icanqueriquea aisa:

—Oraquea itsivojitirigueti tsivorentsi ¿arimpate  
 isasaviacojitiriquea chomoqui? ¿Arimpate  
 yoguisavicacojitiriquea        osevatatacaguetti  
 shitamencontsi imaantajitaca? Teequeate.  
 Iroguentiquea yoguisavicacojitiriquea jenoqui-  
 janiqui cameetsanijite intsivotacojiaquerinijite  
 maasanopae. <sup>22</sup> Ariquea oquempetaca taaca  
 opajitapae        senacaguetanquitsica imaica  
 oncoramanitapojajeguetti        ironigaantajiji-  
 queroquea. Aisa taaca opajitapae teeca  
 intsajiteroji imaica oncoramanitapojajeguetti  
 intsajiqueroquea. <sup>23</sup> Choocaguetti piguempita  
 pinquemantavaquempaca, pinquemeja.

<sup>24</sup> Icanqueriquea aisa:

—Pinquenquejamajajigueroja        piquemaji-  
 avaqueca. Querocaguetti pincotsiterini itsipa

ariquea inquejetacaajitaquempi aviatimpafia,  
 ariquea iranaacaavaequempiro. <sup>25</sup> Quericaca  
 tsatavaqueroneca icantajiquerica intsatacaaajita-  
 queriquea otsipapae. Quericaca teeca irininteji  
 intsatavaquero, iraapitsatsijitavaqueriquea  
 itsavecaca.

*Jesoshi iquempetacaacaro imajirontagueti Aa-pani Irioshi, iquejetacaacaro tirigoitsoqui*

<sup>26</sup> Icanqueriquea aisa:

—Imaica nontsatacaaamajataquempiroquea  
 aisa queroquea icota imajirontagueti Aapani  
 Irioshi, iroguenti oquejetacaroquea tirigoitsoqui.  
 Yoanaquequea aparo caquinte ipishoncavon-  
 caquitanaqueroquea tacororororo tacorororo  
 itsitacaguetanaqueroquea. <sup>27</sup> Oraquea  
 iteroncanaquerogueti yoanaji itsovironaquite-  
 qui, iroompaquea opitsecanaji imaanaji,  
 osavincaguitetanajigueti ipityaquirejanaji.  
 Ocaraguitejavaetanaquegueti savincaguiteri  
 otseequitanaquequea otsoroanaque, cotan-  
 quitsiquea iriatimpa teequea intsatavaqueroji  
 querocaca ocotanacani otsoroanaquegueti.  
<sup>28</sup> Inchiquiojiquea otsoroanaquequea  
 quepatsiqui, ochoocatanaquequea oguiji, ariquea  
 agataganajanaca ochoocatanaque oitsoqui.  
<sup>29</sup> Oraqueate osamparijencatanaquegueti  
 yoanaquequea pishoncavoncaquitanaqueroca  
 ipesacoqueroquea yaanaquero sampamiriaqui-  
 tananquitsica.

*Jesoshi iquempetacaacaro imajirontagueti Aa-pani Irioshi, iquejetacaacaroquea oitsoqui moshi-*

*taasa*

(Mt. 13.31-32; Irc. 13.18-19)

<sup>30</sup> Icanqueriquea aisa:

—¿Imaicaquea taaca oquejetacaroquea imajirontagueti Aapani Irioshi? <sup>31</sup> ¿Taaca nonquempetacaajemparo? Ariquea nonquempetacaajemparoqua oitsoqui moshitaasa. Oraquea oitsoqui moshitaasa caaviji anaaque chaamirijaquijaniquivaequequea anaaguequeroquea otsipapae oitsoqui ivintyacajitica quepatsiqui. <sup>32</sup> Cotanquitsiquea ivintyacajitirogueti otsoroanaque agajempejanaca ocanca anaaguequeroquea otsipapae panquirentsipae chaamirijaquijaniquitatsica oitsoqui. Otsegotsegoatanaca oquempetanajaroquea inchato, itsimampeantajajaro tsimeripae.

*Jesoshi iquempetacaantaguecaro itsatacaan-quegueti*

(Mt. 13.34-35)

<sup>33</sup> Ariquea iquejejiaqueriquea imaica Jesoshi itsatacаяiaquerigueti Iguenquetsatsare Aapani Irioshi iquempetacaaguecaroquea taaca opajitapae, maasanopae yagavejajiavaqueca. <sup>34</sup> Teequea intsatacaajigueriji intati, taaca ininqueca intsatacaajiaqueri iquempetacaaguecaroquea. Cotanquitsiquea irioca choocatajatsi itsatacaanejia yoguisotoamajataqueneri maasanopae.

*Oquemisantamajataqueriquea Jesoshi choviga, aisa iniromotija*

(Mt. 8.23-27; Irc. 8.22-25)

<sup>35</sup> Iroompaquea itsaparoncaguitetanajigueti icanqueriquea itsatacaanejia:

—Iintsija jaame intatiqueroqui.

<sup>36</sup> Iquenquetsatacaaajianajiri quea omporoguijajianquitsica, itaquiajatacojianajiri itsatacaanejia icocaniquea itetaca. Itsipajia oguijaguijaitacotanaquerica. <sup>37</sup> Incajararanquiguitetanaquegueti ochovigaguitetapojaquequea choviga jeoc jeoc jeoc, ariquea ocotanaca ovorevoreatanaca otserajatanaqueroquea oja quenajarontsiqui irooshivetapojaca ontamorencanaquempamequea. <sup>38</sup> Iriraquea Jesoshi yojocanacaniquea tin ovataquipojacaguetti itiinatacaroquea tiinarentsi. Itinaitariquea icanqueri:

—Tsatacaantantatsica, ¿arimpate teequea pintsateji irooshipojishiatsi ojocajajiguempanishiatsi?

<sup>39</sup> Icatiitsitanacaquea icanquero choviga:

—Pimpejaencatanajempaja.

Icantsitaroquea aisa iniromotija vorevoreatan quitsica icanquero:

—Pinchopecajatanajempaja.

Ari ocotanaja opeanaja choviga, ari oquempetaca iniromotija ochopecajatanaja. <sup>40</sup> Ariquea icanqueriquea itsatacaanejia:

—¿Quero ocotacani pitsaroantanacaca? ¿Arimpate tequeratampate pintsamajajiguena nagavejamajati?

<sup>41</sup> Arimpaquea itsaroamajajianaquequea ican tavacaajianaca:

—¿Taa ipaji iricatica? Jero oquemisantama jatancarica choviga aisa iniromotija.

## 5

*Gararaquitica ishaquiacaca ampatsini  
(Mt. 8.28-34; Irc. 8.26-39)*

<sup>1</sup> Arikea yarejerejeipojacaquea intatiqueroqui itsinampijaatacojiapojacaquea iguepatsitequi Gararaquitica.\* <sup>2</sup> Irooqua yanijirejavetanaca Jesoshi yameniri icoraquepoji aparo caquinte ishaquiacariquea ampatsini, iquenapojiroquea imperitamoroqui yojoquijitapinijitarica metojatsica. <sup>3</sup> Arikeate iguinentiguitaniquea oraniqui. Teequea quericaca agavejimatajericena iroishoteri, teetari agavejeriji cavorejatsari. <sup>4</sup> Yoishotantajivecari cavorejatsariqui iguitiqui aisa iracoqui itsatitsativaetaqueroquea itsinatsinavaequeroquea pioquire, pioquire, pioquire, otsatitsatiavaetanacaquea cacaaporoquijaniqui. Teequeate quericaca agavejimaterineca. <sup>5</sup> Icocaniquea yanijivijiti savincaguiteriqui aisa pitsecariqui. Yoavaeguetanaquequea otsempipaequi aisa imperitamoroqui yojoquijitapinijitarica metojatsica, icajemamajatatinimaja jeeee. Yaitsitaroqua mapi tsaampiri itotsitaquea quitente quitente quitente. <sup>6</sup> Irooquaate yamenacotsitavacarigueti Jesoshi ishiashitanacariquea quempeji iguerovempojacari. <sup>7</sup> Iririjencavaeque icanqueri:

—¿Querocaquea pincoquenani, Jesoshi Irijanite Irioshimajaca Anaantamajatatsica? Iintsijate aatoja patsipetacaanatsijate. ¡Pimpintzacogajoitenashiatsi!

---

\* **5:1** Gararaquitica. Chooca otsipa paperi otioncacotacagueti acaniqui Jerasaquitica (gerasenos).

**8** Icantantacaroca ocatica irooriji icanqueri Jesoshi ampatsini:

—;Pisotogue, ampatsini, povashianteriqueate iricatica!

**9** Ariquea icanqueri Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica, nocaramirincavaequetari.

**10** Yapijipijitaqueri icantiri:

—Iintsija aatojate pitigarancajanatsijate osamani.

**11** Ariquea ichoocajiaque chancho<sup>†</sup> oraniqui otapiqui ishecajiaca, icaramirincavaeque icanca.

**12** Iquenquetsatsitanacaquea ampatsini icanqueri:

—Iintsija ariguentiquea pintigarancajiaquenaquea noshaquiajiaquempariquea chanchojia.

**13** Iriraquea Jesoshi icanqueriquea:

—Intsiquetirote poapoaitanaque.

Yovashiampanajantiri ishaquiavecaca irioqueate yoashiyoashiivetanacari chanchojia. Irooquea ishaquiajiaquieveta pojacari, ariquea ico hico itanaca isaquiritsaeva etanaque ojeguiron capo jacagueti yanoyano itanaca itanquiretanquiretanaque yojocajaji apojaca, iteroncajiaca maasano. Maasano jia icarajiaque 2,000.

**14** Irooquea yamenajiava querigue quea quempoguijirica itsaroajiana que ishiashiaitanaca yoayoaitanaji icamantajia pojiri ontaniqui

---

<sup>†</sup> **5:11** Irira chancho iriguenti viratsi quejevetarica santaviri.

iguintenijiacagueti itsitacaguetapojoiroqueate, iquemacotantajiacarica choocajiatsica acaniqui aisa choocajiatsica quempejipaequi. Isotosotoitanaque iramenajiaque taa opajita. <sup>15</sup> Yoayoaitanaquequea ichoocaquegueti Jesoshi, iroompaquea yarejerejeipojaca yamenajiapo-jiriquea ishaquiavecaca ampatsini savicaji quitsaataja quenquejanaji quempemajatanaja iroaqueragueti, ariquea icohicoitanaca itsaroajianaque. <sup>16</sup> Iriraquea amenajiaqueroca maasanopae icamantajiaavaqueriquea querocaca icoqueriniquea iroaqueragueti yoguisotojainirigueti shaquiavecarica caquinte, aisa querocaca icoquerini itigarancajiaquerigueti ishaquiajiavetacarigueti chanchojia yojocajajiacagueti. <sup>17</sup> Iroompaqueate iquemajiaquitiguiquea itsavetantajiaquerigueti, iriatimpajia yamanamanaiqueriquea Jesoshi iroanajeniji irovashantsitanajeriniji iguepatsite.

<sup>18</sup> Irooqua itetanajaquea Jesoshi quena-jarontsiqui iroanaje, iriraquea ishaquiavecaca ampatsini icanqueri ininque intsipatanaquem-pari. <sup>19</sup> Cotanquitsiquea Jesoshi tee irishineteriji, mana icanqueri intati:

—Poanaje pitsovironaquitequi, pigonoroqui, pincamantapojajerija pintsavetampojajeroquea maasano queroquea icoquempini Aapani Irioshi ipintsatacotajimpigueti.

<sup>20</sup> Iriatimpa yoanajiquea iparianacaro itsavetantaqueroquea oraniqui guinteninintsipaequi Tecaporishiqui, yoguisotojaiapoaqueneri ipintsatacotacarigueti Jesoshi. Maasanoquea mana yamenamenaitanaque intati.

*Jesoshi ivochatajiro irorijanite Jairo  
(Mt. 9.18-26; Irc. 8.40-56)*

<sup>21</sup> Ariquea imontejacotanaja Jesoshi intatiqueroqui yomporoguijaventapojacari icaramirincavaeque caquinteja, ariquea ichoocapoji oraniqui otsapijapojacagueti iniromotijaqui. <sup>22</sup> Iroompaquea icoraquepojaque shirampari pajitatsica Jairo. Iriatimpa iriguenti jivatanquitsica shinagogaqui icapiocantajiacaca joriojia. Ariquea yamenapojirigueti Jesoshi igueroventapojacari, <sup>23</sup> icampojiri:

—Irooshipojo ometoje norijanite. Jaameshiatsi pimpamitaquitenaroshiatsi ompeanajempanijite onchoocatajeniji.

<sup>24</sup> Iriraquea Jesoshi yoanaque yoguijatanaqueriquea, ariquea yoguijaguajitanaqueriquea icaramirincavaeque caquinteja itirorencaventajanacariequa oraniqui itsinacajianaqueri.

<sup>25</sup> Ariquea ochoocaque aisa oraniqui aparo manquigarentsi ashinoncaavaetanquitsica ososoajavaetini coramani, ariquea ocaratacovaetanaqueni <sup>12</sup> ajagantsiteni.

<sup>26</sup> Atsipevaecaqueate yaavintanavecaroqueate aavintantatsica teequea ompeajempajari arimpaquea ogatsitanaca, niganquiquea oteroncamajatanaqueriquea omentaquiotsite, ejempacotia oanaca. <sup>27</sup> Oquemacoqueriquea Jesoshi oanaquequeate ontaniqui ichoocaquegueti iriatimpa oconoajianacari, oquempejitanacariequa ocoraquetashipojiri itaquiqui ochagatsaequitsitavaqueri ivanquemaero.

<sup>28</sup> Oquenquejitsitanacaquea incajaranqui ocanque: “Iroguenti nonchagatsivetaquempari

ivanquemaero nompeanajempaquea.”

<sup>29</sup> Irooquea ochagataquitiguiroquea ariquea  
ocotanaja osanticojatapojaji ososoajare,  
oquematsinotavaca jac peamajatanaja.

<sup>30</sup> Iriraquea Jesoshi itsatavaqueroquea  
ipeantajaro iragavejane ipitsocanacaquea  
yamenamenaiqueri omporoguijaventajiacarica  
icanqueriquea:

—¿Taaquea chagatsitaquenaro novanque-  
maero?

<sup>31</sup> Icantajianaque itsatacaanejia:

—Pamenavecaqueate itsinacajianaquempi,  
pogaavacaquea picanque: ‘¿Taaquea chagataco-  
quena?’

<sup>32</sup> Iriatimpa yamenamenaitanaque taaca  
chagatacoquerica. <sup>33</sup> Iroatimpa otsaroama-  
jatanaquequea ompioncavaetanaca, otsatavajit-  
tari peamajataja. Ojocavaetapojacaca iriatimpaqui  
ogueroventapojacari ocamanqueriquea  
maasanopae. <sup>34</sup> Iriatimpa icanqueroquea:

—Orijani, irooriji pavenquenatarite naatimpa,  
irootari piveantanajaca. Imaicaquea poanaje,  
pishinevaetajempa aatotarite apijitajimpi aisa.

<sup>35</sup> Iroompaquea quenquetsatatsitiraja Jesoshi  
icoraquecoraqueipoji itsipapae, iquenajiajopoji  
itsovironaquitequi jivatanquitsica shinagogaqui,  
icampojiri:

—Jac metojaque porijanite, ariotapojaque  
pasereajiritsi Tsatacaantantatsica.

<sup>36</sup> Cotanquitsiquea Jesoshi iquemaquerigueti,‡

---

‡ <sup>5:36</sup> Chooca otsipapae paperi otioncacagueti: “Cotanquitsiquea  
Jesoshi teequea inquemisantajajeri.”

ipitsocashitari jivatanquitsica shinagogaqui icanqueri:

—Aato pitsaroguitsi. Mana paventanaquena naatimpa.

<sup>37</sup> Tee iroguishinejeri itsipajia iroguijaguiajitanqueri, iriguentequea itsipatsipaitanaca Peerero, Santiago<sup>§</sup> aisa iriguentejeguite Santiago pajitatsica Joanca. <sup>38</sup> Oraquea yarejerejeitapojaagueta itsovironaquitequi jivatanquitsica shinagogaqui yamenapojiri ampenejencavaejiaca iraajiaca cajemajiaque oraniqui. <sup>39</sup> Iquijanaquequea intsompoguiqui icantajiapojiri:

—¿Taampa opajita piraantajiacaca picajemantacaca? Teetarite ometojenica, mana omaaque intati.

<sup>40</sup> Ariquea icohipoitanaca ishirontimentajianacari. Ariquea yoguisotosotoitajiri maasano sotsiqui, iriguentequea itsipataja jivatatsica aisa imanquigare, iriguentejia aisa itsatacaanepae itsipatsipaitacaca incajaranqui, iquiaquijaitanaquequea ojoquijicagueta irorijanite. <sup>41</sup> Yacatsavacoquero icanqueroquea:

—*Talitha, cumi* \* —ocanquequea: “Chaajaniquitirajaca, noncanquempi, pincatianaje”.

<sup>42</sup> Irooqua icanquikitigui ariquea ocotanaja otancorejanaji ocatianaja anijivijitaji. Iroatimpa

§ 5:37 Santiago ipajita aisa Jacovo. \* 5:41 Talitha, cumi. Icanqueroquea iguenquetsatsarequi arameojia, irootarite iguenquetsatsare Jesoshi ichoocatigueti quepatsiqui.

arejetacaro 12 ajagantsite. Iriatimpajia yamenamenaitanaquequea intati. <sup>43</sup> Cotanquitsiquea Jesoshi icantajiguiri aatoquea icamantitsi. Icantistari aisa irojocajiaquenero oshecatajempata.

## 6

*Itsatacaantavetacagueti Jesoshi Nasarequi  
(Mt. 13:53-58; Irc. 4:16-30)*

<sup>1</sup> Ariquea yoanaji Jesoshi iguinteniqui, itsipatsipaitanajari itsatacaanejia. <sup>2</sup> Aapojaxagueta savincaguiteri imagorejantajitaca\* yoanaque shi-nagogaqui icapiocantajiacaca iparianacaroquea itsatacaantanaque. Iriraquea quemajiaquaquerica yamenajianaquequea intati icantajianaque:

—¿Queroquea oquenapojini maasanopae ocatica iquejetantacaca iricatica? ¿Taa opajita ocatica itsatica ganejencaro yojocajiquenerica? ¿Quero ococani yagavejancaca yonigaantaguequeroquea oacaantantatsica intati? <sup>3</sup> ¿Teecajate irioquea iricatica caripintero,† irijanincaca Maria? Iriraquea iriguentijeguitepae iriguenti Santiago, Jose, Jorashi aisa Shimo. Ariquea oquempejiaca itsijoitepae iroatimpajia aisa oguinentijiaca acaniqui, amenamajajiguiroquea aatimpajia.

Ariquea teequea irinintajigueji inquemisan-tajiaqueriji, iroguenti icatsimajiaqueri. <sup>4</sup> Cotanquitsiquea Jesoshi icantajiaqueri:

—Iriraquea tsavetantiroca icanquerica Aapani Irioshi ishineventajitavajari querocaguetai

---

\* **6:2** imagorejantajitaca. Irira joriojia imagorejapinijiaque saavarroqui. † **6:3** Iriraquea caripintero iriguenti tsamajague-tiroca inchacota, ipeacaantaguecaro shitaponcarontsipae, taaca opajitapae.

yoanaqueni osamani, cotanquitsiquea ichoocavecagueti iguinteniqui, teequea irishineventajitempariji, aisa teequea inquemisantajigueriji ijitanejia aisa gunteninitimotacarica itsovironaquitequi.

<sup>5</sup> Ariquea teemajaca ironigaantajeroji oacaantantatsica intati oraniqui iguntenivetacagueti. Manaquea ipamijiaqueriquea aparopae ashinoncajajianquitsica, yogueshijajiri. <sup>6</sup> Ariquea yamenanaque intati, yamenanaque teequea inquemisantajiajeriji, manaquea icantajiaque: “Caaricaja.”

Ariquea Jesoshi yoayoaguetaquequea irooshipojigueti oraniqui iguntenijiacagueti itsatacaantavaetaquequea.

*Jesoshi itigarancajiaqueri 12 itsatacaane iroaroaitanaque intsavetantajianaque  
(Mt. 10.1, 5-15; Irc. 9.1-6)*

<sup>7</sup> Ariquea icajemaqueriquea itsatacaane carajianquitsica 12, itigarancajiaqueriquea iroaroaitanaque intsipatavacaanaquempa mavite yagavejacaajiaqueriquea iragavejajiaqueri ampatsinipae. <sup>8</sup> Icantajiavaqueriquea: “Aato paimatitsi. Aatoja paajiguitsi pitsaratote, pisheca aisa pimentaquietsite. Iroguentiquea pigotiro.

<sup>9</sup> Pincaviguitijianaquempaja, cotanquitsiquea aatoquea paajiguitsija mavite piitsaare, iroguentiqueate piquitsaajiacaca.

<sup>10</sup> Querocagueti oraniqui poapoaitanaqueni incajemajiavaquempigueti pimaanaque itsovironaquitequi, poapoaitanaquequea pincoquempaniquea pimaimoquiaqueri arejevaetapoajempa savincaguiteri poapoaitantanajempaca.

**11** Oraquea querocagueti poapoaitanaqueni oraniqui aatoguetiquea ishineventajiguimpitsi, taampina poapoaitanaque, cotanquitsiquea iroquetitaja pantecamatanaquereroja quepatsivane pagatiquitsitapojaquerigueti, iroonijite iramenantajiaquempanijite iroguenti yantagushejiaqueroquea cov-aeguisherentsi, teatarite irajaiavaquempiji irishineventajiavaquempiji. [Arimajaquea oncoramanitapoajegueti arejetapoajempagueti incatsimatantaquemparica Aapani Irioshi, caaviji incatsimamajajiaqueriquea irirajia teeca irishineventajiavajempipi, anaama-jataqueroquea incatsimamajajiaquerigueti guntenijiavetanquitsica coramaniquitica Soromaqui aisa Gomoraqui.]”

**12** Iriatimpajia yoayoaitanaquequea itsavetantajianaque, icantajiaqueri maasano irovashiantajianaquereroja maasanopae cov-aeguisherentsi ipeacaagushevaetacaca incantashitatijianajempa. **13** Yoguisotoajajiaqueriquea oshequi ampatsinipae, aisa ipantantajiacari orejiqui oshequi joquijiripae, ipeajianaja.

*Erorishi iquenquejajiro imetojacaanquerigueti  
Joanca Viñacajatantatsica*  
(Mt. 14.1-12; Irc. 9.7-9)

**14** Maasano iquemacojiaqueriquea Jesoshi, jero iquemacotantacarica majirontatsica Erorishi<sup>‡</sup> iriatimpa. Chooca cantajanquitsica: “Tancorejana-

---

<sup>‡</sup> **6:14** Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

jishiatsi Joancani Viñacajatantatsica, jero yagavejamajatantacaca yonigaantaguequeroquea oacaantantatsica intati.” <sup>15</sup> Itsipaquea cantanquitsica: “Iriguentiquea coramaniquitica tsavetantatsicani pajitatsica Iriashini.” Itsipapae cantanquitsica: “Iriguentiquea tsavetantatsica, quejecarica irirajia tsavetantajiatsicani coramanipaequitica.”

<sup>16</sup> Oraquea iquemajiaquerigueti Erorishi ican-tajiaquegueti imaida, icanque iriatimpa:

—Iriguentiquea Joancani nojitorejacaanqueca, tancorejanajishiatsi.

<sup>17</sup> Oraquea chapinqui iriraquea Erorishi yaacaantaqueri Joancani, yoishotacaanqueriquea cavorejatsariqui, isantanatacotaanqueri, irooriyi yamenaquequea icantomajimentavecari Eroriashi yaapitsaquerigueti iriguentijeguite pajitatsica Jeripe. <sup>18</sup> Iriraquea Joanca icanqueriquea Erorishi: “Tee ari incojitempaji paapitsaquerigueti imanquigare piguentijeguite.”

<sup>19</sup> Oraquea Eroriashi ariquea ocatsimatanaqueriquea Joanca onintaveca irimetojaitsijiquemparimequea, cotanquitsiquea querocampate oncoquerini. <sup>20</sup> Itsaroacaacaritarite Erorishi itsaquequea iriguentiquea cameetsari, iriguenti igomajamajare Aapani Irioshi, jero yamenamajatantacarica aatonijite queroca icojitirini. Oraquea itsavetantavaetigueti Joanca inintanirovecaro, cotanquitsiquea tee intsateji querocampate incoquempani. <sup>21</sup> Iroompaquea aapojatiga savincaguiteri ometojacaantantaquemparica. Iroguentiquea aapoja isavincaguiterite Erorishi. Iriatimpa itiacaantaguetaquequea

taaca opajitapae shecatsipae, ariquea icajemajiaqueriquea imajirojiate joriojia, aisa imajirojiate coaretajia, aisa anaantajiatsica guntenijiatsica oraniqui Garireaque. <sup>22</sup> Arikea ishecajaciaca, oquijapoquellea oriyanite Erorishi otsamaropoji opitsopitsovaetanacaqueate. Irooqua yamenaquerogueti Erorishi aisa maasanopae itsipatsipaitacaca ishecajiacaguetai, ishineventajiacaroquea. Iroompaquea icanguero:

—Imaicaja pamanenajate taaca pininqueca, naatimpa nojoquitsitempiroquea.

<sup>23</sup> Icantsitajaro aisa:

—Imaica noncanquempi arimajaca nojocaqueempiroquea taaca pamanaquenaca, aatotarite namatavijimpitsi. Quempetaca pamanenaguetai nojocagaranquempiro nashintaguecaca, nontincavirejitempiroquea niganqui. Incatsimatimentenaro Aapani Irioshi aatogueti nonetsanatiro nocanqueca.

<sup>24</sup> Osotoapanajanti oanaquequea ocantapoja-quero iniro:

—Iinani, ¿taaquea opaji namanaqueri?

Iroatimpa ocanquieroquea:

—Iroguentiquea pamanaqueri iguito Joanca Viñacajatantatsica.

<sup>25</sup> Iroatimpa oitsitanacaquea oquijitsitanaja ichoocaqueguetai majirontatsica Erorishi, ocanqueriquea:

—Iroguenti noninque pojocacotsitenaro imaica iguito Joanca Viñacajatantatsica shimencoqui.

<sup>26</sup> Arikea icotanaca iriatimpa ishimampojancanaca, cotanquitsiquea iroorijite

icanqueroquea, aisa iquemajiaqueri maasanopae icajemajiaqueca, tee irinintenica incantero: “Aato.” <sup>27</sup> Irootarite itigaranquitsantacarica coareta iroanaque ontaniqui isantanatacojitaquerigueti Joanca iramacoqueroquea iguito. <sup>28</sup> Yoanaquequea ijitorejaquitiri santanaqui iroompaquea yamacoquenero yojocacopojaquenero, irooqueate oguipitsocacoquenero quea iniro. <sup>29</sup> Oraquea iquemacojiaquerigueti itsatacaanejia Joanca, icoraquetashijiajiri yaajianajiro itsino iquitajiajiro.

*Ishecatacaaajiacari Jesoshi 5,000 shirampari  
(Mt. 14.13-21; Irc. 9.10-17; Jn. 6.1-14)*

<sup>30</sup> Iroompaquea icoraquecoraqueitaji itigaran-canejia Jesoshi itsipatsipaipojajari icamampojiri maasanopae yantaguetaquitica ontaniqui aisa maasanopae itsatacaantaguetaquitica. <sup>31</sup> Cotanquitsiquea coraquecoraqueitanatsiquea icaramirincavaeque caquintejia, itsipapae yoayoaitanaji, teequeate iragavejajiguempaji Jesoshi irishecajiguempaji. Irootaquequea icantantacarica Jesoshi itigarancanejia:

—Jame ontaniqui osamani teegueti inchoocateji caquinte, pimagoremagoreipojaque-quea. Aviguentijia nontsipatsipaitanaquempaca, aatojate yoayoaititsija itsipapae.

<sup>32</sup> Ariquea Jesoshi itsipatsipaitanacari itehiteitanacaquea quenajarontsiqui yoayoaitanaque-quea. <sup>33</sup> Cotanquitsiquea irooquea yoayoai-tenacaquea yamenajiaavaqueriquea itsipa caquintejia itsajiaavaqueri. Yoayoaitanaquequea iriatimpajia, aisa yanijijianaque iriquetica

arejerejeitanquitsi. <sup>34</sup> Iroompaquea itsinampi-jaatacojiapojaca. Irooqua yanijirejavetanaca Jesoshi yamenajiajopojiriquea icaramirincajiaque caquintejia, ipintsatacojianacariquea maasano, yamenajiaqueriquea aparo yapintajiacat yatsipevaeliacaqueate quempejiaca oveja teeca inchoocateji quempoguijajiguerineca, ariquea iparianacaroquea itsatacaaguetapojiri. <sup>35</sup> Imaicaquea ijaguitevaetanaji catsirincaiteri, iquempejiquempejitanacariquea itsatacaanejia icanqueri:

—Jac jaguitevaetanaji catsirincaiteri. Ocaniquiquea ocaniqui teequea quericaca choocatatsineca, <sup>36</sup> iroosacanica pintigarancajiajeri maasano irirajia iroaroaitanajetajate ontaniqui quinteninintsipaequi irooshitacogue-tanquitsica cameetsanijite irivegarajiaquenijite ishecajia irishecajiaquempanijite. Ocaniquiquea ocaniqui teatarite onchoocateji taaqueate irishecajiaquempaca.

<sup>37</sup> Cotanquitsiquea Jesoshi icanqueriquea:

—Pojocajigueneritsija aviatimpajia irishecajiaquempaca.

Iriatimpajia icanqueriquea:

—¿Arimpate pininque noanoaitanaque novegarajiaquiteneri irashijia maasano irishecajiaquempaca? Ovegaravaecatari 200 tenario. §

<sup>38</sup> Ariquea icanqueriquea Jesoshi:

---

§ <sup>6:37</sup> Iriraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario. Iramiterigueti 8 taai irivegarataqueri 200 tenario.

—¿Quero ocarashequiaque pan pashijia?  
Iintsija poapoaitanaque pamenaquiaquiterojate  
querocaca ocarashequiavaeque.

Ariquea yoayoaitanaquequea yamenaji-  
aquitiro, iroompaquea icoraquecoraqueitaji  
icantajapijiri:

—Chooca 5, aisa shima mavipaquite.

<sup>39</sup> Icanqueriquea Jesoshi:

—Iintsija pincantajigueriquea maasano  
irisavisaviitaquequea janamaroncaroqui cataro,  
ariquea pomporoguijaguequeriquea.

<sup>40</sup> Iriatimpajia isavisaviiquequea iconoajiaca  
yomporoguijajiac 100, itsipapae icarajiaque  
50. <sup>41</sup> Iroompaquea iriraquea Jesoshi  
yajiricajiaquero pan caratanquitsica 5 aisa  
mavipaquite shima, ipaguitetanaqueroquea  
inquite yamanaqueriquea Aapani Irioshi,  
icantaqueri: “Arioteesaa.”

Ariquea icotarejaquero pan, yojocajiaqueneri  
itsatacaanejia, irioquea gaavaqueneri  
yojocajiajavaqueneri maasano. Ariquea  
iquempetacaacariequea shima iriatimpa.

<sup>42</sup> Ariquea ishecajiaca maasano iquemajianaca.

<sup>43</sup> Iroompaquea iriraquea itsatacaanejia  
icapiocajiajiro choocatajatsica pan aisa shima,  
itetajiro cantiriqui tseraiquipae ocaratacovaetaji  
12. <sup>44</sup> Icaramirincajiaque 5,000 shiramparijia  
quenquevarijia shecajianquitsica.

*Yanijijatanaquero Jesoshi ojenoquijaare iniro-  
motijaqui*

(Mt. 14.22-27; Jn. 6.16-21)

**45** Ariquea itigarancajiaqueriquea Jesoshi itsatacaanejia icantajianajiri intejianajempaquea quenajarontsiqui irijivajianaje irimontejacojianajempaquea intatiqueroqui Vetsairaqui. Icantanajiri capiocajianquitsica iroaroaitanaje.

**46** Ariquea yoayoaitanajiquea maasano, iriatimpa yoanaquequea otsempiqui iramaneri Iriri. **47** Oraquea opitsecanajigueti iriraquea itsatacaanejia niganquijatacovaetanajiquea. Ichooaque Jesoshi apaniro quepatsiqui.

**48** Iriatimpa yamenacotsjiavacariquea ipanquenanajiacaro ivetincajajavaquero imagojianaquequea, ochovigaguetevaetanaquetari choviga jeoc jeoc, oguipiguipiacovaetanaqueriquea. Iroompaquea omancharejaguitetanajatiga savincaguiteri icoraquepoji yanijijatapojiro jenoquija iniromotijaqui iravisajianaquerime.

**49** Iriraquea itsatacaanejia yamenitsijiavacariquea yanijijatapojiro ojenoquijaare, ijiqueriji sashinti, icajemajianaquequea. **50** Maasanoquea yamenajiaqueri itsaroajianaque, cotanquitsiquea iriatimpa icanqueriquea:

—Pintampishishirentajianaque. Naroguenti, aatoquea pitsaroajiguitsi.

**51** Ariquea itetanaja iconoapojajari, ariquea ocotanaja choviga jac santiconi. Iriatimpajia yamenamenaitanaquequea intati.

**52** Yamenajiavecaroqueate incajaranquiqui yoshequiaquerogueti pan, cotanquitsiquea teequea intsajigueji queroquea icocaniquea iriatimpa yagavejavaequeguetiquea maasanopae, manaquea iquishoshirentanaquequea.

*Jesoshi yogueshiguetajiriquea ashinoncajajian-quitsica Jenesarequitica  
(Mt. 14.34-36)*

<sup>53</sup> Iroompaquea imontejacójana quea intati queroqui yarejejiapojajaro Jenesarequi, yagatacojiapojaji. <sup>54</sup> Yanijirejajiana quequea, maasanojia itsajia vaqueriquea iriguenti Jesoshi. <sup>55</sup> Jero yoayoaitantajianacaca ishiashia itanaca quea itsitacaguetejava etanaquero yaacojiaquitiri ashinoncajajian quitsica, yaajiana queneriquea irogueshiguetajeri. <sup>56</sup> Querocagueti orani qui iquenaguetana que Jesoshi guiteninintsipaequi chaajaniquigue-tan quitsica, iniroguetan quitsica, jero aisa iniganquitejirepaequi, yaacotsijitanacarie quea ashinoncajague tan quitsica yoguisavica jiquerorani qui quenavo quirontsiqui. Icantajiaava queri:

—Intsishiatsi, Nomajirote, noninque inchagatsijivetava queempiro oshipaquijani qui qui piitsaare.

Maasanopaetari chagatsijia querica ipaeguetanaja.

## 7

*Jesoshi itsatacayaia queriquea itsatacaanejia taaca opajitapae coguishetantatsica  
(Mt. 15.1-20)*

<sup>1</sup> Iroompaquea icora quecoraque ique quea pariseo jia aisa tsataca antajiguiroca itionca-cotana queca Moishishini, iquena quena ipo jiquea Jerosarequi, icapi oca ventajia pojacari Jesoshi. <sup>2</sup> Yamenajia pojiri quea itsatacaanejia icono-agarantajia quea tee quea irinetsanajigueroji

yamejiacaca, mana ishecashecaica intati teequea inquivacomajajiguempaji, yamenajia vecaroquea ocoguishequeri yajiricajia queca. <sup>3</sup> (Irirajia pariseojia aisa maasanopae itsipajia joriojia yoguijatacojia queriquea choviquijiana querica, aatogueti iquivacomajataquea aatojate ishecajaiatsi. <sup>4</sup> Aisa yoayoaitigueti yojocantague-tirogueti taaca opajitapae ishecajiguetacaca icoraquecoraqueitaji iquivaquivaitapoja. Aatogueti iquivaquivaitatsi, aatoquea ishecashecaitatsi. Aisa taaca opajitapae yoguijatacojia queri choviquijiana querica coramani, iquivajiguiroquea ichovintyori quitepae, igatsantsana quiritepae, cavorejana quiripae, aisa inorijantacaca.) <sup>5</sup> Iroompaquea iriraquea pariseojia aisa tsatacaantajiguiroca itioncacotana queca Moishishini icanqueriquea Jesoshi:

—¿Querocaquea icojiacani pitsatacaanejia teequea iroguijatacojigueriji choviquijiana cajica inquivacomajajia quempa? Mana ishecatacojia caroquea iraco ocoguishejia querigueti yajiricajia queca.

<sup>6</sup> Iriatimpa icanqueriquea:

—Itampaticamajataqueroquea tsavetantatsica Isaiashini itioncacojiana quempigueti coramani aviatimpajia cameetsatamampeajatsica, icanquequea:

‘Iricatica caquintejia ishinetseraventavequena,  
cotanquitsiquea manaquea  
ichoocashirentavaetaque osamani.

<sup>7</sup> Itsaroventamampeajia vetaquena quea,

cotanquitsiquea                itsatacaantajiguica  
                   iroguenti    icantajiguica        caquinteja  
                   irinetsanajiqueca.'

<sup>8</sup> Aviatimpajia pojocajianajiroquea icanqueca Aapani Irioshi, iroguentiquea quisho poamajajiaque itsatacaantajiguica choviquijianaquempica.

<sup>9</sup> Icanqueriquea aisa:

—Caavijiquea piticaarejajiaquero icanqueca Aapani Irioshi cameetsanijiite poguijatacojiajeronijite pamejigaca aviatimpajia.

<sup>10</sup> Pamemajajiavecaroquea icanqueca Moishishini: 'Pinquemisantamajajiaquerijate piri aisa piniro, aatoquea pipigatsajigaritsija.' Icanque aisa: 'Iriraquea tsavejencatirica iriri irooca iriniro irimetojitsijitempari.'

<sup>11</sup> Cotanquitsiquea aviatimpajia manaquea picantashitatijaiqueroquea, picantapinijiaque cameetsavaeque shirampari incanqueri iriri irooca iriniro: 'Aatoquea nagavejitsi nojocaquempi picoguitejacoqueca, irooriji maasanopae nojocaquempimeca iroguentiquea corova.' (Oraquea corova ocanque: 'Nojocashiquenemparica Aapani Irioshi').

<sup>12</sup> Incanquerigueti iroguenti corova, aviatimpajia picanquequea aatoja yojoquiniritsija iriri irooca iriniro, aatoja icavintsajajiguiri.

<sup>13</sup> Piquempejiaquerogueti imaica iroguentiquea povashiantajianaquero icanqueca Aapani Irioshi, irooquea poguijatacojianaque itsatacaantajiaqueca pivaesatiniteni. Cotanquitsiquea teetarite aparoquea onchoocateji ocatica, pantajiaquequea otsipapae quejecaroca.

**14** Ariquea icajemajiaqueri aisa maasanopae, icapiocajiaqueriquea icanqueri:

—Pinquemisantamajajilavaquenaja maasano aviatimpajia, pintsajilavaquero noncamanquempica. **15** Taaca opajitapae sotsiquitica quijanquitsineca ivagantequi caquinte aatoquea ocovaeguisheshirentiri. Oraquea sotoanquitsineca iriatimpaqui, irootaquequea covaeguisheterineca. **16** Choocagueti piguempita pinquemantavaquempaca, pinquemeja.

**17** Arikea yojocapanajantiri maasano iquijanaquequea tsovironaquiqui. Iriraquea itsatacaanejia icanqueriquea:

—¿Taaquea piquempetacaaca incajaranqui?

**18** Iriatimpa icanqueriquea:

—¿Teitarite pinquemajiguenaji aviatimpajia aisa? ¿Arimpate teesacanica pinquemajiguenaji nocanquegueti taaca opajitapae sotsiquitica quijanquitsineca ivagantequi caquinte aatotarite ocovaeguishetiritsi? **19** Teitarite arikea ogueji shecatsi shiretsiqui, manaquea otehoteitapojaca tsicotontsiqui mana irishitacojitalero.

Iroguentiquea icantajiaqueri imaica cameetsanijite intsajiaquenijite maasanopae ishecajiguetacaca teitarite oncovaeguisheta-  
caanteji. **20** Icanqueriquea aisa:

—Oraquea sotoapojirica caquinte, irootaquequea covaeguishetaquerica. **21** Oraquea intsompogui qui shiretsiqui ariqueate oquenapoji taaca opajitapae covaeguisherentsipae: iquenquejaguishejigui, yoashijiguiro manquigarentsi tequeratatirajaca irimanquigajitemparo, yaitsitantajigui, imetojantajigui, yoashijiguiro

manquigarentsija imanquigajitacaca,  
<sup>22</sup> inintsiguetiriquea yashintaguecaca itsipapae,  
 isavicaventajiguiro covaeguishersensi,  
 yamatavijantajigui, teequea irinejashitemparoji  
 manquigarentsi, icatsimatimentiriquea  
 igonoropae yamenaqueguetiquea caaviji  
 yagavejavaequequea, iquenquetsaguishetanta-  
 jogui, yaventacojiacaquea, teequea intsajigueji  
 incomajamajajiguempaji. <sup>23</sup> Maasanopae  
 ocatica ipeacaaguishejiguetacaca manaquea  
 oquenapojoquea shiretsiqui, irootaquequea  
 covaeguishetantanquitsica.

*Aventanajari Jesoshi manquigarentsi Shiopen-  
 ishiaquitica*  
*(Mt. 15.21-28)*

<sup>24</sup> Ariquea yoanajiquea Jesoshi irooshita-  
 coquero Tiro aisa Shirone ariquea iquijapoji  
 tsovironaquiqui, teequea irinintavetem-  
 paji inquemacojiterime, cotanquitsiquea  
 teequea iragavejeji iromanacotempaji.  
<sup>25</sup> Ariquea ochoocaque aparo manquigarentsi  
 choocatanquitsica orijanite tequeratatiraja  
 onquenquevaroteji, ishaquiacaroquea  
 ampatsini. Iroompaqueate oquemacoquerigueti  
 Jesoshi oanaquequea amenavaqueri. Ocoraque-  
 pojiquea ogueroventapojacari. <sup>26</sup> Oraquea  
 manquigarentsi iroguentiquea guiriego,  
 ovoguiquea Shiopenishiaqui. Ocantapojaqueri  
 iroguisotoacoventajero orijanite ishaquiacaca  
 ampatsini. <sup>27</sup> Cotanquitsiquea Jesoshi  
 icanqueroquea:

—Iriquetitaquea shecamajatanquitsine chaajaniquipaetirajaca. Teequea oncameetsateji aapitsateri chaajanquirijia isheca, ojoquitenempari ishiishitepae.\*

**28** Iroatimpa ocanqueriquea:

—Arimajaca, Nomajirote, cotanquitsiquea shishi iramenajiguerigueti irishecajiguempaguetu chaajanquiripae iroguijavaqueroquea isaviji shitaponcarontsiqui irishecatsopequiguetavaquemparoquea otsopequi.

**29** Iriatimpa icanqueroquea:

—Pitampaticamajataqueroquea. Imaica iintsijate poanaje, jac sotoanajiquea ampatsini shaquiavecaroca porijanite.

**30** Oanajiquea, arejevepojaja otsoviron-aquitequi amenapojaquitoquea orijanite norijaca omencorequi omaantacaca, teequea irishaquiajemparojiquea ampatsini, jac sotoanajiquea.

*Jesoshi iquemacajairiquea teeca inquemavetempaji*

**31** Yoanajiquea Jesoshi isotoantanajaroquea ichooaquegueti irooshitacoquero Tiro, icantanajaquea Shironequi aisa Tecaporishiqui, yarejevaetajaquea iniromotijaqui Garirea.

**32** Iroompaquea yaajianaqueneriquea shirampari carenisamaitori, aisa teeca

\* **7:27** Aapani Irioshi itigaranguimentaqueri Jesoshi incoraquetashijiaqueri ishiraerijia. Iriquetimegueti incavintsa jajiaqueme teeca irijorijoigueji, onquempevetaquempame yaapitsajitirigueti isheca chaajanquirijia irojoquitenemparigueti shiishipae.

inquenquetsamajavetempaji,      icantajiaqueri  
impamijiaqueriquea.

<sup>33</sup> Iriraquea Jesoshi itsipatanacariquea tijai teegueti inchoocajigueji tirorencashijiacarica, ariquea yoguijaachapaquitsitaro iguempitaqui, aisa ijavachapaquitsita ichagatsiqueru inenequi. <sup>34</sup> Ariquea ipaguitetanaquero inquitequi yaajencataquiti icanqueri: “¡Efata!” (oncanquequea: “¡Pishepirejanajempa!”)

<sup>35</sup> Irooquea icanquerigueti ariuea icotanaja ishepirejacotanaja, aisa itsire-carejanenetanaja iquenquetsamajatanaji.

<sup>36</sup> Iroompaquea icantajiacarejari Jesoshi maasano: “Aatoja picamantitsi.” Cotanquitsiquea arimpate itsavetantajianaqueroquea.

<sup>37</sup> Yamenamenaitanaquequea intati maasano icantajianaque: “Maasanoquea yantaqueca cameetsavaeque, iquemacajiaqueriquea teeca inquemavetempaji aisa inijacajairiquea macanavetatsica.”

## 8

*Jesoshi yoshequiavaequeroquea pan, ishecata-  
caajiacari 4,000 shirampari*

(Mt. 15.32-39)

<sup>1</sup> Iroompaquea yomporoguijaventaji-apojacariquea Jesoshi icaramirincavaeque caquintejia, icocaniquea isavicaventajiaqueri, niganquiquea iteroncacojianaca ishecajia, taampate irishecajiaquempaca. Ariquea icajemajiaqueriquea itsatacaanejia icanqueri:

<sup>2</sup> —Nopintsatacojianacariquea irirajia, namenaquequeate isavicaventajiaquenaquea

ocaniqui 3 savincaguiteri, niganquiquea  
 iteroncacojianaca ishecajia. Imaicaquea  
 imaica teequea onchoocateji taampaqueate  
 irishecajiaquempaca. <sup>3</sup> Arigueti non-  
 tigarancajiavetajempari iroaroaitanaje  
 itsovironaquitequi aajiaavaquerinishiatsi itaseane  
 quenavoquirontsiqui, iconoagarantajiacaquea  
 iquenaquenaivaepoji jmm osamani.

<sup>4</sup> Iroompaquea icanageriquea itsatacaanejia:  
 —Ocaniquiquea teequea quericaca  
 quintenitantemparone. ¿Ariquea querocampate  
 iraajiqueroquea ocaniqui pan irojocajia-  
 quenerica irishecajiaquempaca maasano  
 inquemantajianaquempacate?

<sup>5</sup> Icanqueriquea iriatimpa:  
 —¿Querocaquea ocarashequiaqueni pan  
 choocatanquitsica?

Icanqueriquea:  
 —Ocarati 7.

<sup>6</sup> Iroompaquea Jesoshi icantajiaqueri  
 maasano irisavisaviitaquequea quepatsiqui.  
 Yajiricajiaquero pan caratanquitsica <sup>7</sup>,  
 icantacovenquero: “Arioteesa.” Ariquea icotare-  
 jaqueroquea yojocajiaqueneri itsatacaanejia,  
 irioqueate jocajiaavaqueneriquea maasano.

<sup>7</sup> Ariquea chooca aisa mavipaquijaniquipaete  
 shima. Iriraquea Jesoshi icantacovenqueri:  
 “Arioteesa”, iroompaquea icantajiaqueri  
 itsatacaanejia irojocajiaqueneriquea maasano.

<sup>8</sup> Ishecajiaacaquea maasanojia, iquemajianaca.  
 Oraquea choocatapojajatsica iteguetajiroquea  
 itsatacaanejia cantiriqui, ocaratacovaetaji <sup>7</sup>.

<sup>9</sup> Maasano shiramparijia shecajianquitsica

icaramirincavaeque 4,000. Iroompaquea Jesoshi itigarancajajiri iroaroaitanajeta. <sup>10</sup> Iriatimpa itetanajaro quenajarontsi, itsipatsipaitanajari itsatacaanejia, yoajianaquequea irooshitacoquero Tarimanota.\*

*Iriraquea pariseojia icantajiavecari Jesoshi ironigaajiaquerime oacaantantatsica intati  
(Mt. 16.1-4; Irc. 12.54-56)*

<sup>11</sup> Ariquea icoraquecoraqueitashipojiriquea pariseojia iramenantajiguempari, icantantajia-pojacarica ironigaajiaqueri oacaantantatsica intati onquenantapojemparoja ontaniqui jenoqui inquitequi. <sup>12</sup> Iriraquea Jesoshi yaajencataquitiquea icanque:

—¿Querocaquea icojiacani choocajatsica imaica inintantajiacaca ironigaajiqueru oacaantantatsica intati? Arimaja noncantajiaquempi aatotari nonigaajiguiniritsi.

<sup>13</sup> Ariquea itsinampirejajianajiri, itetanajaro-quea quenajarontsiqui, imontemonteitanajaquea intatiqueroqui.

*Jesoshi itsavetacotsitaqueri itsatacaantane pariseojia iquempetacaacaro anempoacaguiroca pan*

*(Mt. 16.5-12)*

<sup>14</sup> Irirajia itsatacaanejia ipeacojianacaroquea pan irajaianaqueme irishecajiaquempameca, aparoca ochoocaque quenajarontsiqui.

<sup>15</sup> Iriraquea Jesoshi icanquequea:

---

\* **8:10** Oraquea Tarimanota irooshitacoquero Magarara.

—Aviatimpajia inchiquiojitaja pishecata-cojigarotsi anempoacaguiroca pan irashijia pariseojia aisa Erorishi.

<sup>16</sup> Irooquea iquemajavaquerogueti iquenquet-satavacaajianaca, icanque:

—Manatarite yamenajiacajiquea teetarite ameji pan, jero icantantajiacaca imaica.

<sup>17</sup> Iriraquea Jesoshi yamenajavaquerigueti iquenquetsatavacaajianaca, icantsitariquea:

—¿Querocaquea ococani piquenquetsa-tacotantajiacaroca pan, picanquequea manatarite namenaquempi teequea pameji pan? ¿Arimpate tequerata pinquemajigueji? ¿Tequerata pintsajigueji? ¿Ari quishoshirentajiaquempi? <sup>18</sup> Ochoocavecaquea poquijajia, ¿teequea pamenantajiguemparojo? Aisa piguempita, ochoocajiavecaquea ¿teequea pinquemantajiguemparojo? ¿Teequea pinquenquejajajeji? <sup>19</sup> Nocotarejaguequerogueti 5 pan, noshecatacaajiacari 5,000 shiramparijia, ariquea picapiocajajiroquea choocatajatsica, ¿querocaquea ocarashequiavaetajini cantiripae pitseraiquijiajiro?

Iriatimpajia icanquequea:

—Ocaratacovaetaji 12.

<sup>20</sup> —Oquejetacaquea aisa ocaratacovecaguetti pan 7, nocotarejaguequeneri 4,000 shirampari, iroompaquea pavijiguetajirogueti choocatajatsica, ¿querocaca ocarashequiavaetajini cantiripae pitseraiquijiajiro?

Icanqueriquea:

—Ocaratacotaji 7.

<sup>21</sup> Ariquea Jesoshi icanqueriquea:

—¿Tequeratampate pinquemajigueji?

*Jesoshi yamenacajairi shamponcajari  
Vetsairaqui*

<sup>22</sup> Ariquea yarejerejeitapojaca Vetsairaqui. Yamajitapojiniri shamponcajari, icantajitapojiri impamiteri. <sup>23</sup> Iriraquea Jesoshi yacatsavacotapanajantiri shamponcajari itsipatanacari ocaraguepojigueti tsovironaquipae. Iquishoajatsitari iroquiaqui, imavitepacotashitanacari ipamitaqueri icanqueriquea:

—¿Ari pamenaji?

<sup>24</sup> Yamenaveca icanque:

—Namenaguevecari caquinteja, iquempejiavecario inchato, cotanquitsi yanjinijiitanaque.

<sup>25</sup> Iquejetsitajariea aisa imavitepacotashitanajari ipamijaquitsitajari iroquiaqui, iroompa icampanajanta jac amenamajatanaji, peamajatanaja, conijamajatanaji maasanopae.

<sup>26</sup> Ariquea Jesoshi itigarancajiri itsovironaquitequi icantavaqueri:

—Aatoja poapanajantitsi gunteninintsiqui, picamantacotanatsi.

*Peerero icanque Jesoshi iriguenti Quirishitotsica*

(Mt. 16.13-20; Irc. 9.18-21)

<sup>27</sup> Ariquea yoanaquequea Jesoshi gunteninintsipaequi irooshitacoguetaqueroca gunteninintsi pajitatsica Sesarea Piripo, itsipatsipaitanacari itsatacaanejia. Oraquea quenavoquirontsiqui icoacojiaqueri:

—¿Taa ipaji ijijiaquena caquinteja? ¿Quero ican-tajiguini?

**28** Iriatimpajia icanqueri:

—Iconoagarantajiaca icantacojiaquempi:  
 ‘Irquenti Joancani Viñacajatantatsica.’ Itsipa  
 cantajiananquitsica: ‘Irquenti Iriashini.’  
 Itsipaquea cantajiananquitsica: ‘Irquenti itsipa  
 tsavetantatsicani.’

**29** Ariquea icanqueriquea:

—Aviatimpajia, ¿quero picantajiguini? ¿Taa non-  
 aque naatimpa?

Icantsitanaca Peerero:

—Aviguenti Quirishitotatsica.†

**30** Icanqueriquea:

—Aatojate picamantacotanatsi.

### *Jesoshi icamantsicaro irimetojaque*

(Mt. 16.21-28; Irc. 9.22-27)

**31** Ariquea Jesoshi iparianacaroquea  
 itsatacayaqueriquea itsatacaanejia  
 irantsipevaequempaquea irira Irijanite Caquinte.  
 Irimanintajiaqueriquea jivajjatsica, saserorotejia  
 anaantajianquitsica aisa tsatacaantajiguiroca  
 itioncacotanaqueca Moishishini. Ariquea  
 irimetojajiqueru, cotanquitsiquea aapoja-  
 jempagueti 3 savincaguiteri impochatanaje.  
**32** Yuguiconejamajataqueneri. Irooqua  
 iquemaquegueti Peerero itsipatanacari tijai  
 icantomajitsivetari. **33** Cotanquitsiquea Jesoshi

---

† **8:29** Quirishitotatsica. Iguenquetsatsarequi guiriegojia ican-  
 quegueti Christos (Quirishito) manaquea ocanque “Ishaguiji-  
 taqueca” aisa “Icoguiaqueca”, irishaguijitaqueritari orejiqui orivo  
 irirajia icoguijiaqueca impeaquempa imajirojiate irooca isas-  
 eroretejiate. Irira Quirishito riotaquequea itsavetacotsitacaca  
 tsavetantajjatsica coramanitica intigarancaque Aapani Irioshi im-  
 peaquepaniji Imajirojiate maasano.

ipitsocanaca yamenanaqueri itsatacaanejia,  
ariquea icantomajitsitari Peerero, icantsitari:

—¡Poanaqueshinete, Satanashi! Teetarite  
pinquenquejacomajateroji inintaguequeca  
Aapani Irioshi, iroguentiquea piquenquejacogue-  
quequea iquenquejaguética caquinte.

<sup>34</sup> Ariquea icajemajiajiri omporoguijajianquit-  
sica oraniqui aisa itsatacaanejia icanqueriquea:

—Quericaca nintanquitsineca iroguijataco-  
quena irovashiantanaqueroja inintashigueve-  
tacaca iriatimpa, irinatashitapiniquempa  
inchapoa irompajacotantajiquemparica,  
mananiji iroguijatacoquena. <sup>35</sup> Quericaca  
teeca irininteji irantsipeventena irooca  
irimetojavenquena, manaquea impeaquempa;  
cotanquitsiquea iriraquea atsipevenquenaneca  
aisa irantsipevenquemparogueti Quenquet-  
satsarentsi Oganejencatatsica tsavetanta-  
quenaca irooca irimetojavenquenaequa,  
incoquempaniquea inchoocaguiteni. <sup>36</sup> Arigueti

inchoocavetaquempa agavejanquitsineca  
irashinquemparo maasanopae quepatsi-  
paequitica, cotanquitsiquea oncoraman-  
itapoajegueti irimetajanajegueti arigueti  
impeaquempa camorecariqui, ¿arimpate  
agavejaque irajaararo aavajeri? Aatoquea  
agavejitsi. <sup>37</sup> Irashintamajavequemparoqua  
maasanopae, cotanquitsiquea aatoquea  
yagavejitsi irivegaraventavaquempa aatonijite  
yoguitsi camorecariqui. <sup>38</sup> Quericaca  
pashiventacaaquenaneca naatimpa aisa  
nocantaguequeca inchoocatimojiaquerigueti  
caquinteja caarica quisho oamajatiri

Irioshimajaca, irirajia covaeguisherijia, ari inquejetaquempaquea irira Irijanite Caquinte impashiventacaapojaquempariquea iriatimpa oncoramanitapoajegueti incoraquetajegueti. Iroganejencapojaquempaquea, inquempetapojaquempari Iriri, intsipatsipaitapojaquempari ashivantijite comajashirentanquitsica.

## 9

<sup>1</sup> Aisa icanqueriquea:

—Noncanquempija arimajaguitatsi iconoagarantaca catintiitimojiaquenaca imaica, aato imetoji tequeratagueti iramene quero icotani Aapani Irioshi imajirontagueti, ironigaimojiaqueriquea iragavejane.

*Jesoshi icantashitatiiimojiacariquea  
itsatacaanepae*  
(Mt. 17.1-13; Irc. 9.28-36)

<sup>2</sup> Ariquea anaananajagueti 6 savincaguiteri iriraquea Jesoshi yoanaque ontaniqui otsempiqui yagatsonquivaaetanaquequea osamani. Iriguentiquea itsipatsipaitanaca Peerero, Santiago aisa Joanca. Tee inchoocateji itsipajia. Iroompaquea taampina iriatimpajia yamenitsijigariquea Jesoshi icantashitatiiimojianacariquea. <sup>3</sup> Ariquea octanaca iitsaare ocavorejatanaquequea ocantashitatianaca tsiren oquitamaromajatanaquequea ocanca quempetacaqueate oquitamarotigueti sharaca, teequea iramenimajiteroji quitsaarentsi oguitamaroca yajacajitirogueti acaniqui quepatsiqui onquempetaquemparo iroatimpa.

<sup>4</sup> Yamenitsijigari Iriashini aisa Moishishini itsipatsipaitacari Jesoshi iquenquetsatavacaajiaca.

<sup>5</sup> Irira Peerero icanqueriquea Jesoshi:

—Tsatacaantantatsica, cameetsavaeque achoocajiaque ocaniqui. Intsishiatsi nompeacaguempaja 3 catisetarentsi, aparo pashinquempa aviatimpa, aparo irashinquempa Moishishi, otsipaqua irashinquempa Iriashi.

<sup>6</sup> Teetarite intstateji querocaca incanquemeca, mana itsaroajianaquetari. <sup>7</sup> Iroompaquea omararotacojiapojajiri, ariquea iquenquetsajencajitanaque omararosecanquegueti icanque:

—Iricatica irio Irijani, nopintsamajatacaca. Pinquemisantamajajiguerija.

<sup>8</sup> Ariquea yamenitsijavetaja aisa cajaraguiteni, aparo icatiaja Jesoshi. <sup>9</sup> Ariquea icoraquecoraqueitaji yoguirincabajiaja, iriraquea Jesoshi icanqueriquea:

—Aatotaja quericaca picamantitsi oratica pamenajiaqueca imaica. Intancorejanajegueti Irijanite Caquinte irimetojavetaquempagueti, ariquea pintsavetacotsijiguemparoquea.

<sup>10</sup> Iriatimpajia teequea quericaca incamanteji, manaquea icantavacaajiaca:

—¿Oraquea icanquegueti: ‘intancorejanajegueti Irijanite Caquinte irimetojavetaquempagueti’, taaquea icantacotaque?

<sup>11</sup> Ariquea icoacotsijijaari Jesoshi:

—¿Quero ocotacani icantantacaca tsatacaantajiguiroca itioncacotanaqueca Moishishini icantajiaquegueti iriquetitaquea coraquetajatsine Iriashini?

<sup>12</sup> Iriatimpá icanquequea:

—Arimajaca ocanque Itioncacaantaqueca Aapani Irioshi iriquetitaquea coraquetajatsine Iriashini, irinetsanaguequeroquea maasano. Cotanquitsiquea oraquea itioncacojiquerigueti Irijanite Caquinte, ¿quieroquea ococani ocanquegueti irantsipevaequempaquea, aisa incatsimajiqueriquea? <sup>13</sup> Imaica noncamanquempi jac icoraquetaquiti Iriashini, cotanquitsiquea mana yantaguishejitaqueri maasano intintajitaqueca. Ariquea ocanque Itioncacaantaqueca Aapani Irioshi coramani itsavetsijitaroni.

*Jesoshi yogueshitajiri chaajaniquitirajaca, yoguisotoajiniri ampatsini  
(Mt. 17.14-21; Irc. 9.37-43)*

<sup>14</sup> Ariquea yarejerejeipojaja ichoocajiaquegueti itsipajia itsatacaanejia, yamenajiapoajiri yomporoguiaventajari, aisa ichoocajiaque oraniqui tsatacaantajiguiroca itioncactanaqueca Moishishini itsipatsipaicariequa iquenquetsatavacaajiaca, irooquea icanque irooquea icanque. <sup>15</sup> Yamenitsijiavajariquea icoraquepojaji Jesoshi ariquea icojianaca yamenamenaitanaquequea intati. Maasanojia itacorojaijanaca iquenquetsatacaaajiavajiri.

<sup>16</sup> Iriatimpa icanqueriquea:

—¿Taaquea piquenquetsaventajiaqueca?

<sup>17</sup> Iquenquetsatanaquequea aparo, icanqueri:

—Tsatacaantantatsica, namavequempiri irijani ishaquiacaca ampatsini, imacanat-acaaqueri. <sup>18</sup> Querocagueti ichoocaueni yaacotapojaquerigueti ariquea ipijempejacaacari

ishimotyonajavaetanaque, yatsicayajitanaca,  
iroompaquea aratsiquijini. Nocantajiavecari  
pitsatacaanejia iroguisotojaquerime,  
cotanquitsiquea teequea iragavejajigueriji.

**19** Icantanaquequea Jesoshi:

—¡Arisa picomirincajiga teequea paventem-  
paroji iragavejane Aapani Irioshi! ¿Queroca quea  
oncarashequiavaeteni nosavicaventajiaquempi?  
¿Queroca oncarashequiavaeteni nantsipeta-  
cojiaquempiquea? Iroosacanica iiintsija  
pamajiaquenarijate ocaniqui.

**20** Yaajianaqueneriquea. Iriraquea  
ampatsini yamenavaquerigueti Jesoshi, ariquea  
icotanaca icantacaanaqueri tinquininini,  
ariquea itejanaquequea isavi quepatsiqui,  
itigaritigarivaetanaca tigaririri tigariri,  
ishimotyonajavaetanaque. **21** Iriraquea Jesoshi  
icanqueriquea iriri:

—¿Queroca quea ocaratanaqueni yajagantsitaco-  
taca ishaquiacarigueti ampatsini?

Iriatimpa icanque:

—Jac yoshequiacovaetanaquequea, ishaquit-  
sitacaritarite coramani chaajaniquitirajagueti.  
**22** Oconoaca manaquea yomposacaacariquea  
paamaripoquiqui, oconoaca yomposacaacari  
ojaquiniqui irimetojaquerime. Imaica quea  
arigueti pagavejaque aviatimpa, iiintsija pimp-  
intsatacojiguenashiatsi pamitacotenarishiatsi.

**23** Icanqueriquea Jesoshi:

—¿Queroquea ococani picanquenaquea:  
'Arigueti pagavejaque'? Quericaca  
aventamajaquemparineca Aapani Irioshi  
iragavejaqueroquea maasano.

**24** Iririjencavaetanaque iriri chaajaniquiri, icanque:

—Naventavecariqueate. Pagavejacaguenaja naventamajataquemparinijite.

**25** Ariquea Jesoshi yamenajiavaquerigueti ishiashiaitashipojacari icaramirincavaeque caquin-teja, icantomajitsitari ampatsini, icanqueri:

—Aviguenti cotacaacari, teeca inqueman-tempaji aisa teeca inquenquetsatantempaji. Imaicaquea noncanquempi pisotoanajerijate, povashiantanajerija iricatica, aatoquea picoraquetimatajitsi pishaquiajempari.

**26** Iriraquea ampatsini ariquea icotanaca icajemanaquequea jeeee, icantacaanaqueri tinquininini, isotoapanajantiri yovashiantanajiri joquijitsantsataca quempeniquea imetojaque, iconoajicaquea icantantajiacaca:

—Metojaque.

**27** Cotanquitsiquea Jesoshi yacatsava-coqueriquea yoguitinajaqueri, ariquea icotanaja icatianaja. **28** Arikea yoanaji Jesoshi tsovironaqui qui, itsipatsipaitanajari itsatacaanejia, iriguenti choocajiajatsi, icoacotsijiapojaxari:

—¿Querote ococani naatimpajia caarica nagave-jantajigari noguisotoitajigueriji?

**29** Iriatimpa icanqueriquea:

—Iriraquea ampatsini quempecarica imaica aatogueti iroquetitaquea pamanajiguiritsi Aapani Irioshi aisa aatogueti pisanticotiro

pisheca,\* aatoquea pagavejimajiguitsi  
poguisotojaiaqueri.

*Jesoshi icamantsitajariquea irimetojaque*  
(Mt. 17.22-23; Irc. 9.43-45)

<sup>30</sup> Ariquea yoanaji Jesoshi icantanaca Garireaqui. Teequea irininteji iramenajitavaqueri, <sup>31</sup> ininquietarite intsatacaa jiaqueriquea itsatacaa nejia. Ariquea itsataca jiaqueriquea, icanqueriquea:

—Iriraquea Irijanite Caquinte iraacaantajiqueru, irajaiavaqueri caquintejia, ariquea irimetoja jiaqueri, cotanquitsiquea aapojajempagueti 3 savincagüiteri intancorejanaje.

<sup>32</sup> Iriatimpajia teequea intsajaiavaqueroji icanqueca, cotanquitsiquea omintsaroanaqueri incoaco jiaquerime taa opaji icanque.

*Quericaca anaamajatantanquitsineca*  
(Mt. 18.1-5; Irc. 9.46-48)

<sup>33</sup> Oraquea yarejerejeipojacagueti Caperenaoqui yoayoaitana quequea tsovironaquiqui, iroompa quea irira Jesoshi icanqueri itsatacaa nejia:

—¿Taa opajita picantavaque picantavaque incajaranquitica quenavo quirontsiqui?

<sup>34</sup> Cotanquitsiquea iriatimpajia imativicajiana que, yamenajia quequea iroguenti icantavaque icantavaque quericaca caavijica yanaanta que. <sup>35</sup> Iriraquea Jesoshi isavicanaque que, icajemajiaqueri itsatacaa nejia carajanquitsica 12, icanqueriquea:

\* **9:29** Oconoaca paperi iroquetinica tee oncanteji ocaniqui: aisa aatogueti pisanticotiro pisheca.

—Quericagueti nintanquitsineca iranaantaque aato yaventacotatsi, inchiquioji iriatimpa iramiji-aqueriquea maasano.

<sup>36</sup> Ariquea yaitsitaquea aparo chaajaniquitantsica yogatiimojiaqueriquea itsatacaaneja, ariquea yatsomaitsitari icanqueri:

<sup>37</sup> —Quericaca shineeventavaquemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineeventavaca. Quericaca shineeventavaquenane naatimpa, aatoquea aparo naatimpa ishineeventavaca, irioquea aisa irishineeventavaquempa tigarancaquenaca.

*Quericaca teeca incatsimajiji iroguenti itsipatacaji*

(Mt. 10:42; Irc. 9:49-50)

<sup>38</sup> Ariquea icanqueri Joanca:

—Tsatacaantantatsica, chapinqui qui namenajiaqueriquea aparo yoguisotoqueriquea ampatsini, iroguentiquea yaventashicari pivajiro. Cotanquitsiquea naatimpajia nocantimentajiaqueriquea, namenajiaqueriqueate teetarite intsipatsipaitjinica.

<sup>39</sup> Icanquequea Jesoshi:

—Imaica aatitarite picantimentajiguiritsi. Quericagueti pamenajiaqueca avenquemparoneca novajiro ironigaantaquerogueti oacaantantatsica intati, iriatimpa aatoquea taampina itsipatavajirotsi incantimanatavajenaquea. <sup>40</sup> Quericacatari teeca incatsimataji iroguenti itsipatacaji. <sup>41</sup> Quericaca cavintsa-jaquempine jocacotaquempine oja pimiraqueca

iroorijite nonintacaantaquero naatimpa,  
inquenquejaquegueti: 'Irrioriji irashi Quirishito',  
arimaja aato opeapitsatari irinejacotajempa.

*Caaviji incatsimatimentamajajiquer  
covaeguishetacaantantanquitsineca  
(Mt. 18.6-9; Irc. 17.1-2)*

<sup>42</sup> "Taacagueti covaeguishetacaaqueemparineca  
aparo chaajaniquiri quejejiacarica iricajia  
tsaroventaqueraneca, incatsimatimen-  
tamajajitaqueriquea. Irootaquequea  
nontsatacaantajiaqueempiroca aatonijite  
iquejejitiritsi imaica, iroquetitamequea  
intsatotacojiquenerime itsanoqui iniroshimen-  
tapiri itononcantajitaca, irajaitanaqueriquea  
impishoncajatsijitempariquea inirojaniqui  
quentijani. <sup>43</sup> Nonquejetacaajiaquempiroquea  
imaica: arigueti oncovaeguishetacaaqueemp  
paco, pincaratsitemparoquea. Cameetsavetaca  
pimpeaquempa tsatiavacori pichoocatigueti  
acaniqui quepatsiqui, aatoniji mavitepacoti-  
rajampigueti ipishoncajitimpi camorecariqui  
aatoca otsivaquitsi. <sup>44</sup> Ontaniquiquea aato  
imetojitsi igueni aisa aato otsivaquitsi paamari.  
<sup>45</sup> Aisa iroogueti covaeguishetacaaqueempine  
piguiti, pincaratsitemparoquea. Cameetsavetaca  
pimpeaquempa tsatiaguitiri pichoocatigueti  
acaniqui quepatsiqui, aatoniji maviteguititi-  
rajampigueti ipishoncajitimpi camorecariqui.  
<sup>46</sup> Ontaniquiquea aato imetojitsi igueni  
aisa aato otsivaquitsi paamari. <sup>47</sup> Aisa  
iroogueti covaeguishetacaaqueempine poquija,  
pintaguirorejaatsitempa. Cameetsavetacaquea

apaoquivetaquempi pinquijapoja jegueti  
 imajirontagueti Aapani Irioshi, aatoniji  
 mavioquivetimpigueti impishoncajitaquempi  
 camorecariqui.<sup>48</sup> Ontaniquiquea aato  
 imetojitsi igueni aisa aato otsivaquitsi  
 paamari.<sup>49</sup> Maasanojiaquea osocapojempari  
 paamari, quejetaca icachoanejitirigueti viratsi  
 imetojajitinirigueti Aapani Irioshi.<sup>† 50</sup> Oraquea  
 incachoanepane cameetsavaeque, cotanquit-  
 siquea ariguetija omasancategueti, ¿querocampate  
 incojitajeroni incachoanetantajitajemparo?  
 Pinquejetemparoja incachoanepane cameetsa-  
 tatsica, aisa pinconoavacaamajaquempaja."

## 10

*Icanque Jesoshi aatoja quericaca vashiantirotsi  
 imanquigare*

(Mt. 19.1-12; Irc. 16.18)

<sup>1</sup> Ariquea isotoanaque Jesoshi, yoanaquequea Joreaqui aisa intatiqueroqui Jororane. Iroompaquea yarejetapojacagueti yomporogu- ijajiajavempojacariea aisa icaramirincavaeque caquinteja. Ariquea itsatacayaqueri iquempetapiniquerogueti.

<sup>2</sup> Ariquea iconoagarantajiacaquea pariseojia icoraquecoraqueipojaque icoacojiapojaqueri iramenantajiaquempariniji, icantajiapojaqueri:

---

† **9:49** Chooca mavite ocantacoqueca ocatica. Maasano teeca intsaroventempari Aapani Irioshi iroanaque camorecariqui. Iri- oquea aisa ocantacoque tsaroventarica Quirishito irantsipevaa- tanaquempa acaniqui quepatsiqui impishoncamajatanajeroniji quempevaetagantsi.

—¿Arite icantimentantajitiro irovashi-anterogueti shirampari imanquigare?

<sup>3</sup> Iriatimpa icanqueriquea:

—¿Querocampate icanqueni Moishishini itioncatacotaquerogueti?

<sup>4</sup> Iriatimpajia icanquequea:

—Iriraquea Moishishini ishinetsitari arigueti irovashiantanajero shirampari imanquigare, irojoquitenemparojate paperi otioncacagueta yovashianquero,\* ariquea intigaranquitsitemparo oanaje.

<sup>5</sup> Icanque Jesoshi:

—Iriraquea Moishishini manatarite yamenajiaquempiquea quishoshirentavaequeMPI, jero iquejetacaanquempiroca imaica itioncanquempiroca. <sup>6</sup> Cotanquitsiquea iroaqueragueta ipeacaaguecarigueta quea Aapani Irioshi maasanopae, ‘ipeacaacariquea shirampari aisa manquigarentsi.’<sup>7</sup> <sup>7</sup> ‘Irootaquequea imaica shirampari intsinampirejanaqueriqueate iriri aisa iriniro, quisho iroamajataquero imanquigare,<sup>8</sup> apatsinoroquea incantanajempa. Ariquea iroaqueragueta quea tequeratagueta irimanquigatempoji, mavite icarajiavetaca, ariquea imanquigacarogueti ariqueate icojianaca tee irimavitetajeji, quempetanajaqueate apatsinoronica icantaja.’<sup>9</sup> <sup>9</sup> Jeroquea imaica

---

\* **10:4** Oratica paperi icanquero quimajareri certificado de divorcio (irooca aisa carta de divorcio). Iroguenti paperi itioncijkenagueta quejecaroca: “Imaicaquea novashiantajiro nomanquigavetacaca, aato nomanquigatajaro.” (Pamenero Os. 2.2 aisa Ireo. 24.1-4.)   <sup>8</sup> **10:6** Jen. 1.27.   <sup>9</sup> **10:8** Jen. 2.24.

oraquea itsipatacaantacaca Aapani Irioshi, aatojate itsiparejajiro caquinte.

<sup>10</sup> Ariquea yoayoaitanaji tsovironaquiqui icoacomajajiaqueriquea itsatacaanejia. <sup>11</sup> Iriatimpa icanqueriquea:

—Quericaca ovashianqueroneca imanquigare manquigatajemparoneca otsipa, manaquea icovaeguisheca yaimentacocaro iroquetica. <sup>12</sup> Ariquea oquempetaca, iroogueti manquigarentsi ovashiantanaquerineca manquigataroca manquigatajemparineca itsipa, manaquea aimentacari.

*Jesoshi yamanacoventajiaqueri chaajaniquirijia*

(Mt. 19.13-15; Irc. 18.15-17)

<sup>13</sup> Iroompaquea icoraquecoraqueitaquequea itsipapae yamajiapojiniriquea Jesoshi chaajaniquiripae impamijiavaqueriniji. Iriraquea itsatacaanejia yamenajiavaquerigueti yamajiaquenerigueti, icantomajavaqueriquea.

<sup>14</sup> Cotanquitsiquea yamenaquegueti Jesoshi, os-emacaaquitari icanqueriquea:

—Ariotaquetsija incoraquetetate chaajaniquirijia naatimpaqui, aatoquea pojocaavaca, ishineventajiacaritarite Aapani inquitequitica irimajirontacotaquempari quenquejajitsica quempecarica iriatimpajia.† <sup>15</sup> Iroomajaca noncantajiaquempica: quericaca nintan-quitsineca impejaeri Aapani Irioshi Imajirote

---

† <sup>10:14</sup> Irirajia chaajaniquitanquitsica tee iraventacojiguempaji, mana ishineventajapojacari Jesoshi, iquemisantajiaqueri. Ari anquempejiaquempaquea aatimpa.

inquempetajempariquea chaajaniquitirajaca.  
Oraquea aatogueti iquempetaritsi, aatotarite  
iconoapojajari maasano peajiaquerica Imajirote.

<sup>16</sup> Iroompaquea inajiaqueriquea chaajaniquiripae, ipamijiaqueri yamanacoventajiaqueri incav-intsajamajajiaquerinijite Aapani Irioshi.

*Ajaarantavaetatsica*  
(Mt. 19.16-30; Irc. 18.18-30)

<sup>17</sup> Oraquea yoanajigueti Jesoshi yameniri ico-raquepoji irira caquinte ishiashitapojacariequea iguerovempojacari icanqueri:

—Tsatacaantantatsica cameetsari, ¿quieroqua noncoquempani cameetsanijite noncoguitempaninijite nonchoocaguiteni?

<sup>18</sup> Icanqueri Jesoshi:

—¿Quieroqua ococani picantantaquenaca ‘cameetsari’? Teequea inchoocateji cameetsari, aparo icoca Aapani Irioshi. <sup>19</sup> Pitsaqueroquea maasanopae itioncacotanaqueca Moishishini, ocanquequea: ‘Aatoja pimetojanti, aatoja poashitiro manquigarentsi, aatoja paitsitanti, aatoja pitsojeacotantimatatsi, aatoja pamatavijantitsi, pinquenquejacameetsatacoquerija piri aisa piniro.’

<sup>20</sup> Iriatimpa icanqueri:

—Tsatacaantantatsica, aritarite noquempetaca imaica, noparianacaroquea nonetsanamajatana-queroquea maasano nochaajniquipojigueti narejevaecaro imaica.

<sup>21</sup> Yamenitsitanacariequea Jesoshi ipintsatacotanacariequea icanqueri:

—Imaica apanivani poanaquequea pojocantaguetanaqueroquea maasanopae pashintaguecaca, paantajiaquemparoquea imentaquipae pojocajiaqueneri coguitejacojianquitsica, pinquejetaquerogueti onchoocataje oganejencaro shinetacajaempineca ontaniqui inquitequi. Ariquea pincoraquetajeja poguijatanaquena.

<sup>22</sup> Iquemitsitaroquea icanquerica ariquea octanaca otsimeteitacaanaqueri, ariqueate yoanaji, ishimampojancavaetanacaquea, iriguentitari ajaarantavaetatsica. <sup>23</sup> Iriraquea Jesoshi yamenajiaqueriquea maasanopae, ariquea icantajiguiri itsatacaanejia:

—¡Omanapitsamajataquempariquea ajaarantavaetatsica inquijanaque imajirontagueti Aapani Irioshi!

<sup>24</sup> Irooqua iquemajiaquerogueti icanqueca, yamenamenaitanaquequea intati itsatacaanejia. Yapijitajiroquea Jesoshi icanque:

—Nirijanijiate, omanapitsamajataquempari inquijanaque imajirontagueti Aapani Irioshi iriraquea aventaroca irajaararo. <sup>25</sup> ¿Arimpate iragavejaquequea cameyo inquijanaquequea itepoquiqui quisaatonquiri irisotoanaqueriquea antaqueronta? Aatoquea yagavejitsi. Iriompaquea ajaarantavaetatsica caaviji anaaquero omanapitsataquempari inquijanaque imajirontagueti Aapani Irioshi.

<sup>26</sup> Iquemitsijigari itsatacaanejia arimpaqueate yamenamenaitanaque intati, icantavacaajiaca:

—Iroosacanica, ¿quericampate agavejanquitsineca iraavajempa?

**27** Yamenajianaqueriquea Jesoshi ican-queriquea:

—Iriraquea caquinte teequea iragavejeroji, iriguentiquea Aapani Irioshi agavejatsi, yagavejaquerotari maasanopae.

**28** Iroompaquea icantanaque Peerero:

—Nomajirote, naatimpajia novashiantajiana-quieroqua maasanopae nashintaguecaca, nogui-jaguijaitanaquempi.

**29** Icanque Jesoshi:

—Iroomajaca noncantajiaquempica, quericaca vashiantajianaqueroneca itsovironaquite, irioca iriguentijeguitepae, itsijoitepae, iriniro, iriri, irijanijiate, irooca iniganquitejire, cameetsanijite irisavicavenqueroqua notigaranquimenquerica intsavetantimojianaqueriquea itsipapae intsatacaa jiaqueriquea Quenquetsatsarentsi Oganejencatatsica, **30** irojocajitajeneriquea otsipa itsovironaquite ocaniqui quepatsiqui oshequiavae quequea aricaca oncaravae-quequea 100, aisa inchoocajiaque itsipapae iriguentijeguitepae, itsijoitepae, iriniropae, irijanijiate, iniganquitejire. Cotanquitsiquea incatsimatimentajiqueru iramenajiquerigueti itsarovenquenaquea. Oncoramanitapoja-jegueti incoguitempaniquea iranijaguiteni.

**31** Icaramirincavae quequea yamenajivetacaca imaica yanaantavae que, cotanquitsiquea oncoramanitapoja jegueti aatoquea yanaantajitsi. Aisa icaramirincavae que teeca iranaanteji imaica, oncoramanitapoja jegueti iranaantavaetanaque.

*Jesoshi icamantajajiri aisa irimetojaque  
(Mt. 20.17-19; Irc. 18.31-34)*

<sup>32</sup> Ariquea iriatimpajia ishivoquishiv-oquiitanacaroquea quenavoquirontsi itoncotoncoitanaque iroaroaitanaquequea Jerosarequi. Iriquetitaquea oananquitsi Jesoshi, iriraquea itsatacaanejia yoguijaguijaipojiri, yamenamenaitanaquequea intati. Itsipajia guijajianaquerica itsaroajianaquequea. Ariquea yapijitajiro Jesoshi itsipajianajari tijiacoñaji itsatacaanejia carajianquitsica 12, ariquea iparianacaro icamanqueri querocaca incojiquerini ontaniqui Jerosarequi. <sup>33</sup> Icanqueriquea: “Imaicaquea antoncotoncoitanaque oa-hoaitanaque Jerosarequi. Ontaniquiquea ontaniqui arejerejeiquempagueti manaquea iraacaantajiquerri irira Irijanite Caquinte, irajaitanaqueri ichoocajiaquegueti saserorotejia anaantajianquitsica aisa tsatacaantajiguiroca itioncacotanaqueca Moishishini. Iriatimpajia incanquequea: ‘Intsishiatsi irimetojajiterini.’ Ariquea irajaitanaqueriquea ichoocajiaquegueti teeca irijorijoigueji irimetojacaanqueriquea.

<sup>34</sup> Iriatimpajia irantanaguishevaequeri, inquishoquishoavaequeri, aisa impasapasaiqueri agompiaquitempari. Ariquea irimetojajiaqueri, cotanquitsiquea aapojajempagueti 3 savincaguiteri intancorejanaje.”

*Inintajiaavecaca Santiago aisa Joanca  
(Mt. 20.20-28)*

<sup>35</sup> Ariquea iquempejiquempejiipojiriquea Santiago aisa Joanca, irijanijiate Severeo,

icanqueriquea:

—Tsatacaantantatsica, nonintajiaque pinetsanamajajiaqueroquea noncantajiaquempica imaina.

<sup>36</sup> Iriatimpa icanqueriquea:

—¿Taate opajita pinitajiaque nantempica?

<sup>37</sup> Icantajiaqueri:

—Aapoajempagueti pimpeaquequempagueti Imajirojiate maasano, nonintajiavecquea poguisavisaviitaquena nosenampijajiaquempi, aparo savicanquitsineca pitincamijempequiqui, aparo pishinampijempequiqui.‡

<sup>38</sup> Cotanquitsiquea Jesoshi icanqueriquea:

—Teequea pintsajigueroji ocatica pinitavecaca. ¿Arimate pagavejajiaquequea aviatimpajia pimire nomiraquempaca naatimpa? ¿Arimate pagavejajiaque povíñacajatacaantantaquemparo noviñacajatacaantantaquempaca naatimpa?§

<sup>39</sup> Iriatimpajia icanqueriquea:

—Jeejeguitatsi nagavejaquempa.

Icanqueriquea Jesoshi:

—Pitampaticamajataquero pimira-  
queroquea nomiraquempaca naatimpa,  
arimaja povíñacajatacaantantaquemparo

‡ **10:37** Irira savicatsica itincamijempequiqui majirontatsica yanaajajiaqueri itsipajia, iquejemajirovecari majirontatsica, aisa iquejetaca savicatsica ishinampijempequiqui, iquejemajirovetajari. § **10:38** Ocaticaquea icanqueca Jesoshi manaquea iquejetacaacaro irantsipequempagueti, oquejetaca incanquegueti: “¿Arimate pagavejajiaquequea aviatimpajia pantsipevaequempaquea pinquempejiaquenaquea naatimpa nantsipevaetaquempagueti?”

noviñacajatacantantaquempaca naatimpa.\*  
**40** Cotanquitsiquea teequea naatimpa cantatsineca quericaca senampijaquenaneca savicanquitsineca notincamijempequiqui aisa noshinampijempequiqui. Iriguentiquea cantanquitsica Aapani Irioshi paesatoniqui iroaqueragueti.

**41** Ariquea iquemajiavaquegueti itsipajia 10 it-satacaanejia itijerequijianaqueri Santiago aisa Joanca. **42** Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejaiaqueca imajirojiate teeca irijorijoigueji manaquea yatsanavaecari igonorojia, ariquea iquempejiaca iramajirorejia yomperaperacari irashijia. **43** Cotanquitsiquea aviatimpajia aatoquea piquejejiga. Ariguenti quericaca nintanquitsineca iranaantimojiaquempi, impeitsitempaja amijiguempineca. **44** Quericaca nintanquitsineca irijivatante, impeitsitempaja iromperare maasano. **45** Quempecaquea Irijanite Caquinte teequea irooquea incoraquetashiteji iramijitavaqueri, iroguenti icoraquetashique incavintsajantapoje, aisa irimetojaventsitempariquea maasanojia, onquejevequempaquea irivegaraventajajeneri irisotoimentajianajeniji santanatacojiavetanquitsica.

*Jesoshi yamenacajairi shamponcajari*

---

\* **10:39** Iquempetacaacaro Jesoshi, quejetacaquea incanquegueti: “Pitampaticamajataquero pantsipevae-quempaquea pinquempejiaquenaqueate naatimpa nantsipevaetaquempagueti.”

*Varitimeo*

(Mt. 20.29-34; Irc. 18.35-43)

<sup>46</sup> Iroompaquea yarejetapojacaroquea Jesoshi Jericoqui, itsipatsipaitapojacariquea itsatacaane. Oraquea yoanajiguetiquea arimpaqueate yoshequiaavaetanaquequea oguijaguijaitanaquerica. Ariquea oraniqui ocaravoquitapojigueti quenavoirontsi isavicaque shamoncrajari pajitatsica Varitimeo, iriguentiquea irijanite Timeo. Iriatimpaquea iroguenti isavicaventi yamanantagueti imentaquipae. <sup>47</sup> Irooqua iquemacoquerigueti coraquetapojishiatsi Jesoshi Nasarequitica, icajemitsitanacaquea iririjencatanaque, icanque:

—¡Jesoshii, Ichoviquitanaqueca Taavini, pimpintsatacotenashiatsi!

<sup>48</sup> Icantomajajaqueriquea oshequini, icantsi-javetari irisanticotanaque, cotanquitsiquea iriatimpa arimpaqueate icajemamajatanaquequea:

—¡Ichoviquitanaqueca Taavini, pimpintsatacote-nashiatsi!

<sup>49</sup> Icatiapojaquea Jesoshi icanque:

—Iintsijate pincajemerijate.

Icajemitsari shamoncrajari icanqueriquea:

—Iintsija, imaica pishinevaetanajempaja, pin-catianaje, icajemaquempiqueate.

<sup>50</sup> Icatiitsitanaca ipishoncapanajantiroquea isavotacaca ishiashitanacariquea Jesoshi.

<sup>51</sup> Icantavaqueri Jesoshi:

—¿Taa opaji pininque nantaquempiro?

Ianti shamoncrajari:

—Tsatacaantantatsica, noninque namenaje.

<sup>52</sup> Icanqueriquea Jesoshi:

—Iintsija poanaje, pitsaquetarite nagavejaque namenacaajempi, paventantaquenaca, irootaquea pamenantanajaca.

Ariquea icotanaca amenaji, yoguijatanajiri quenavoquirontsiqui.

## 11

*Yarejetapojacaroquea Jesoshi Jerosarequi  
(Mt. 21.1-11; Irc. 19.28-40; Jn. 12.12-19)*

<sup>1</sup> Iroompaquea irooshipojigueti irarejerejeipojemparo Jerosare, yarejerejeipojajaroquea Vetepaje aisa Vetania Orivotsempiqui. Ariquea iriraquea Jesoshi itigarancajiaqueriquea mavite itsatacaane icantajavaqueriquea:

<sup>2</sup> —Poanaquequea ontaniqui quempeji guintenintsiqui, ariquea pamenajiapojeri aparo aashino irijanigantirenajaniqui shiticacotaca, tequeratatirajaquea irishiashiavijitacotantajtempariji. Pishiticarejacojianaqueri pamaji-aquenarija. <sup>3</sup> Choocagueti cantajiaquempineca: ‘¿Querocampate pincojiaquerini?’ Aviatimpajia pincantajiguéri: ‘Iriguenti coacotacari Amajirote, taampinatari iroguijapajempiri.’

<sup>4</sup> Ariquea yoayoaitanaquequea yamena-jiapojeriquea shiticacotaca tsovironaquiqui sotomorontsiqui ocaravoquitapojigueti quenavo-quirontsi, ariquea ishiticarejacojiaqueriquea.

<sup>5</sup> Iriraquea choocajianquitsica oraniqui icanqueriquea:

—¿Querocaqueate pincojiguerini? ¿Taaquea pishiticarejactancarica aashinogantirenajaniqui?

**6** Icantanaqueriquea iriatimpajia icantajiaava-querica Jesoshi, ariquea ishinejiaqueneri iraa-jianaqueneri.

**7** Ariquea yaajianaqueriquea yamajiaque-neriquea Jesoshi, ipashicamititsajiaqueneri iitsaarepaequi, iriatimpa isavicitanacari ishiacotantanacariquea. **8** Irirajia tiroren-caventajiacarica iconoagarantajiacaquea yovemaroncaashijiavaqueri iitsaare quenavo-quirontsiqui, itsipapae aavashijiavanquitsica ovashi ivemaroncaashijiavaqueriquea.\*

**9** Irirajia iriquetica oahoitananquitsica aisa irirajia guijaguijaitaquerica icajemajianaque, icanque:

—¡Caaviji yoganejencamajataca!

—¡Intsishiatsi irishineventajiquempari iricatica coraqueta pojatsica itigarancaqueca Majirontamajatatsica!

**10** —¡Ari incoquempani irishineventajiquem-pariquea iricatica peanquitsineca Amajirojiate inquempetajempariquea Taavini ipeavecagueti coraman i m a j i r o j i a t e choviquijianacajica!

—¡Caaviji yoganejencamajataca Aapani Irioshi choocatatsica jenoqui!

**11** Ariquea yarejetacaroquea Jerosarequi, yoanaquequea teemporoqui itsaroventantajitarica Aapani Irioshi, yamenaguepojiroqueate itsitacagueta pojiroquea. Iroompaqaea incajar anquiguitetanaquitigui isotoanaji yoanaji

---

\* **11:8** Yovemaroncaashijiavaquerigueti iitsaare quenavo quirontsiqui aisa ivemaroncaavoquitashijiavaquerigueti ovashi, manaquea i quejetacaavacari majirontatsica ishineventajigarigueti.

Vetaniaqui, itsipatsipaitanajari itsatacaanejia carajianquitsica 12, javaetanaji catsirincaiteri tsaparoncaguitetanaja.

*Jesoshi icanqueroquea iguera aatotarite  
ochoocatajitsi osovena*  
(Mt. 21.18-19)

<sup>12</sup> Ariquea osavincaguitetanajigueti isotoanaajirogueti Vetania, itaseapojiqaea Jesoshi. <sup>13</sup> Yamenacotsitapojacaroqueate iguera choocatanquitsica ovana, irootaquequea yoantapanajantaca iramenamajapanajanteroquea choocaca osovena, cotanquitsiquea iquempejivetapojacaroquea quempeji teequea anejeroji, iroguentini ovana. Tequeratatarite arejetempaji ochoocatantaca osovena.

<sup>14</sup> Icantitaroquea:

—Imaicaquea imaica aatoquea ishecatimajitarotsi pisovena.

Iquemajiaqueriquea itsatacaanejia.

*Jesoshi yoguivorocajiaqueri jocantantajiae-caroca teemporoqui*

(Mt. 21.12-17; Irc. 19.45-48; Jn. 2.13-22)

<sup>15</sup> Ariquea yarejerejeitaca Jerosarequi, iquijanaque Jesoshi oniganquirequi oticaacoroqui teemporo itsaroventantajitarica Aapani Irioshi, yamenajiapojiriquea jocantantaguetirica viratsipae intsompogui oniganquirequi aisa vegaratantajiguirica. Yogiuvorocajiaquojaqueriquea maasanojia, aisa yapitaquiaquequeroquea ishitaponcaropae

yojoquijitarica imentaquitsite guipiantajiguirica imentaquipae.<sup>†</sup> Iquejetsiguetaroquea aisa isavisavittantacaca jocantajiguirica emorenipae. <sup>16</sup> Icantimentajiaqueriquea maasano aatotarite iquijacaantajianacaro oniganquirequi teemporo irajaianaquero irajaararopae iravisacaantajianaquemparo antaqueronta. <sup>17</sup> Ariquea itsatacajaiqueriquea icanneriquea:

—¿Arimate tee ontionquempaji: ‘Oratica notsovironaquite incantacojitero iroguenti ashi incoraquetantapinijitempaca caquinteguetatsica iramanajiaquenaniji’?<sup>☆</sup> Cotanquitsiquea aviatimpajia manaquea pipeacajaiacaro imoro itsititantaca aitsitantajitsica.

<sup>18</sup> Iroompaquea iquemacojiaquerigueti saserorotejia anaantajianquitsica aisa tsatacaantajiguiroca itioncacotanaqueca Moishishini inintajiavecaquea irimetojajiaquerime, cotanquitsiquea querocampate incojiaquerini, itsaroacaajiacariea, yamenajiaqueri yomporoguiaventajiacari maasanopae yamenamenaitanaquequea intati ishineventajianacari itsatacaantavaequegueti.

<sup>19</sup> Ariquea opitsecajencatanajigueti, yoanaji Jessoishi, isotoanaquero Jerosare.

---

<sup>†</sup> **11:15** guipiantajiguirica imentaquipae. Incoraquequegueti joriojia quenajapojatsica otsipapae quinteninintsipaequi iramaquiaquegueti cantashitatiaguetanquitsica imentaquipae, irojocajiaqueneri guipiantajirica imentaquipae irojocajiajaveneriniji itsipapae cameetsaniji irojocagarantajajeneriniji Aapani Irioshi teemporoqui, irioca irivegarajiaque viratsi irojocajiaquenerica.

<sup>☆</sup> **11:17** Is. 56.7. <sup>☆</sup> **11:17** Jer. 7.11.

*Oshimpeguiricanaquequea iguera  
(Mt. 21.20-22)*

<sup>20</sup> Osavincaguitetanajigueti yoayoaitanaji, yamenacojianajiro iguera jac sampirocani metojamajataque maasano ovaritsa. <sup>21</sup> Iriraquea Peerero iquenquejitanajaro chapinquitica, icanque:

—Tsatacaantantatsica, iiintsija pameneroja intati ontatica iguera picantaqueroquea chapinqui qui aatonijite ochoocatajitsi osovena, imaicaquea metojaque.

<sup>22</sup> Icanque Jesoshi:

—Paventaventaitemparijate Aapani Irioshi.

<sup>23</sup> Iroomajacaquea noncantajiaquempica, quericaca cantaqueroneca ocatica otsempি: ‘Poanaquetsija pojocajatempa inirojaniqui quentijani’, aatogueti iquenquejaveta: ‘Arica’, iroguenti iraventamajaquempariquea Aapani Irioshi, ariquea oanaquequea ojocajapojempa.

<sup>24</sup> Jero imaica nocantantajiaquempica, taaca opajita pamanajajiaquerica Aapani Irioshi pamanajiaquerigueti, paventama-jaquemparija pintsamajajiaqueja arimajaca irojocajiaquempi, ari oncotanaquempa.

<sup>25</sup> Oraquea pamanajiguerigueti Aapani Irioshi, choocagueti picatsimajiaqueca, iroquetitaquea pimpeacojiajempari taaca opajita icatsimatacaquempica cameetsanijite irishinevenquempinijite Piri choocatatsica inquitequi irishetajempironijite pipeacaagushe-jiacaca aviatimpajia. <sup>26</sup> Cotanquitsiquea aatoguetija pipeacojiajaritsi ipeacaajiacaca catsimatacaquempica, aatoquea ishetajirotsi

Aapani Irioshi choocatatsica inquitequi pipeacaaguishejiacaca aviatimpajia.

*Icoacojitaqueriquea Jesoshi taaquea tigaranca-queri*

(Mt. 21.23-27; Irc. 20.1-8)

**27** Ariquea yarejerejeitapojajaro Jerosare, iriraquea Jesoshi iquijanaquequea intsompogui oniganquirequi teemporo yanijivijitaque. Incajarandiquiguitetanaquegueti icoraquecoraqueitashipojaqueri saserorotejia anaantajianquitsica, itsipatsipaicariquea tsatacaantajiguiroca itioncacotanaqueca Moishishini, icoraquejiaquequea aisa jivajiatsica.

**28** Icantajiaipojaqueri:

—¿Taaquea cantaquempi piquempetancaroca imaica poguivorocantajiacarica jocantantajatsica? ¿Taampate tigarancaquempiquea?

**29** Iriraquea Jesoshi icanqueri:

—Iintsija naatimpa noncoacotempi. Poguisitoaquenarogueti, ariquea nonquempetsitempa naatimpa noncamanquempiquea queri tigarancaquenaca. **30** Iviñacajatantigueti Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquintejia? Iintsija pincamantena.

**31** Irooquea iquemajiavaquegueti iquenquetsatavacaajianaca icantajianaque:

—¿Querote ancoterini? Ancantsivetemparigueti oquenantapojaca inquite, iriatimpa incantanaque: ‘Iroosacanica ¿queroquea ococani teeca pinquemisantantajiguempariji?’

<sup>32</sup> ¿Cotanquitsiquea ariguetija ancantsivetempari oquenantapojaca caquinteja...?

Manatari itsaroacaajiacariquea omporoguijajianquitsica, maasanopaetari icanque irira Joancani iriguenti tsavetantatsica itigarancaqueca Aapani Irioshi. <sup>33</sup> Jero icantantajiacarica Jesoshi:

—Teetari nontsajiguenica.

Ariquea Jesoshi icantajiaqueri:

—Iroosacanica, ariquea nonquejetaquempaquea naatimpa, aatoquea nocamantimpitsi quericaca tigarancaquenaca naatimpa.

## 12

*Jesoshi iquempetacaajiacariquea quempoguijavetaroca ovaitsoquimashi*

(Mt. 21.33-46; Irc. 20.9-19)

<sup>1</sup> Ariquea Jesoshi iquempetacaacotacanari icanqueriquea:

—Ichoocaque aparo caquinte yashincae quea iguepatsite. Iroompaquea imiamaronca queroquea ovaitsoqui, itantotacoqueroquea. Iqueecashiqueroquea yagaticantajitaroca ovaitsoqui osotoajatantanaquempaca ovaja, ipeacaitstairoquea irisavicantaquempaca jenoqui quempoguijaqueroneca cameetsanijite iramenamajaqueronijite aatonijite yaajiguetirotsi. Iroompaquea icajemajiaqueri itsipapae irishiacojiaqueneriquea. Oraquea onchoocatanaquegueti irojocagarantajiaqueneri iriatimpa. Ariquea yoavaetanaquequea jmm osamani. <sup>2</sup> Ocoramanivaetapojigueti aapojajagueti osamparipiotantanacaca ovaitsoqui

itigarancavecari aparo yashincaca iramanajia-jateriquea irojocagarantajajenerime iriatimpa.  
<sup>3</sup> Cotanquitsiquea iriraquea shiacojiaqueroca manaquea yaajiavaqueri itavatavaajiaqueri itigarancajajiri ejempaco. <sup>4</sup> Ariquea irira ashincaroca itigarancavetaja itsipa. Iriatimpa iroguenti iquirajashitequitacaajiaqueri icantaguishejiavaqueri. <sup>5</sup> Itigarancavetaja itsipa, ariquea imetojajiaqueri. Iroompaquea itigarancavetaja itsipapae oshequini. Iconoagarantacaqueate itavatavaajiaqueri, itsipapae imetojajiaqueri.

<sup>6</sup> “Iriguenti choocatajatsi irijanite ipintsama-jatacaca. Ariquea itigarancavetaja itsipa, icanque: ‘Iriocampa nirijanite, iriguentiquea irajaitavaque cameetsa, inquemisantajia-vaqueri.’ <sup>7</sup> Cotanquitsiquea iriatimpajia irooqua yamenavaquerigueti icoraquepojigueti iquenquetsatavacaajianaca icanquequea: ‘Jeeri irintatica ashinqueparoneca maasanopae irimetojanajegueti iriri. Jamequetiroshiatsi ametojajiaqueri cameetsanjite aatimpajia ashintamajatajemparoneca.’ <sup>8</sup> Iroompa yarejevepojaca yaajiavaqueriquea imetojajiaqueri, ipishoncavaequitiri antaqueronta otantotacocagueti ovaitsiquimashi.

<sup>9</sup> “¿Imaica querocaca incojiaquerini ashincaroca iguepatsite? Manaqueate iroashijiaquiteriquea irimetojajiaquiteri, itsipapaequeate incajemaji-aje quempogujitajerineca iniganquitejire.

<sup>10</sup> “¿Arimpate teequea pampatsajavantaco-jigueroquea Itioncacaantaqueca Aapani Irioshi coramaniqui? Ariqueate ocanquequea imaica:

‘Oraquea ogota mapi teeca irishineventaji-  
avetempaji peacaajiacaroca mapipanco,  
opeanacaquea anaantamajatanquitsica quishota-  
caaqueroca.

**11** Iriraquea Aapani Irioshi ipeacajaaroquea.

Amenajiaqueroquea aatimpajia oganejencani.’”

**12** Iriatimpajia intintajia veca iraacaan-  
tajiaquerimequea, iquemajia vaqueritari  
iriguenti iquejetacaajiac, cotanquitsiquea  
itsaroacaajiacariea omporoguijajianquitsica,  
jero yoayoaitantajianacaca.

*Icoacojiqueri Jesoshi cameetsavaequempa iro-  
jocajiqueneri Sesa imentaquipae  
(Mt. 22.15-22; Irc. 20.20-26)*

**13** Iriraquea pariseoja itigarancagarantajiaque-  
quea itsatacaane aisa shinevencarica Erorishi\*  
iroaroaitanaque ichoocaquegueti Jesoshi incomi-  
tacaajiaquempari cameetsanijite onchoocauenijite  
incanqueca ompampiatantapojempaca incat-  
simatacaantajiaqueri. **14** Iriatimpajia yoayoai-  
tanaquequea icantajiaipojiri:

—Tsatacaantantatsica, notsajiaque aviatimpa  
teetarite pamataguempaji. Tee inchoocateji  
quericaca pagamajaquempaca, aisa teequea  
pintsaroacaguempariji caquinte, irioca  
anaantavetanquitsica, irioca teeca iranaanteji.  
Pitsatacaantigueti tampatica poaquero  
picamanquerigueti queroquea incojiaquempani  
irinetsanajigueroniji inintaguetica Aapani

---

\* **12:13** Pamenero Mr. 3.6 otioncacagueti isavi itsavetacojiquerigueti shinevencarica Erorishi.

Irioshi. Aviatimpa pitsatiroqueate icanqueca majirontatsica Sesa icanquegueti maasanojia joriojia irojocagarantapinijiaqueneri imentaquipae. Imaica ¿queroca pincanten? ¿Cameetsampa nojocajiaqueneri, aricaca tee oncameetsateji? **15** ¿Ariquea nojocajiaqueneriquea, aricaca aato nojoquiniritsi?

Cotanquitsiquea Jesoshi itsatavaqueroquea teequea cameetsa incantajigueji, manaquea ishinetamampeajiacaqueate intati, irootari icantantacarica:

—¿Quero ococani pinintantajiacaca pincomitacaajiaquename? Iintsija pojocajiguenarijate apamentaquito tenario† nameneritate.

**16** Iriatimpajia yojocajiaqueneriquea. Iroompaquea icanqueriquea:

—¿Taa ipajita iricatica ivaantorijkeca? ¿Taaquea ashintaro ivajiro tioncanquitsica?

Icanqueriquea:

—Iriguenti majirontatsica Sesa.

**17** Icantsijigari Jesoshi:

—Iroosacanica, pojocajiajenerijate Sesa yashincaca iriatimpapinetsanatimenqueroniji icanqueca, aisa pinquejetacaajiaquempariquea Aapani Irioshi, pinetsanamajajiaqueroja maasanopae icantaguequeca.

Iquemajiajavaquerogueti icantajiaquerica, ariquea yamenamenaitanaque intati.

---

† **12:15** Iriraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

*Icoacojitaqueriquea Jesoshi quero oncoquempa intancoretancoreitanajegueti oncoramanitapoja-jegueti*

(Mt. 22.23-33; Irc. 20.27-40)

<sup>18</sup> Iroompaquea irioquea oahoaitananquitsica saroseoja iramenajiaquiteriquea Jesoshi. Iratimpajia iriguentiquea cantajiatsica aatoquea itancoretancoreitanajitsi metojatsica. Icantaji-apojaqueri:

<sup>19</sup> —Tsatacaantantatsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempajji, aapojempagueti irimetojanajegueti irojocapanajantero imanquigare, choocaguetiquea iriguentijeguite irioquea manquigatajemparone irijanintacajaemparoqua quempetaja irioca irijanintajari metojanquitsica.

<sup>20</sup> Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji. <sup>21</sup> Iroompaquea irioquea manquigavetajaro itsipa oguijatirica. Ariquea iquempetaja iriatimpa, imetojanaji teequea irijanintacaguemparoji. Ariquea iquempetaja itsipa niganquitica. <sup>22</sup> Arimpaquea iteroncanaca maasano imanquigajiavecarogueti, teequea irijanintacajaiguemparoji. Ariquea ometojitsitanaja iroatimpa. <sup>23</sup> Imaica, iintsija pincantenaja, oraqueate oncoramanitapoja-jegueti intancoretancoreitanajegueti maasano metojatsica, ¿quericaca manquigamajatajemparoneca? Maasanotari imanquigajiavecaroquea.

**24** Icanqueri Jesoshi:

—Aviatimpajia manaquea picomijiaca, teetarite pintsajigueroji querocaca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa. **25** Oncoramanitapoja jegueti intancoretancoreitanajegueti maasanopae metojatsica, aatoquea quericaca manquigata-jatsineca, aisa manquigarentsi aatoquea yojocantajitajirotsi irimanquigajitajemparo, manatarite inquempejianajempariequea irashivantijitete Aapani Irioshi choocajatsica inquitequi. **26** Imaica aviatimpajia iroguentiquea picanque aatoquea itancoretancoreititsi metojaripae. ¿Arimate teequea pampatsajavan-tacojigueroji itioncacotanaqueca Moishishini coramani iquenquetsataquegueti Aapani Irioshi maequitatsicaqui? Icanqueriquea: ‘Naroguenti Irioshimajate Averaame, Ishaaco aisa Jacovo.’ **27** Teequea irio Irioshite metojatsica, iriguentiquea Irioshite anijatsica. Aviatimpajia iroguenti picomimajajiaca.

*Queroca caavijica anaaque irinetsanamaja-  
jiqueca*

(Mt. 22.34-40)

**28** Ariquea icoraquepojaque aparo tsatacaantiroca itioncacotanaqueca Moishishini, iquemapojaqueri iquenquetsatavacaajiaca. Yamenaquequea itampaticamajataqueroquea Jesoshi itsatacaaquerigueti saroseojia, ariquea icanqueriquea iriatimpa:

—Oraticapae icantacaantica Aapani Irioshi  
irinetsanajite ¿querocate anaantamajatatsica?

**29** Iriraquea Jesoshi icanqueriquea:

—Oraquea caavijica anaaque icantacaantica  
irinetsanajite iroguenti cantatsica: ‘Pin-  
quemisantamajatenajate, ishiraerijia. Iriraquea  
Arioshite Majirontamajatatsica, iriguenti  
apaniromajaca. **30** Pimpintsamajataquemparija  
Majirontamajatatsica Pirioshite, pampaniroma-  
jatanaquerija, pimpintsashirentamajaquempari,  
pimpintsaguenquejanemajatanaquempari,  
pintampishiventamajaqueneri irooriji pip-  
intsamajatacari.’<sup>◊</sup> **31** Oraquea mavitetapojatsica  
iroquentiquea cantanquitsica: ‘Pimpintsa-  
taquemparija pigonoro pinquejetacaajempa  
pipintsatagueti aviatimpa.’<sup>◊</sup> Teetarite  
onchoocateji otsipa icantacaantaqueca  
anaaqueroca ocatica mavite.

**32** Iriraquea tsatacaantiroca itionca-  
cotanaqueca Moishishini icanque:

—Tsatacaantantatsica, arimajaca pinet-  
sanamajaqueroquea, iriraquea Irioshimajaca  
iriguentiquea aparomajaca, teequea inchoocateji  
itsipa. **33** Ampintsamajaquempariquea  
ampanirontamajatanaqueri iriatimpa,  
ampintsaguenquejanemajatanaquempari,  
ampintsashirentamajatanaquempari,  
antampishiventamajaqueneri. Aisa amp-  
intsamajaquempari agonoro anquejetacaajempa  
apintsatagueti aatimpa. Irootaquequea  
intintamajataque Aapani Irioshi, anaaqueroquea

<sup>◊</sup> **12:30** Ireo. 6.4-5.    <sup>◊</sup> **12:31** Irev. 19.18.

antaajiguenerigueti viratsipae maasanomontiina irooca aisa ajocajiguenerigueti Aapani Irioshi taaca opajitapae.

<sup>34</sup> Iriraquea Jesoshi yamenaquerigueti iquenquejamajaquero itampaticamajataqueroquea yoquiero, icanque:

—Irooshipojishiatsi pimajirontamajaquempari Aapani Irioshi.

Ariquea icantajiaquiti mariric, ariquea oparianaca teequea quericaca coacotajerineca.

*¿Taaquea choviquitanaqueri Quirishitotatsica?  
(Mt. 22.41-46; Irc. 20.41-44)*

<sup>35</sup> Oraquea itsatacaantanajigueti Jesoshi oniganquirequi tetemporo icanque:

—Iriraquea tsatacaantajiguiroca itioncacetanaqueca Moishishini icanquequea: ‘Iriraquea Quirishitotatsica‡ iriguenti ichoviquini Taavini.’ ¿Queroaquea ococani icantantajiacaroca? <sup>36</sup> Coramanitari Ishire Aapani Irioshi iquenquejacaquerigueti Taavini icanque:

‘Iriraquea Majirontatsica Aapani Irioshi icanqueriquea Nomajirote:

Pisaviquetaja pisenampijaqueenaja notincamijempequiqui,

---

‡ **12:35** Quirishitotatsica. Iguenquetsatsarequi guiriegojia icanquegueti Christos (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajitsica coramanitica intigarancaque Aapani Irioshi impeaquepaniji Imajirojiate maasano.

pintsipataquenaquea arejеваetanaquempa  
 nagavejajiaquerigueti maasano catsima-  
 jiaquempica, onquejevequemparo  
 povanquegontatsitempari.'

<sup>37</sup> Iriraquea Taavini iriotaquequea cantaquerica:  
 'Nomajirote', ¿queroquea incoquempani inchoviq-  
 uitanaqueri?

Icaramirincavaetanaquequea omporogu-  
 ijaventacarica, iquemajiavaquerigueti  
 ishinejianaca.

*Icanque Jesoshi aatojate yoguijaguijaitacotir-  
 itsijate tsatacaantajiguiroca itioncacotanaqueca  
 Moishishini*

(Mt. 23.1-36; Irc. 11.37-54; 20.45-47)

<sup>38</sup> Ariquea itsatacaantajigueti Jesoshi  
 icanque:

—Inchiquoitaja poguijaguijaitacotiritsijate  
 tsatacaantajiguiroca itioncacotanaqueca  
 Moishishini. Iroguenti ishineventajiac  
 inquisaajerontajiaquemparo ontiasearo  
 cameetsanijite irisemeque. Aisa yoayoaitap-  
 inique ontaniqui yojocantajigueturopu  
 taaca opajitapae ajaararontsipae inintajiaque  
 inquenquetsatacaaajitavaqueriquea. <sup>39</sup> Icoguitani  
 yoapinijiguigueti shinagogaqui icapiocan-  
 tapinijiaca, inintajiaquequea iroguisav-  
 icajitavaqueri intspatsipaipojempariequea  
 anaantajatiacsica. Ariquea iquejejiacaquea aisa  
 icapiocajiacagueti irishecajiaquempaquea,  
 inintajiaque iroguisavicajitavaqueriquea  
 intspatacaantajiquempariequea anaantajatiacsica.

<sup>40</sup> Aisa yamatavimatavivaetaqueroquea

metojacoropae iteroncamajatsitaqueroquea ashintaguecaca. Aisa yamanamampeajiacariquea Aapani Irioshi teetaquea irisanticotsitempaji, isemejiaque intati. Iriatimpajia caaviji iranaajiaquequea incatsimamajajitaqueri oncoramanitapoajegueti.

*Metojacoro ojocaqueneriquea Aapani Irioshi omentaqui site  
(Irc. 21.1-4)*

<sup>41</sup> Ariquea yoanaquequea Jesoshi isavicaque tampatica ochooaquegueti itetantajitarica imentaquipae yojocajiquenerica Aapani Irioshi. Yamenajiavaqueriquea maasano yojocajiaquegueti imentaqui site. Iconoajiacashintajianqui site yojocamajataquequea oshequini. <sup>42</sup> Iroompaquea ocoraquepojiquea aparo metojacoro, teequea ashintempaji, otepójiri iroatimpa movimentaquitejaniqui omentaqui site. <sup>43</sup> Yamaqueroquea Jesoshi icajemajiaqueriquea itsatacaanejia icanqueriquea:

—Arimajaca ocatica metojacoro teecca ashintempaji yamaqueroquea Aapani Irioshi otetaquequea oshequini, anajaiaqueriquea maasano. <sup>44</sup> Iriatimpajia yaagarantavajiri imentaqui site, yashintavaevetacatari, cotanquisquea iroatimpa teecca ashintamajavetempaji manaquea aacaajaniquicari maasano ashincaca ovegaratantajempameca osheca.

# 13

*Jesoshi icanque irisovejaiquero tetemporo  
(Mt. 24.1-2; Irc. 21.5-6)*

<sup>1</sup> Ariquea isotoanajiroquea Jesoshi intsompogui oniganquirequi tetemporo, icanquequea aparo itsatacaane:

—Tsatacaantantatsica, pameneroja inirotsentseina mapipae ipeacaantajitaroca. ¡Cameetsavaequea mapipancopae!

<sup>2</sup> Cotanquitsiquea iriraquea Jesoshi icanqueri:

—¿Arite pamenajiaquero maasanopae ocatica? Aatoquea ochoocatajitsi aparo mapi ogataajatsineca, maasanopae irisoveacomajitaquero.

*Queroquea oncotanaquempani irooshipo-jegueti onteroncaguetanajempa quepatsi  
(Mt. 24.3-28; Irc. 21.7-24; 17.22-24)*

<sup>3</sup> Ariquea yoayoaitanaquequea Orivotsempiqui otampaticatacoqueroquea tetemporoqui, ariquea isavicaque Jesoshi oraniqui. Iroompaquea iriraquea Peerero, Santiago, Joanca, Antirishi iquempejiquempejiipojacariquea, icantajiapojiri:

<sup>4</sup> —Pincamantena, ¿querocate oncarateni irisovejaiqueroni? Irooshipojegueti onetsanantaquempaca, ¿taa opaji nontsatantajiavaquemparoca?

<sup>5</sup> Iriraquea Jesoshi icanqueriquea: “Shoshoh yamatavijajitimpitsija.

<sup>6</sup> Incoraquecoraqueitaquetari oshequini pinajajiaquenaneca cantajianquitsineca: ‘Naroguenti’, ariquea iramatavijajiqueru incaramirincatashivaetanaqueri.

<sup>7</sup> Pinquemacojiavaquerigueti irashimirintavacaajianaquempaquea quempeji, aisa otsipapaequi quepatsi, aatoquea pitsaroajiguitsi. Aritarite onquejetanaquempaquea imaica, cotanquitsiquea aatotaja arejetsitatsi onteroncantanaquempaca maasanopae quepatsi. <sup>8</sup> Iriraquea quintenijianquitsica otsipapaequi quepatsi iroaroaitashijianaqueriquea osamanipaequitica, ariquea irashimirintavacaajiaquempa. Ariquea inquempejiaquempaquea majirontajiatsica inchoocagarantajiaque intigarancajiaqueri igoaretajiate iroaroaitashijianaqueriquea itsipa majirontatsica irashimirintavacaajiaquempa. Aisa omoguecaguetanaquempaquea. Irantsipevajequemparoqua tasestijencapae. Onquejeguetanaquempagueti imaica mana oparianaca intati irantsipevaetantajitaquempaca.

<sup>9</sup> “Pagamajaguitempani. Irajaianaquempiquea icapiocajiacaguetsi jivajjatsica incatsimatacaantajiaquempiquea, impasatacaantajiaquempi agompiacuitempi shinagogapaequi icapiocantapinijiacaca pigonorojia. Aisa irajaianaquempiquea quejemajirojiavetatsicaqui, aisa majirontajiatsicaqui. Ariquea aviatimpajia pintsavetantimojianaqueri pintsavetacotantajiaquenaqueate naatimpa.

<sup>10</sup> Iroquetitaquea intsavetacojiqueroquea Quenquetsatsarentsimajaca Oganejencatatsica intsitacacovaetanaquemparoqua maasanopae caquinteguetatsica, ariquea onteroncapojempa. <sup>11</sup> Oraquea iraacaantajiquempigueti irajaianaquempigueti majirontajiatsicaqui aatoquea pishoshoguiteta aatoquea

piquenquejajigui pincantajigue: ‘¿Querocaca noncanque nompetanaquempagueti coajica?’ Poapoaitanaquegueti iriatimpajiaqui aatoquea inchiquioji piquenquesatashijiaquempa aviatimpajia, iriguenti quenquejacaajiaquem-pironeca Ishire Aapani Irioshi cameetsanijite pintsajiaquenijite querocaca pincanque.

<sup>12</sup> “Inconoagaranquempaquea iraacaantajiaqueri iriguentijeguitepae irashimajaca igonoromajaca irimetojacaantajiaqueri. Ariquea inquejejiaquempaquea irijanintajiatsica irimetojacaantajiaqueriquea irijanijiate. Itsipaquea incatsimajianaqueri iriri iriniro irimetojacaantajiaqueri. <sup>13</sup> Maasanopae irisemaneguintimentajiaquempiroquea novajiro pitsaroventajiaquenagueti, cotanquitsiquea quericaca atsipetacovaetanquitsineca aatogueti yovashiantirotsi itsarovenquenagueti arejevaequempa irimetojanaje, irioquea iriguenti irajaitanaje inquitequi.”\*

<sup>14</sup> “Oraquea pamenajiaquerigueti iriraquea covaeguishetaqueroneca tetempo incatian-quemparogueti ontaniqui icantimentajitirigueti incatigue (quericaca apatsajavanqueroneca ocatica pinquenquejamajateroja pintsatimen-queroniji), ariquea inchoocaquegueti ontaniqui pintampinajapanajantejate maasanopae Joreaquitica pishiashiaitapanajantejate otsempit-sempliacagueti. <sup>15</sup> Quericaca choocatanquitsineca sotsiqui omencotapojacagueti itsovironaquitequi ovancaitoqui, aatoquea yaguijitapanajanti, aato

---

\* **13:13** Mt. 10.21-22.

iquiji iraguepanajantero taaca opajitapae choocatanquitsica intsompogui. <sup>16</sup> Quericaca choocatanquitsineca iniganquitejirequi, aatoquea ipiapanajanti irapanajantero iiitsaare. <sup>17</sup> jOoshiatsi manquigarentsija tsaraquijianquitsineca, aisa atsomijianquitsineca, caaviji antsipemajajiaquempaquea! <sup>18</sup> Aviatimpajia pamanacoventajiguempaja aatonijite otampaticatirotsi oncatsincaguitemajategueti. <sup>19</sup> Caavijitari irantsipejitaquempa anaavaequero maasanopae yatsipejiguetacaca iroqueragueti ipeacaacarogueti Aapani Irioshi quepatsi arejevaequemparoquea imaica. Aisa aatoquea yamenajitajirotsi oncoramanitapoja jegueti. <sup>20</sup> Aatomegueti icaratacaapojojirome Amajirote oratica savincaguiteripae irantsipetantajiajave-taquempaca interoncamajajiaquempamequea caquintejia. Cotanquitsiquea ipintsatacotacari icoguijiaqueca,† icaratacaantapojacanarica.

<sup>21</sup> “Quericaca cantajiaquempineca: ‘Jeeri iricatica Quirishitotatsica’, irooca incanqueMPI: ‘Ichoocaque ontaniQUI’, aatoquea piquemisan-tajiguirtsija. <sup>22</sup> Incoraquecoraqueitaquequea tsavetantamampejaigatsica amatavijantajian-quitsineca incanquequea: ‘Naroguentiquea Quirishitotatsica.’ Itsipaqua cantajian-quitsineca: ‘Naroguentiquea tsavetantiroca icanquenaca Aapani Irioshi.’ Aisa ironigaan-queroquea oacaantantatsica intati cameetsanijite iramatavijajianaquerinijite oshequini. Inquejetacaajitsivetempariequea icoguijiaqueca

---

† **13:20** Irirajia icoguijiaqueca iriojiatari  
aventaventajiaquemparineca.

Aapani Irioshi, cotanquitsiquea aatoquea yagavejiritsi. <sup>23</sup> Pagamajaventajiguempaja, nocamantsiquempiquea imaica maasano ocatica tequeratagueti arejepojempa.

*Querocaca oncoguetanaquempani incoraquetajategueti Irijanite Caquinte  
(Mt. 24.29-35, 42-44; Irc. 21.25-36)*

<sup>24</sup> “Iroompaquea oncaraguijanaquegueti atsipevaerentsi impitsecajencatanaque catsirincaiteri, taai aato iquitasetaji. <sup>25</sup> Iriraquea imoquiropae irasacaraague-tanaquempa. Irimoguecanaquempaquea choocaguetanquitsica jenoqui inquitequi. <sup>26</sup> Iroompaquea iramenajitavaqueriquea Irijanite Caquinte incoraquetapojajegueti incoraquetantapojajempa mararoqui, iragavejavaetapojempa iranaajiaqueriquea maasano, iroganejencavaetapojempa. <sup>27</sup> Ariquea intigarancjiaqueriquea irashivantijite iroaroaitanaquequea intsitacaguitejajiaquitero quepatsi aisa inquite, incapiocajiaqueriquea icoguijiaqueca Aapani Irioshi.

<sup>28</sup> “Imaica pintsajivaqueroja nontsatacaa-jiaquempica, nonquempetacaquempiroja iguera. Iroaquerasano etsocorevanatanaque pitsajiaquequea irooshipojaji ajagantsipojaje.

<sup>29</sup> Ariquea onquempetajempaquea onco-ramanitapojajegueti pamenajiavajerogueti onquempetanajempagueti notsatacajaianaquempica imaica, irooqua pintsatantajiajavajempa irooshipojajishiatsi incoraquetajate Irijanite

Caquinte, quejetaca catiapojaca soto-morontsiqui.<sup>30</sup> Arimajaca noncantajiaquempica, maasanopae ocatica nocantajiaquempica imaica onetsanamajatanaquempaquea tequeratagueti interoncajiguempaji maasano choocajianquitsineca omparianaquempagueti notsavetantsitacaca imaica.<sup>†</sup> <sup>31</sup> Oraquea inquite aisa quepatsi ompeaquequa, cotanquitsiquea oraquea nocantaguequeca aato opegatsi.

<sup>32</sup>“Teequea inchoocateji tsatatsineca querocaca savincaguiteri onetsanatantaquempaca, tee aisa intsajiteji quero incarateni catsirincaiteri. Irirajia ashivantijite inquitequitica tee intsajigueji, ariquea iquempetaca Irijanite Aapani Irioshi teequea intsateji. Aparoquea icocani Aapani Irioshi iriatimpa itsaquieroquea. <sup>33</sup> Pagamajavajemparija. Pincoguitempaniquea poguijajavajeri, aisa pamanaguiterini Aapani Irioshi, teetarite pintsajigueji querocaca aantapojempaca oratica savincaguiteri. <sup>34</sup> Onquempetaquemparoquea iroguegueti caquinte osamani, irojocajianajeri irashijia incantajianajeriquea maasanojia taaca opajita irisavicaventajajeneri. Incanteri yashincaca quempoguijiroca sotomorontsi

---

<sup>†</sup> **13:30** Otioncacaca acaniqui, iguenquetsatsarequi guiriegojia ocanque genea. Chooca mavitepae agavejaque oncantacotaque. Genea agavejaque oncantacoqueri (1) irioca maasano choocajianquitsica icantaquerogueti (esta generación o la gente de este tiempo); (2) irioca oncantacoque maasano joriojia (esta raza); (3) irioca oncantacoque maasano choocajianquitsineca omparianaquempagueti itsavetantsitacaca (esta generación, es decir, la generación que ve el comienzo de estas cosas).

incantacoguitempani                          iramenaguiteci.  
 35 Irootaquequea noncantantaquempica  
 aviatimpajia, pincoquempaniquea poguijamaaguiterini, teetari pintsajigueji querocaca  
 incoraquetantajatempaca                          ashincaroca  
 tsovironaqui. Aisa teequea pintsajigueji aricaca  
 incoraquetaje ompitsecajencaguitetanajegueti,  
 irooca nianquiite, irooca irinijanajegueti  
 chaapa, irooca osavincaguitetanajegueti.  
 36 Taampinaquea incomirejapoajempiquea,  
 inchiquiojitaja yamenajiapoajimpitsijate  
 teequea poguijajigueriji.                          37 Oraquea  
 nocantajiaquempica aviatimpajia, irooqua  
 nocantajiaqueriquea                          aisa maasanoja:  
 Pagamajajiaquempaja.”

## 14

*Iquemavacaimentajacari Jesoshi iraacaantajiaqueri*

*(Mt. 26.1-5; Irc. 22.1-2; Jn. 11.45-57)*

<sup>1</sup> Ariquea iriraquea saserorotejia anaanta-jianquitsica itsipajiacari tsatacaantajiguiroca  
 itioncacotanaqueca Moishishini yamenaji-avaquerogueti mavitetapoji savincaguite ri arejetantapojempaca Paashicoa,\* aisa savincaguite ripae ishecatantajitaroca pan tee ca inconoantajitemparo anempoacaanaqueroneca, iquenquejajianaque queroquea incoquempani iraacaantajiaquerinijite Jesoshi irimetojaca antajiaqueri, cotanquitsiquea teequea irininteji inquemacojitaqueri. <sup>2</sup> Icanquequea:

---

\* **14:1** Pamenero Glosario itsavetantajitirogueti Paashicoa.

—Oraquea anaanajempagueti Paashicoa, ariquea aacaantajiaqueri. Imaicaquea imaica aatotaja aacaantajiguiritsijate aatonijite icatsimatacojianaqueritsijate maasano omporoguijaventajiacarica.

*Ishaguitantajicari Jesoshi casancajencajari  
(Mt. 26.6-13; Jn. 12.1-8)*

<sup>3</sup> Ariquea yoanaque Jesoshi Vetaniaqui itsovironaquitequi Shimo icantajitica Avejancavetatsica. Isavisaviitaquequea ishecajiacaqueate, ariquea ocoraquepoji manquigarentsi amacopojiri casancajencajari vegaramajatatsica, ipeacaantajitaroquea naarero, tee inconoajatantajitemparoji otsipaja. Iroguenti yoguijaantajicaro chovintyoriqui ipeacaajitaca mapi icantajitica aravasetero. Amapojaquerogueti iriatimpaqui otsanorejacotsitaroquea oshaguitantsitariquea ishinquireguishiqui. <sup>4</sup> Iconoagarantajiacaquea savisaviitanquitsica oraniqui icatsimajianaquequea iquenquetsatavacaajianaca icanquequea:

—¿Querocaquea? Opomatsajatacashiatsi casancajencajari. <sup>5</sup> Ovegaravaeacaqueate anaanaquero 300 tenario.† Arimesano irojocantajiquerome aanquemparome imentaqui irojocajitaquenerimequea coguitejacojianquit-sica.

Arikea icatsimajiaqueroquea.  
<sup>6</sup> Cotanquitsiquea Jesoshi irooquea iquemajiavaquerigueti icantsijigariquea:

---

† 14:5 Iriraquea tenario irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

—Iintsija ariotaquetsijate, aatoquea pasereajigurotsi, cameetsavae quequea oshaguitanquenaro. <sup>7</sup> Iriraquea coguitejacojiatsica icoguitanitarite pintsipajajempariequa, pinintajiaquegueti pincavintsajajiaqueri pincavintsajajiaqueriqueate, cotanquitsiquea naatimpatarite aatoquea picoguitani pitsipajajanatsi. <sup>8</sup> Imaica iroatimpa onetsanaquero agavejaqueca, oshaguitsinotantaquenaro casancajencajari ashi irojoquijijitajatenagueti nometojanaquegueti. <sup>9</sup> Imaica noncamanquempiquea arimaja querocagueti intsavetantajiqueroni Quenquetsatsarentsi Oganejencatatsica maasanopae quepatsipaequi, ariquea intsavetantajiqueroquea ocatica manquigarentsi oshaguiquenagueti cameetsanijite inquenquejacotimentajitajeronijite iroatimpa.

*Jorashi ininque iraacaanqueriquea Jesoshi  
(Mt. 26.14-16; Irc. 22.3-6)*

<sup>10</sup> Ariquea yoanaque Jorashi Ishicariote iramenajiaquiteriquea saserorotejia anaantajianquitsica incantajiaquiteri ininquequea iraacaantaqueri Jesoshi. Irioveca itsatacaane carajianquitsica 12. <sup>11</sup> Iriatimpajia ishinejianacaquea icanqueriquea irojocajiaqueneri imentaquipae. Iriraquea Jorashi yoanaji, iroompaa riquea iquenquejanaquequea queroca incoquerini iraacaantaquerigueti.

*Jesoshi ishecatacaajianajari itsatacaanejia  
(Mt. 26.17-25; Irc. 22.7-18; Jn. 13.21-30)*

<sup>12</sup> Ariquea aapojaca savincaguiteri pariantajaroca savincaguiteripae ishecatantajitaroca pan

teeca onconoguemparoji anempoacaaqueroneca, irooquea aisa ijitorejantajitarica ovejajaniqui irishecajiaquempaca inquenquejacojiaquerouquea Paashicoa. Iriraquea itsatacaanejia Jesoshi icanqueriquea:

—¿Querocaquea pininqueni nonetsanajiaquempironi maasanopae cameetsanijite ashecajiaquempanijite coajica ashineventajiaquemparo Paashicoa?

<sup>13</sup> Ariquea iriatimpa itigarancajiaqueriquea mavite itsatacaane icantajiavaqueri:

—Poapoitanaquequea Jerosarequi, pintonquivojajiaquempari shirampari iramacopojaquerogueti ijatsite, irioquea pogu-jaguijaitanaque. <sup>14</sup> Querocagueti inquijanaqueni oraniqui ariquea pinquijaquijaitanaquequea aviatimpajia, pincantajiapojeriquea ashincaroca itsovironaquite: ‘Iriraquea Tsatacantantsica icanque: ¿Querocaqueate oraniqui noshecajiaquempani coajica nontsipatsipaiquempari notsatacaanejia nonquenquejacojiaquerouquea Paashicoa?’ <sup>15</sup> Iriatimpa intsipatsipaitanaquempiquea oshitamencotacagueti jenoqui, irijicojiaquempiroquea otantotacagueti caguitejeguinica, jac netsanaguequea maasanopae. Ariquea oraniqui pinetsanamajajiaquerouquea maasanopae ashecajiaquempagueti coajica.

<sup>16</sup> Yoayoaitanaquequea itsatacaanejia, yarejerejeica Jerosarequi, ariquea yamenajapijeroquea maasano quejemajataca icantajiavaquerica Jesoshi incajaranqui. Ariquea inetsanajiaquerouquea maasanopae irisheca-

jiaquempaca      irishineventajiaquemparoniji  
Paashicoa.

<sup>17</sup> Iroompaquea opitsecaguitetanaquegueti yoanaque Jesoshi Jerosarequi, itsipatsipaitanacariequa itsatacaanejia carajanquitsica 12. <sup>18</sup> Ariquea ipimerequijajapojaca shitaponcarontsiqui ishecajiaca. Icanque Jesoshi:

—Imaica noncamanquempi, iconoaqueimpiquea aviatimpajia aparo aacaantenaneca, ishecatimotaquena.

<sup>19</sup> Ariquea icohicoitanaca itsatacaanejia ishimampojancajianaca, yacayacaitanaque:

—¿Naroguenticampa aacaanquempineca?

<sup>20</sup> Iriraquea Jesoshi icanqueriquea:

—Iriguenti aacaanquenaneca notsatacaane conoavetaquempica aviatimpajia 12, iriguentiquea tsipavacoquenaca notsiantancarogueti pan shovaoqui. <sup>21</sup> Aritarite ontampaticamajatanaque ocanqueca tioncanquitsica coramani itsavetacotsijicarigueti Irijanite Caquinte, cotanquitsiquea jirantsipevaetempanshiatsi irira aacaanquerineca! Aatomesano ivoguime iriatimpa.

*Jesoshi icotarejaqueroquea pan yojocajiaqueneri itsatacaanejia*

(Mt. 26.26-29; Irc. 22.14-20; 1 Co. 11.23-26)

<sup>22</sup> Iroompaquea ishecajiacaguetti, yaitsitaroqua Jesoshi pan, yamanaqueriquea Aapani Irioshi, icantacovenquero: “Ariotesaa.” Ariquea icotarejaqueroquea yojocajiaqueneriquea itsatacaanejia icanqueriquea:

—Paajiavaqueja. Iroguenti notsino.

**23** Iroompaquea incajaranquiguitetanaquegueti yaacoquero chovintyoriqui,<sup>‡</sup> yamana jiriquea aisa Aapani Irioshi, icantacovenquero: “Ariotesaa.” Ariquea yojocacojiaqueneriquea itsatacaanejia, imirajiavaca maasano.

**24** Icanqueriquea:

—Iroguentiquea noriraja<sup>§</sup> sotojaatanan quitsineca nometojaventajiaquerigueti caramirincavaetananquitsineca. Ocantaco queroquea iroqueraro paaquito.\* **25** Imaica noncanquempiquea, aatoquea nomirajaro vinoja arejevaetapojempa nomirajemparo iroquerajaro impeaquempagueti Aapani Irioshi Imajirojiate maasano.

*Jesoshi icamanqueri Peerero iromanaco queriquea*

(Mt. 26.30-35; Irc. 22.31-34; Jn. 13.36-38)

**26** Iroompaquea iteroncajianaquerogueti yamashaiventajiaquerigueti Aapani Irioshi, isotosotoitanaji yoayoaitanaque Orivotsempiqui.

**27** Ariquea icanqueri Jesoshi:

<sup>‡</sup> **14:23** Iroguenti yaacotaque vinoja. <sup>§</sup> **14:24** Icanquerogueti noriraja mana iquejetacaacaro intati, cameetsaniji amirapini jiaquerogueti anquenquejapinijiaquero imetojaventajiacajigueti.

\* **14:24** Oraquea paaquito iroguenti icantamajajitirica itsipa irinetsanamajajitenerica. Ocaticaquea iroqueraro paaquito icantajiacajiquea Aapani Irioshi irishetacotajeri igovaeguishere maasano aventaventaqueemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

—Ocatica pitsecanquitsica maasano  
 aviatimpajia pimpashiventacaajiaquenaquea  
 pojocajiapanajantena. Otioncacatari  
 ocanque: ‘Aapojempagueti nometoja-  
 queri quempoguijirica oveja. Iriraquea  
 ovejajia imporocajencatesano maasano.’<sup>28</sup>  
 28 Cotanquitsiquea nontancorejanajegueti  
 naroquetiquea jivatanaquempine noanaquequea  
 Garireaqui.

29 Icanquequea Peerero:

—Impashiventacaajavetanaquempiquea  
 maasanopae irojocajocavetanaquempi,  
 cotanquitsiquea naatimpa aatotarite  
 nojoquimatinpitsi.

30 Cotanquitsiquea Jesoshi icanqueri:

—Noncamanquempiquea, coajica tequer-  
 atagueti omavitetempaji irinijeji chaapa,  
 pomanacoquenaquea 3.

31 Cotanquitsiquea arimpaquea icantama-  
 jatanaque Peerero:

—Ariguetija intsipatacaantajitenajate irimeto-  
 jajitena, irimetojajiquenaquea, cotanquitsiquea  
 aatoquea nomanacotimpitsi.

Ariquea iquejejiaquero maasano icantaji-  
 aqueca.

*Jesoshi yamanaqueriquea Aapani Irioshi Jetse-  
 maniqui*

(Mt. 26.36-46; Irc. 22.39-46)

32 Arikea yoayoaitanaquequea Jetsemaniqui.  
 Irooquea yarejerejeipojacaguetti iriraquea Jesoshi  
 icanqueri itsatacaanejia:

---

<sup>28</sup> 14:27 Sac. 13.7.

—Pisavisaviitetaja ocaniqui, naatimpa namanaquiterija Aapani.

<sup>33</sup> Iriguenti itsipatsipaitanaca Peerero, Santiago, Joanca. Iriatimpa ishimampo-jancavaetanacaquea yatsipeshirentavaeca.

<sup>34</sup> Incajaranquiguitetanaquegueti icanqueriquea:  
—Noshimampojancavaetatiganima  
irooshipojishiatsi ometojavaetenanishiatsi,  
picancanija ocaniqui pintinajaventajiaquena.

<sup>35</sup> Iriatimpa yoanaque tijai ontaniqui itigueroasetanaca quepatsiqui, yamana-queriquea Iriri ininquegueti impejaeneri maasanopae irantsipetaquempaca. <sup>36</sup> Oraquea yamanaquerigueti icanqueriquea:

—Aapani, pagavejaquequea maasanopae. Imaica nonintaveca paapitsatenarojate nantsipequempaca,† cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

<sup>37</sup> Ariquea yoanaji incajaranquiqui ichoocajiaquegueti itsatacaanejia, yamenajiapoñiri maajiaque. Icantapoñiri Peerero:

—Shimo, ¿pojocanacaniquea tin? ¿Arimpate teequea pagavejajigueji osamanicoñaji pintinajajigueji? <sup>38</sup> Pintinaje, aatoquea pimaajiguitsi. Pamanacoventajiguempaja aatonijite ocovaeguishetacaajianaquempitsi

---

† <sup>14:36</sup> Icanquegueti Jesoshi paapitsatenarojate nantsipequempaca iroguenti ishimampojancacomajatacaro incataroitanaqueri igovaeguisherejia maasanojia caquintequetanquitsica queri-caca aventajaquemparineca. Pamenero 1 Pe. 2.24.

covaeguisherentsi. Aviatimpajia pintajiaavecaqueate pishirequi pinetsanamajajiaquero intantguetica Aapani Irioshi, cotanquitsiquea teetarite pintampishijigueji pitsinoqui.

<sup>39</sup> Ariquea yoanaji aisa yamanajiri Iriri oquejetajaro icanquerica incajaranquitica. <sup>40</sup> Iroompaquea icoraquevetaja aisa yamenajiapojiri yojocajianacani tin aisa, otiavaetanacaritari pochoquiresnts. Ipashiventavaetanacaquea, cotanquitsiquea tee intsajigueji querocampate incantajiaquerini. <sup>41</sup> Yoanaji aisa, iroompaquea icoraquevetaja, ariquea icantajiajapojiri:

—Arisacanica picantacoguitani maaguitat simpi magorejajianaquempi. Imaica ariotapoji, arejetapojacca iraacaantantajitaquemparica Irijanite Caquinte irimetojajiaqueri covaeguishejiatsica. <sup>42</sup> Pincatintiitanaque, jamequetiro, jac coraquetapojishiatsi aacaanquenaneca.

*Yaajitaquerigueti Jesoshi*  
(Mt. 26.47-56; Irc. 22.47-53; Jn. 18.2-11)

<sup>43</sup> Quenquetsatanatsitiraja Jesoshi, icoraque tapojo Jorashi, irioveca itsatacaane iriojiavecacarajavetanquitsica 12. Itsipatsipaitapojacari icaramirincavaequequea caquinteja, yamashijiapojiri itsaampitsantsameniritepae aisa inchaquiji. Iriguentijia tigarancajiaqueri saserorotejia anaantajianquitsica aisa tsatacaantajiguiroca itioncacotanaqueca Moishishini aisa jivajiguirica joriojia. <sup>44</sup> Iriraquea Jorashi, aacaanquerineca Jesoshi, itsatacaaitsitanacari, icanqueriquea:

—Quericaca nonintavorotapojaqueca,<sup>‡</sup>  
 iriotaquequea pinintajiaqueca, paitajiguempari  
 paajianaqueriqueate inchiquiojitaja poguishigui-  
 ritssijate.

**45** Iroompaquea yarejetapojatiga iquempeji-  
 tapojacari Jesoshi, icantapojiri:

—¡Tsatacantantatsica!

Ariquea inintavorotsitari.

**46** Ariquea iriatimpajia yaitsijiapojacari  
 yajiricajiajapjiri. **47** Cotanquitsiquea chooca  
 aparo itsipatacaca Jesoshi yaitsitanacaroquea  
 itsaampitsantsamenirite, itsopajitaro,  
 iguempitarejitsitari yashintacaca saserorote  
 anaantamajatanquitsica. **48** Iquenquetsatanaque  
 Jesoshi icantajiguiri coraquetashijiaquerica:

—¿Arimpate naroguenti catsimari aapit-  
 satantatsica pamashitantajiaquenaca  
 pitsaampitsantsamenirite aisa inchaquiji  
 painmentajianaquenanijite? **49** Nocantacoguitani  
 savincaguiteriqui notsipatsipaitaqueempiquea  
 aviatimpajia ontaniqui oniganquirequi  
 teemporo notsatacaantavaeguitini, tee-  
 quea ari paajiguenaji, cotanquitsiquea  
 oquempetantanacaca imaica cameetsaniji  
 onetsanamajatanaquempaniji itioncacociaqueca  
 tsavetantatsicani coramaniqui.

**50** Iroompaquea iporocajencajianaque  
 maasano itsatacaanejia itsinampirejajianaqueri  
 Jesoshi. **51** Cotanquitsiquea chooca itsipa  
 tequeratatirajaca inquenquevarimajate

<sup>‡</sup> **14:44** Quericaca nonintavorotapojaqueca. Yamejiaca joriojia  
 coramani inintavorotavacaajavaca yamenavacaajiacagueti.

yoguijagetanacari, manaquea isavotacarоquea aramaroncajaro. Yaajiavecari,  
<sup>52</sup> ipotequitsitanaca tancoren, ishiapanajanta cajaratsinoni.

*Yaajitanaqueriquea Jesoshi icapiocajiacagueti imajirotepae joriojia*

(Mt. 26.57-68; Irc. 22.54-55, 63-71; Jn. 18.12-14, 19-24)

<sup>53</sup> Ariquea yaajianaqueriquea Jesoshi ichoocaquegueti saserorote anaantamajatanquitsica. Ariquea icoraquecoraqueipoji yomporoguijajapojaca saserorotejia anaantajianquitsica aisa tsatacaantajiguiroca itioncacotanaqueca Moishishini, irirajia aisa jivajiguirica joriojia.  
<sup>54</sup> Iriraquea Peerero yoguijatacovetanacari cotanquitsiquea impoivaetapojaque. Oraquea yarejetapojacarogueti pampatejjaniquipi itsovironaquitequi saserorote anaantamajatanquitsica, iquijapojaque otantoqui, yamenapojiri coaretajia itajiaque. Ariquea iconoajapojacari isavicapoji itatapojaque.

<sup>55</sup> Iriraquea saserorotejia anaantajianquitsica itsipajiacari maasano majirontajatiatsica capiocajianquitsica icajemacaantajiaqueriquea itsipapae intsojeventajiaquempari Jesoshi cameetsanijite onchoocaqueenijite ompampiatantapojempaca irimetojantajitaquemparica, cotanquitsiquea tee onchoocateji. <sup>56</sup> Itsojeventajiacariquea oshequini, irooquea icanque irooquea icanque, cotanquitsiquea querocampate incojiaquempani iriatimpajia teequea inquemavacaajiguempaji.

**57** Iconoagarantajiaca itsipapae icatintiitanaca itsojeventajiacari, icanqueriquea:

**58** —Naatimpajia noquemajiaqueriquea icanquegueti: ‘Nosoveguero ocatica teemporo ipeacaaca caquinte, nompeacaajempa otsipa aatoca ipeacaaja caquinte, ontrespojajegueti savincaguiti nontsitacantajemparo.’

**59** Icantaveca imaica, cotanquitsiquea itsipapae cantashitatiavacaro. **60** Ariquea icatiitsitanaca saserorote anaantamajatanquitsica icanqueriquea Jesoshi:

—¿Aatompa paquiri? ¿Taaquea opajita ocatica icantacojiaquempica iricajia?

**61** Cotanquitsiquea Jesoshi teequea incanteji, teequea iranqueriji. Ariquea icoacotsitajari aisa, icanqueri:

—¿Arimajampa aviguentica Quirishitotatsica, Irijanite Itsaroventajitaca?

**62** Icanquequea Jesoshi:

—Naroguentiguitatsi. Oncoramanitapo-jegueti pamenajiaqueriquea Irijanite Caquinte irisavicaque itincamijempequiqui§ Agavejamajatatsica. Aisa pamenajiavajeri inquenapojaje mararoqui.

**63** Ariquea icotanaca icatsimatanaque sasero-rote anaantamajatanquitsica iperejitsitaroquea

§ **14:62** itincamijempequiqui. Yamejiaca coramani iriraquea ma-jirontatsica incajemajiaqueri ishineventamajatacaca iroguisaviq-uitempari itincamijempequiqui, inquejemajirontavetaquempari iranaajiaqueri maasano itsipajia.

iitsaare sarararara,\* icanque:

—¿Arimpate ancoguimenquempari itsipapae cantacoquerineca? <sup>64</sup> Jac piquemajiaquerishinete iquejemanatanacarigueti Aapani Irioshi imaica. Iintsija ¿querocaca pincantajigueni aviatimpajia?

Maasanoquea icantajigui iquempeta-  
caanca irimetojajiqueru. <sup>65</sup> Iconoajiac  
iquishoquishoavaequeriquea.

Iponaaajiaque-  
riquea icapocapovaequeriquea, icantajiaavaqueri:

—Iintsijate pintsatavaqueja taaquea capojaquempi.

Iriraquea coaretajia yapatompatoncavaequeri.

*Peerero yomanacoqueriquea Jesoshi*

(Mt. 26.69-75; Irc. 22.56-62; Jn. 18.15-18, 25-27)

<sup>66</sup> Iriraquea Peerero ichoocaque oranqui isavi pampatejjianiquiqui. Iroompaquea ocoraquepoji aparo iromperare saserorote anaantamajatan-quitsica, <sup>67</sup> amenapojiri Peerero itataque, amenamajatanaqueriquea sorererere, ariquea ocanqueri:

—Aviatimpa aisa itsipapinitimpi Jesoshi Nasarequitica.

<sup>68</sup> Cotanquitsiquea yomanacotsitanacaquea, icanquero:

—Tee notsatsitavaquempiroji. Teequea non-quemeji querocaca picanqueni.

\* **14:63** Ari icojiaca joriojia, inquemaquerigueti itsipa inquejemanataquemparigueti Aapani Irioshi irooca incantaguishetaquerigueti, imperejitsitemparo iitsaare intsatantajitaquemparo ico-vaeguishemajataca. Otioncaca irira quejemanataquemparineca Aapani Irioshi irioca cantaguishequerineca intsinaquitajitempari irimetojajiqueru.

Isotoanaque iquijanajiro oaguitetanaquegueti osotomorotapojacagueti. Ariquea oraniqui icatiaca, iroompa inijanaque chaapa.  
**69** Amenitsitajariquea aisa omperarentsi ocantajiguiri choocajianquitsica oraniqui, ocanque:

—Iricatica irio itsipavijire Jesoshi.

**70** Cotanquitsiquea yomanacotsitanaja Peerero.

Iroompaquea incajaranguquitetanaquitigui icantajiguiri choocajianquitsica oraniqui:

—Arimajaca pitsipatari, aviguenti Garireaquitoica.

**71** Iriraquea Peerero icantsitanaja aisa:

—¡Nocanqueshinete tee nontsatimateriji iricatica piquenquetsatacojiaqueca! Namataacagueti incatsimatimentenaronishiatsi Aapani Irioshi.

**72** Iroompaquea icanquitigui, inijanajiquea chaapa. Iquenquejitsitanacaroquea Peerero icanquerica Jesoshi incajaranguquitica icanqueri: “Coajica tequeratagueti omavitetempaji irinijeji chaapa pomanacoquenaquea 3.” Ariquea icotanaca iraitsitanacaquea.

## 15

*Yaajitanaqueriquea Jesoshi Piratoqui  
 (Mt. 27.1-2, 11-14; Irc. 23.1-5; Jn. 18.28-38)*

**1** Osavincaguitetanajigueti icapiocajiacasaserorotejia anaantajianquitsica, aisa jivajiguirica joriojia, aisa tsatacaantajiguiroca itioncacotanaqueca Moishishini, aisa maasano imajirotepae joriojia. Iquemavacaajiacquerocaca incojiaquerini Jesoshi. Ariquea

yoisho jiana queri, yaajiana queneriquea Pirato,  
yojocajiapo jaqueneri.

<sup>2</sup> Iriatimpa icoaco queriquea icanqueri:

—¿Arimajaca aviguenti Imajirote jorio?

Icanque Jesoshi:

—Tampatica poaquero.

<sup>3</sup> Cotanquitsiquea irira quea saseroroteja  
anaantajianquitsica arimpaquea itsojeventa-  
jianacari.

<sup>4</sup> Irira quea Pirato icantsitajari aisa icanqueri:

—¿Aatompa paquiri? Pinquemava queroja  
maasano icantacoguetaquempica.

<sup>5</sup> Cotanquitsiquea Jesoshi teequea incanti-  
mateji, jero yamenantanacaca Pirato intati.

*Icanque irimetojajiquerijesoshi*

(Mt. 27.15-31; Irc. 23.13-25; Jn. 18.38-19.16)

<sup>6</sup> Icantacoguitani aapojajagueti Paashicoa,  
irira quea Pirato yametapinitaca yoguipaqui-  
jajiri aparo isantanata cotimentajiquerica  
ipeacaaguishetacaca, quericaca inintajia queca  
igonorojia irogui paquijaje. <sup>7</sup> Ichooca que  
aparo shirampari ipajita Varavashi, iroguenti  
isantanata cotimentajiquerij imetojanta quegueti  
itsipataca antajicari itsipapae itsipatashiji acaca  
imetojanta quegueti, iroguenti inintajiji-  
aveca iroguisoto aja jerime majirontatsica.

<sup>8</sup> Icaramirincavae quequea oraniqui joriojia,  
ariequea iconoagarantajiacay oya yoaoaitana que  
Pirato qui icantajia poja queri irantajeneri  
yametapinicaca. <sup>9</sup> Iriatimpa icantava queri:

—¿Irrio quea pinintajia que noguipaqui jajempiri  
Imajirote jorio?

**10** Iriatimpa itsaque irirajia saserorotejia anaantajianquitsica manaquea icatsimatimenta jiaqueriquea Jesoshi yamenajiaquegueti iriguenti yomporoguijacentajiaca, irootaquequea yaanta jitanacarica iriatimpaqui. **11** Cotanquitsiquea iriraquea saserorotejia anaantajianquitsica itsatacayaqueri omporoguijajianquitsica icantajiaqueri:

—Iintsija pincantejate: ‘Iriompaqueate pogu ipaquijaje Varavashi.’

**12** Iriraquea Pirato icanqueriquea:

—Arisacanica imaica ¿querocaca noncoquerini irica picanqueca Imajirote jorio?

**13** Iriatimpajia icajemitsijanaca:

—¡Pompajacoteri!

**14** Icanqueri Pirato:

—¿Taampate ipeacaaca?

Icajemamajajianaji:

—¡Pompajacoterishine!

**15** Iriraquea Pirato inintaquequeate iroguishinejajiaqueriquea omporoguijajianquitsica, yoguipaquijajiajiniri Varavashi. Ariquea icantacaantsitariquea Jesoshi intavaajitaqueri, irajaitanaqueri irompajacojiqueri.

**16** Iriraquea coaretajia yaajianaqueriquea intsomoguiqui pampatejijaniquipi qui imapi pancotequi Pirato, icantajitiro “Peretorio”, ariquea icajemacaantajiaqueri maasano irapicoaretajiate. **17** Ariquea iquitsaatantajiacari otsipa quitsarentsi camachoncamorenari. Yaajiaque tseitseiaro, ipeacaashijiakanari iramatsaero, yamatsaetsitari. **18** Ariquea ishiroshirontimentavaecari icanqueriquea:

—;Iricashia Imajirote jorio!

**19** Itavatavaavaetaqueriquea iguitoqui  
savoroquijiqui, iquishoquishoavaequeri,  
igueroventajiacari iquempetacaajiacari  
ishineventajitarigueti majirontamajatatsica,  
manaquea ishiroshirontimentavaecariequea  
intati. **20** Iroompaquea iteroncajianaquerogueti  
ishiroshirontimentavaecarigueti, isapocajiri ca-  
machoncamorenari, irooqua iquitsaatantajari  
iitsaare, yaajianaqueri irompajacojiaqueri.

*Yompajacojitaquerigueti Jesoshi*

(Mt. 27.32-44; Irc. 23.26-44; Jn. 19.17-27)

**21** Chooca aparo Shirenequitica ipa-  
jita Shimo, iriri Ariantero aisa Iropo.  
Yavisanaque iquenavaetapoji ontaniqui  
niganquitejipaequi. Icantajiavaqueri coaretajia  
irinatashitanaqueriquea Jesoshi igoroshite.

**22** Ariquea yaavaetanaqueriquea Jesoshi  
ontaniqui osamani opajitaquea Gorogota,  
(ocanquequea: “Ochoocatigueti Shocoitontsi”).

**23** Yojocajivecanariequea vinoja iconoantajicaro  
mira,\* cotanquitsiquea teequea irimiremparoji.

**24** Iriraquea coaretajia yompajacojiaqueri.  
Ariquea ipegavijijiaca intsajiaquenijite quericaca  
ashinquemparoneca iquitsaaguevecaca.†

**25** Oraquea yompajacojiaquerigueti  
iroaquerasano ijenoquivaepoji catsirincaiteri.

---

\* **15:23** Oraquea mira iroguenti casancatatsica,  
inconoantajiquemparogueti oja irojocajiqueneri aatonijite  
ocatsitiri. † **15:24** iquitsaaguevecaca. Irooca icantacotaque  
isavoguinaro, igaviguitire, ichompimashite, aisa yogataaacaca,  
ocarataque 4.

**26** Oraquea itioncacojiquerogueti taate imetojimentajiqueri ocanque: “Iriguenti Imajirote jorio.” **27** Itsipatacaantajicari mavite aitsitantatsica yompajacojitaqueriquea, aparo yogatiacojiqueru itincamijempequiqui, iriraquea itsipa iroguenti yogatiacojiqueru ishinampijempequiqui. **28** Oraquea oquejetacagueti imaica iroguenti irinetsanajiqueroquea itioncacojiquerogueti coramaniqui ocanque: “Itsipatacaantajicari covaeguishetatsica.”<sup>28</sup> **29** Iriraquea avisavisaitanquitsica oraniqui inijashinatacari icantajianaque chaguito chaguito, icanqueriquea:

—¡Arisacanica querocampate imaica! Arimpate picanque: ‘Nosoveaqueroquea iteemporote Aapani Irioshi, ariquea nompeacaitajemparo, nontsitacajero 3 savincaguiteri.’ **30** Iintsijate pompetanaquempajate imaica, pintsoparejactanajempajate coroshiqui paguijitarojo.

**31** Ariquea iquempejiaca saserorotejia anaantanquitsica itsipajiacari tsatacaantajiguiroca itioncacotanaqueca Moishishini ishirosirontimentavaecari, iquenquetsatavacaajiacaricanqueriquea:

—Yamijiaqueri itsipapae yompetacogue-tacari, cotanquitsi teequea iragavejempaji irompetacotanaquempa iriatimpa. **32** Iriovetaca Quirishitotanquitsica Amajirojiate ishiraerijia, iintsija intsopajacotanajempaja coroshiqui iraguijipojaje, amenajiaquerinijite antsatimenqueriniji antsarovenmentajaqueempari.

---

<sup>28</sup> **15:28** Is. 53.12.

Iquejetsijianaca itsipatacaantajicarica  
yompajacojitaquerigueti, icantacantaguishevae-  
taqueri.‡

*Imetojanaquegueti Jesoshi*

(Mt. 27.45-56; Irc. 23.44-49; Jn. 19.28-30)

<sup>33</sup> Iroompaquea itampaticavepojaca catsirin-  
caiteri, ocantanaque pitsec maasano quepatsi,  
arejetacovaeca ijaguitetanajigueti. <sup>34</sup> Ariquea  
icotanaca iririjencavaetanaque Jesoshi icanque:  
“Eloi, Eloi, ¿lama sabactani?”§ (Ocanque: “Aapani  
Irioshi, Aapani Irioshi, ¿queroquea ococani pojo-  
cantanaquenaca?”)

<sup>35</sup> Iconoagarantajiacaquea choocajianquitsica  
oraniqui irooquea iquemajiavaquegueti icanta-  
jianaque:

—Pinquemerija, icajemaqueri tsavetantatsica  
Iriashini.

<sup>36</sup> Ishiitsitanaca aparo, yaanaquequea atsim-  
ijicajatiroca oja, iticajatsitaroquea vinoja ca-  
chonerontoquijajaro, yogajenocacoqueneriquea  
savoroquijiqui irantsimijicajatacaaquerime.  
Icanque:

—Iintsijate pamenerijate, amenajiaavaqueritaja  
incoraquetashipojeri Iriashini irogaguijtajeri.

<sup>37</sup> Iroompaquea icajemapanajanti Jesoshi  
iririjencavaetanaque, ariquea imetojanaque.

<sup>38</sup> Irooquea imetojanaquitigui, ariquea octanaca

‡ **15:32** Pamenero aisa Irc. 23.39-43. Aparo  
cantashitatananquitsi coajica, yaventanacari Jesoshi  
inquerquejacotajerinji irimajironquempagueti. § **15:34**

Eloi, Eloi, ¿lama sabactani? oponeaca iguenquetsatsarequi  
arameo. Mateo itioncaque Elí, Elí iguenquetsatsarequi evereo (Mt.  
27.46).

operejanaque omorena ticaamorenatanquitsica tetemporoqui jocagatsica aatonijite iquijajitirotsi intspoguiremajacaqui. Opecotarejanaque tampaticaquea niganquisano ocantanaque sarararararara, oquenapojoquea jenoqui arejevaetacaquea isavi. <sup>39</sup> Iriraquea imajironcaca 100 igoaretajate Iromaquitica icatiaca oraniqui itampaticatacotaqueri Jesoshi. Oraquea iquemavaquerigueti icajemanaquegueti, aisa yamenavaquerigueti quero icotanacani imetojanaquegueti, icanque:

—Arimajaca iriguenti Irijanite Aapani Irioshi.

<sup>40</sup> Aisa ariquea ochoocajiaque manquigarentsija tijacoñajisano ontaniqui, amenajiaqueriquea Jesoshi. Oconoacaroquea Maria Magararaquitica, Sarome, aisa Maria iriniro Jose aisa Santiago\* guijapojirica. <sup>41</sup> Iroguentijiatari oguijajiaquerica yanijivaetigueti Garireaqui, amitacojiaqueriquea. Aisa ariquea ochoocajiaque oraniqui otsipapae ocaramirincavaeque manquigarentsija tsipatsipaitacarica iroqueragueti icoraquetaquegueti Jesoshi Jerosarequi.

*Yojquijitajitajari Jesoshi imperitamoroqui  
(Mt. 27.57-61; Irc. 23.50-56; Jn. 19.38-42)*

<sup>42</sup> Ariquea ijaguitemajatanaji. Oratica savincaguiteri iroguenti inetsanatantajiacaca joriojia maasanopae incoguitejacojiaquempaca osavincaguitetanaquegueti aapoajajempaca imagorejantajitaca. <sup>43</sup> Iriraquea Jose Arimateaquitica, iriguenti anaantatsica iguejemajirore joriojia, itsipajiacari imajirotepae

---

\* **15:40** Santiago. Icantajitiri aisa Jacovo.

icapiocapinijiacagueta. Yoguijaqueriquea Aapani Irioshi impeaqueempagueti Imajirojiate maasanojia. Iriatimpa teequea intsarogueji, yoashitanaqueriquea Pirato icanqueriquea ininque irajaitanajero itsino Jesoshi.  
**44** Cotanquitsiquea Pirato iquemaquegueti metojaque Jesoshi yamenanaquequea intati. Icajemacaanqueriquea imajirote coaretajia icoacojiaqueriquea arimajaca metojaque.  
**45** Iquemavaquerogueti icanquerica coareta, iriraquea Pirato ishinetsitacanari Jose iraanajero itsino. **46** Irootarite yoantanacaca Jose ivegarataquitiquea iniromorena shipetari. Iroompa yoanaque itsopajacotajatiri, yampiguiricantajiacari, yaanajiriquea ontaniqui yojoquijitajatiri imperitamoroqui imorotashiji-tirgueti metojatsica. Itigaritashitancari iniroshimentapiri mapi, iticaacotantacari.  
**47** Oraquea Maria Magararaquitica aisa Maria iriniro Jose amenacojiaqueriquea yojoquijitajirigueti.

## 16

### *Ipochatanajigueti Jesoshi*

(Mt. 28.1-10; Irc. 24.1-11; Jn. 20.1-10)

**1** Ariquea opitsecanajigueti savincaguiteriqui imagorejantajitaca,\* oraquea Maria Magararaquitica otsipatanacaroquea Sarome aisa Maria iriniro Santiago oahoaitanaque

---

\* **16:1** imagorejantajitaca. Irirajia joriojia imagorejantaro savincaguiteri saavaro. Opitsecapoajajigueti oteroncapojaca imagorejantajitaca, irootaque oteroncampojaja semana, ariquea oparianaja otsipa.

ovegarajiaquitiquea                    poncajencajaripae,  
 oahoaitanaqueniji oshaguitantajiaquitemparime  
 Jesoshi. <sup>2</sup> Iroompa osavincaguitetamanaque  
 pariapojarocaroca    semana,<sup>†</sup> iroaqueragueti  
 isotoapojaigueti catsirincaiteri oahoaitanaque-  
 quea ontaniqui yyoquijitajirigueti. <sup>3</sup> Oraquea  
 oahoaitanaquegueti                    quenavoquirontsiqui  
 ocanque:

—¿Taaquea tigaritajerone mapi iticaacotanta-  
 jivecarica imperitamoroqui?

<sup>4</sup> Inirojeguimajaca ocanca, cotanquitsiquea  
 arejerejeivetapojaca amenajiapojoiro oo jac  
 yoguishirincajiqueroquea. <sup>5</sup> Oquiaquijaipoji  
 intsomoguiqui                        imperitamoroqui, ame-  
 najiapojoriquea                      shirampari                    iriaqueraca  
 quenquevaritananquitsica,<sup>‡</sup>                    isavicaque  
 otincamijempequiqui, quitamarovaeque iitsaare.  
 Ariquea                                ocojanaca                    otsarotsaroitanaque.  
<sup>6</sup> Cotanquitsiquea iriatimpa icanqueroquea:

—Aatoquea pitsaroajiguitsi. Imaica aviatim-  
 papia picoajiavecariequea Jesoshi Nasarequitica  
 yompajacojivecaca, cotanquitsiquea imaica jac  
 pochatanaji. Teequea inchoocatajeji ocanqui.  
 Lintsijate pamenerojate intati yyoquijijive-  
 carigueti. <sup>7</sup> Imaica poapoaitanaquegueti  
 pincamantajapirojerija Peerero aisa maasano  
 itsatacaanejia pincanqueriquea: ‘Iroanaquequea  
 Jesoshi Garireaqui, iriquetiquea oananquitsine.

<sup>†</sup> **16:2** Iroguenti opariantanaja semana savincaguitei tominco.

<sup>‡</sup> **16:5** shirampari iriaqueraca quenquevaritananquitsica. Irio-  
 taque irashivantite Aapani Irioshi, amenajiaqueri quempevaeca  
 caquinte.

Pamenajiapojareri ontaniqui. Aritarite icantajianaquempi tequeratagueti irimetojeji.'

<sup>8</sup> Osotosotoitapanajanti oshiashiaitanaca ompioncajianaquea mana oajianaque intati. Teequea oncamantapojeji irooriji otsaroajianaque.

*Jesoshi yonigaajarogueti Maria Magararaquitica*  
(Jn. 20.11-18)

<sup>9</sup> Oraquea ipochatanajigueti Jesoshi iroaqueragueti osavincaguitetamanaji pariapojaroca semana, iroqueti yonigaaja Maria Magararaquitica yoguisotoacoventajiaqueca 7 ampatsini ishaquiavecarogueti. <sup>10</sup> Iroatimpa oanaque ocamantajiavetapojari maasano itsipavetacaca. Amenajiapojariri iraacojiaqueri ishimampojancajiana. <sup>11</sup> Cotanquitsiquea iquemajiavetavacarogueti ocanquegueti anijanaji Jesoshi, amenajiri, teequea inquemisantajigueroji.

*Jesoshi yonigaajari mavite itsatacaane*  
(Irc. 24.13-35)

<sup>12</sup> Iroompaquea Jesoshi irioquea yonigaaja mavite itsatacaane yoayoaitanaquegueti ishivoquijiavetanacaro quenavoquirontsiqui niganquitejipaequi, cotanquitsiquea manaquea icantashitatiimojiacari. <sup>13</sup> Iroompa iriatimpajia icantacantaitanaja Jerosarequi icamantajiavetapojajari itsipajia, cotanquitsiquea teequea inquemisantajigueroji iriatimpajia aisa.

*Jesoshi icantajianajiri itigarancanejia intsavetacojianaqueriquea*  
(Mt. 28.16-20; Irc. 24.36-49; Jn. 20.19-23)

<sup>14</sup> Iroompaquea ishecajiacagueta itsatacaanejia carajianquitsica 11, yonigaimojiajariquea Jesoshi. Ariquea icantomajajaquei yamenaquegueti manaquea iquishoshirentavaetanaque, teetarite inquemisantajigueriji cantajiavecarica amenajiavecarica ipochatanajigueti.

<sup>15</sup> Iroompaquea icanqueriquea:

—Poapoitanaquequea pintsitacaguite-javaetanaqueroquea maasano quepatsi, pintsavetanteroquea Quenquetsatsarentsi Oganejencatatsica pintsavetantimojiaqueriquea maasano caquinteja. <sup>16</sup> Taacagueta quemisanta-jiavaqueroneca aisa iriviñacajatacaantajianaquempa irishetacojiqueriquea iraantajitavaquemparica aatoniji yogui camorecariqui, cotanquitsiquea quericaca aatoca iquemisantirotsi, manaquea incatsimatimentajiqueri igovaeguishere.

<sup>17</sup> Iriraquea aventaquetaneca manaquea iramenajitaqueri iroguisotoaguetaqueriquea ampatsinipae shaquiajiacarica caquinte, iraventashitaquemparigueti novajiro, aisa inquenquetsatantajiaquemparoquea otsipapae quenquetsatsarentsipae teecca intsajavetemparoji. <sup>18</sup> Irajiricajiavequempari camaarini, aisa arigueti irojocajivequenempari quepigatatsica irimirajiavequemparoquea, aatoquea aanaqueri. Aisa impamijiaqueri joquijiguetatsica, impeaguetanajempaquea.

*Yatsomajanajagueta Jesoshi  
(Irc. 24.50-53)*

<sup>19</sup> Iroompaquea iteroncanaquerogueti Amajirote Jesoshi iquenquetsatacaajianajirigueti

itsatacaanejia, yatsomajanaja yoanaji  
jenoqui inquitequi isenampijapoja(jari Aapani  
Irioshi isavicapo(ja(ji itincamijempequi qui. §  
20 Iriatimpajia yoayoaitanaque itsavetan-  
tajianaque itsitacaguitejavaetanaquero  
guinteninintsipae. Iriraquea Amajirote  
yamijiaqueriquea yagavejacaajiaqueri yonigaan-  
tajiaquero oacaantantatsica intati cameetsanijite  
intsajiaquenijite iriratica itsavetantimojiaqueca  
teequea iramatavijajigueriji.

---

§ 16:19 Irira savicatsica itincamijempequi qui majirontatsica  
yanaajiaqueri itsipajia, iquejemajirovecari majirontatsica.

**Iroaquerari Itioncacaantaqueca Aapani  
Irioshi: Tsavetacoquerica Amajirote  
Jesoquirishito**

**New Testament in Caquinte (PE:cot:Caquinte)**

copyright © 2008 Wycliffe Bible Translators, Inc.

Language: Caquinte

Translation by: Wycliffe Bible Translators, Inc.

Caquinte[ cot], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Caquinte

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

83ba253d-55c7-5686-b0d2-bfc8d1efc0d5